

O LE EKALESIA A IESU KERISO O LE AU PAIA O ASO E GATA AI • MATI 2019

OLELIAHONA



**Malamalama i le
Fesootaiga o Tamaitai
i le Mana o le Perisitua,
itulau 34**

Fesili e 3 e Fesiligia
ai Oe Lava la i Taimi
Faigata, itulau 12

O Le Ata Vali Autu o Lou
Olaga, itulau 16

UA I AI
IINEI LE
EKALESIA

Roma Italia






Pe a faapaiaina le Malumalu o Roma Italia i le vaiaso o Mati 10-12, 2019, o le a olioli le Au Paia o Aso e Gata Ai i le lalolagi, ae maise lava le Au Paia i Italia. O le a se isi mea e sili atu ona ttau e mafai ona maua e le "aai e faavavaau" nai lo le mauaina o le maota o le Alii?

O le malumalu, o le malumalu muamua lea i Italia, o loo i le vaega i matusasae o Roma. O se vaega autu faalelotu ma le faaleaganuu lena e aofia ai se falelotu e tele ona aoga (faatasi ai ma se potu tele faaaganuu ma nofoaga mo konafesi), se nofoaga autu mo tagata asiasi, o se nofoaga autu o le talafaa-solopito o aiga, ma se fale e nonofo ai tagata e o mai i le malumalu, e siosiomia uma lava e togalaau.

Na amata taumafaiga faafaifeatalai i Italia i le 1850, ae na faalavelaveina e se gaoioiga a tagata tetee-i le Eklesia ma mea na manaomia aloiai faigata. Na iu ina faatagaina le Eklesia i faaauau taumafaiga faafaifeatalai i le 1964. I le 1993, na tuuina atu ai e Italia le faatagaga aloiai i le Eklesia. I le 2012, na maua ai e le Eklesia le faatagaga aloiai o se "paaga a le setete," lea e faatagaina ai le Eklesia i le saolotoga e sili atu e faia ni mea lelei e sili atu, o se eklesia ma o se faalapotopotoga foi i le nuu.

- I le asō, ua toeitiiti 27,000 le Au Paia o Aso e Gata Ai i Italia i ni aulotu e 101.
- Na pulefaamalumalu Peresitene Thomas S. Monson (1927-2018) i le suatiaina o le ele-ele i le 2010 mo le Malumalu o Roma Italia, lea na auai ai foi le sui pulenuu o Roma.
- E lua misiona i Italia: o le Misiona a Italia Milan ma le Misiona a Italia Roma.





Sootaga o Afafine o le
Atua i Lona Mana o le
Perisitua

Barbara Morgan Gardner

34

O iau Malaga e le Mailoa i le
Olaga Faitino
Elder Dieter F. Uchtdorf

16



E Anoanoai Mea e Tatau Ona Ou Aoaoina e Uiga i le Perisitua

Ile avea ai ma se tamaitai talavou ma mulimuli ane avea o se faifeatalai, ou te manatua le tau mafaufau pe e faatatau ni fuaiupu faapitoa o tusitusiga paia ia te au o se tamaitai, ae maise lava na mau e faatatau i le galuega faafafeatalai ma le perisitua. I ou valaauga eseese i le taimi nei i le Ekalesia ma i le avea ai o se faiaoga i mataupu faalelotu, na fesili mai ai nisi ia te au i fesili lava ia pe faapefea ona faatatau le perisitua ia i latou.

E pei ona ou tusia i lau tusiga i le itulau e 34, na tau atu e taitai o le Ekalesia i ni nai tausaga ua mavae i tagata ia malamalama atili i le perisitua. Na taua e Peresitene Russell M. Nelson se popolega faapea "e toatele o tatou uso ma tuafine e le o malamalamatoatoa i le mataupu o le mana ma le pule o le perisitua."¹

E sao le faaupuga faapea "o le aoao e uunaia ai musumusuga." A o ou suesue i le perisitua ma aoao atu tagata aoga i le iunivesite e uiga i le perisitua, e le gata ua ou iloa ai le itiiti tele o lou iloa ae faapena foi ona tatalaina ai lou loto i upumoni e faavavau e faatatau i le perisitua.

Ou te faamoemoe ao outou aoao atili e uiga i le perisitua i lenei tusiga, o le a outou malamalama ai faapea e finagalo o tatou Matua Faalelagi e faamanuia i tatou i le perisitua ma ua augani mai perofeta o aso e gata ai mo i tatou ina ia faaaoga tatau nei avanoa—atonu e faapitoa lava i na e tuuina atu i alii ma tamaitai agavaa i le malumalu.

Ma le faamaoni lava,
Barbara Morgan Gardner

FAAMATALAGA

- Russell M. Nelson, "Auauna Atu i le Mana ma le Pule a le Atua," *Liahona*, Me 2018, 69.



Auala e Sili Ona
Faigofie e Faasoa
atu ai le Molimau

8



Aoaoina o se Ala Fou e Aoao Ai
Au Peresitene Aoao o le Aoga Sa

26

5 O Le Faapogai o le Pule o le Perisitua ☺

O le ala ua tatou maua ai le perisitua i le Ekalesia i ona po nei.

6 O Ata o le Faatuatua: Jason ma Jackie Wong—Hong Kong, Saina ☺

E matuai taua lava le Atua i la tatou sootaga. Ana leai o la, semanu ua ma tetea!

8 Mataupu Faavae mo le Auaunaga: Auala e Faigofie ai ona Faasoa atu le Molimau

O le faasoa atu o lau molimau i upu faigofie, i aso uma e mafai ona faia se eseesega tele.

12 Punaoa o le Filemu ma le Mana

Saunia e Elder Carlos A. Godoy

Pe a le aoga uma isi punaoa o le malosi, e mafai ona tatou faalagolago ia Keriso.

16 O lau Malaga e le Mailoa i le Olaga Faitino

Saunia e Elder Dieter F. Uchtdorf

Atonu o ni vaega o lou olaga e le mafai ona fesootai i le taimi nei, ae afai e te talitonu i le Alii ma faia le mea sili e te mafaia, i se aso o le a e vaai ai pe faapefea ona fesootai uma na vaega.

26 Sau, Mulimuli Mai ia te Au: Aoaoina o se Ala Fou e Aoao Ai

Saunia e le Au Peresitene Aoao o le Aoga Sa

O nei mataupu faavae e lima e mafai ona taiala ai i tatou e aoao atili mai ma aoao atu le talalelei.

30 O Leo o Le Au Paia o Aso e Gata Ai: ☺

Tuu i luga ma ave i lalo nofoa; usuusu se pese i le galuega; leiloa lo'u aiga i le pogisa; faaee mai lana pu ma faaemoemo mai moli ia te au.

34 Sootaga o Afafine o le Atua i Lona Mana o le Perisitua

Saunia e Barbara Morgan Gardner

E mauaina e tamaitai faamanuiaga uma lava o le perisitua ia e pei o alii, ma o le ala lenei.

☺ Faitauga Vave

I Le Faavaa
Ata na saunia
e Matt Reier.

**Vaega****Autalavou Matutua**


42

Aoao i ala e mafai ona saunia atili ai, mala-malama, ma tau-sia au **feagaiga o le malumalu**.

**Autalavou**

50

Mauaina pe faapefea e **tala faasolopito o aiga, sueina o tali i fesili**, ma le maitauina of tamai **vavega e mafai ona faamanuia-inia ai lou olaga!**

**Tamaiti**

Saili i auala e mafai ona **faapei atili ai o lesu** e ala i le tatalo ma le alofa atu i isi!



SAILI NISI MEA

I le polokalama o le Potutusi o le Talalelei [Gospel Library] ma i le liahona.lds.org, e mafai ona e:

- Maua ai le lomiga lenei.
- Maua ai na'o anotusi faatekinolosi.
- Sailia lomiga ua mavae.
- Auina mai au tala ma manatu faaalia.
- Totogi [se lomiga] pe tuu atu se meaalofa o le totogi o se lomiga.
- Faaleleia au suesuega i meafaigaluega faatekinolosi.
- Faasoaa atu tusiga ma vitio e sili ona e fiafia i ai.
- Sii mai pe lolomi ia tusiga.
- Faalogologo i tusiga e sili ona e fiafia i ai.

FAAFESOOTAI MAI I MATOU

Imeli mai au fesili ma manatu faaalia i le liahona@ldschurch.org.

Ia auina mai au tala e faatupu faatuatua i le liahona.lds.org pe lafo mai i le:

Liahona, floor 23
50 E. North Temple Street
Salt Lake City, UT 84150-0023, USA

E NA'O TUSIGA FAATEKINOLOSI E FAAALIA AI



Tioata Vali i le Nofoaga Autu mo Tagata Asiasi o Roma

Saunia e Heather White Claridge ma Chakell Wardleigh

O le tagata autu o faatufugaga o le na fesoasoani e fatu le tioata vali i le Nofoaga Autu mo Tagata Asiasi Mai o le Malumalu i Roma Italia ua faamatala mai le taua ma le faatusa o lenei ata.



Mafuaaga e 5 e Tatau ai ona Auai Tagata Nofofua i Faamauga i le Malumalu

Saunia e Alex Hugie

O le auai i sauniga faamau o se aafiaga musuia mo tagata uma ua maua faa-eega paia, e aofia ai i latou e nofofua.



Ua Lava le Lelei mo le Malumalu?

Saunia e Zariah Inniss

Ua aoao se talavou matua mai Barbados e le tuua seia atoatoa o ia e agavaa ai e ulu i le malumalu.

MATI 2019 VOL. 43 NU. 3
LIAHONA 18603 890

O le mekasini faavaomalo o le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M. Nelson, Dallin H. Oaks, Henry B. Eyring

O le Korama a Apostolo e Toasefulula: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Faatonu: Randy D. Funk

Faufautua: Brian K. Ashton, Randall K. Bennett, Becky Craven, Sharon Eubank, Cristina B. Franco, Donald L. Hallstrom, Larry S. Kacher, Erich W. Kopischke, Lynn G. Robbins

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Francisca Olson

Au Tusitusi ma Faatonutonu: Maryssa Dennis, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Jon Ryan Jensen, Charlotte Larcabal, Michael R. Morris, Eric B. Murdock, Sally Johnson Odekirk, Joshua J. Perkey, Jan Pinborough, Richard M. Romney, Mindy Selu, Chakell Wardleigh, Marissa Widdison

Pule Faatonusili o Faatufugaga: J. Scott Knudsen

Faatonusili o Faatufugaga: Tadd R. Peterson

Mamanu: Jeanette Andrews, Fay P. Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinckley, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, sBrad Teare, K. Nicole Walkenhorst

Faatonu o le Puletaofia o Meatotino: Colette Nebeker Aune

Pule i le Gaosiga: Jane Ann Peters

Gaosiga: Ira Glen Adair, Julie Burdett, Thomas G. Cronin, Bryan W. Gygi, Ginny J. Nilson, Marissa M. Smith

Tailolomi: Joshua Dennis, Ammon Harris

Faatonusili Lomitusi: Steven T. Lewis

Faatonusili o Faletusi: Troy R. Barker

Mo le okaina o mekasini, ali u le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopu. Totogi mo le Tausaga Atoa \$6.60 (Samoa).

Auina atu tusitisiga ma faafesi

i lugu o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi

a Mamona o le "tapasa" po o se "faatonutonu") e lomia i le faa-Alepania, Aminia (Sasae), Pisilana, Palekeria, Kemupota, Sepuanu, Saina, Kalaotia, Siekisolvakia, Tenimaka, Take, Igilisi,

Estonia, Fit, Finelani, Farani, Siamani, Eleni, Hankeri, Initu, Iselani, Intonesia,

Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafagofeina), Silovenia, Sipaniolo, Suetena, Swahili, Tagaloka, Tahiti, Tai, Toga, Lukureini, Urutu, ma Viatename. (E eseese lava gagana.)

© 2019 Puletaofia e le Intellectual Reserve, Inc. Ua taofia aia tatau urua. Lomia i le lunaite Setete o Amerika.

Faamatlagata o le Puletaofia: Vagana ua faailoa mai, e mafai e tagata taitoatasina ona kopu anomea mai le *Liahona* mo lo latou lava faaaogaina patino, e le faia ai ni pisinisi (e aofia ai valaauga o le Ekalesia).

O lenei aia tatau e mafai ona faaleaogaina i soo se taimi. E le tatau ona kopuina ia ataa pe afai o loo faaalia le faasaina i le laina o faaaloaloa faatasi ai ma le faatufugaga.

Ia auina mai fesili e uiga i le puletaofia i le Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

Mo le Aufaitau i le lunaite Setete ma Kanata: March 2019 Vol. 43 Nu. 3.

LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store.lds.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2). **NONPOSTAL**

AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



O LE FAAPOGAI O LE PULE O LE PERISITUA

Ole perisitua o le mana ma le pule a le Atua, lea na la tuuina mai ia te i tatou e faia ai Lana galuega o le faaolataga (tagai *Tusitalima 2: Taitaiga o le Eklesia* [2010], itulau 8.) Na tuuina atu e le Alii Lana perisitua i auauna filifilia talu aso o Atamu. Ona o le perisitua e tuuina atu i alii agavaa e ala i le faaee atu o lima ma o loo tausia se faamaumauga o na faauuga, o i latou o lo o umia le perisitua e mafai ona sue lo latou laina o le perisitua i tua e oo ia losefa Samita, o le na mauaina le Perisitua Mekisateko i Aposetolo a lesu Keriso.

1. Peteru, Iakopo, ma Ioane

I le taimi o Lana galuega talai i le lalolagi, na tuuina atu ai e lesu Keriso Lana pule faaiperisitua i Ana Aposetolo, e aofia ai Peteru, Iakopo, ma Ioane (tagai Mataio 10).


2. Iosefa Samita ma Oliva Kaotui

I le aso 15 o Me, 1829, na faaali ai Ioane le Papatito ia Iosefa Samita ma Oliva Kaotui e tuuina atu ai ia te i laua le Perisitua Arona. I ni nai vaiaso mulimuli ane, na tuuina atu ai e Aposetolo anamua o Peteru, Iakopo, ma Ioane ia Iosefa Samita ma Oliva Kaotui le Perisitua Mekisateko (tagai Mataupu Faavae ma Feagaga 27:12; 128:20; *Aoaoga a le Perofeta o Iosefa Samita*, fili Iosefa Filitia Samita [1976], 81, 101).



3. Aposetolo ma Taitai o Aso e Gata Ai

Na tuuina atu e le Perofeta o Iosefa Samita le perisitua i isi alii agavaa, o e, i lalo o le taitaiga a le Perofeta, na tuuina atu i isi alii agavaa, ma faapena ai lava, seja oo mai i aso nei.



KI O LE PERISITUA

O KI O LE PERISITUA O LE
PULE LEA UA TUUINA MAI E
LE ATUA I TAITAI PERISITUA E
FAATONU AI LE FAAOGAINA
O LANA PERISITUA

i luga o le fogaelele, e aofia ai le ala e tuuina atu ai le perisitua mai le tasi perisitua i le isi. Mo se faataitaiga, ua na o se epikopo, o le umia ki o le perisitua mo lana uarota, e mafai ona faatagaina se tama po o se alii talavou i lana uarota e mauaina le Perisitua Arona. Ia Aperila i le 1836, na maua ai e Iosefa Samita ki taua o le perisitua mai ia Mose, Elaia, ma Elia i le Malumalu o Katedani (tagai Mataupu Faavae ma Feagaiga 110). ■

LAINA O LE PULE O LE PERISITUA

Ina ia maua lou laina o le perisitua, lafo se meli i le lineofauthority@ldschurch.org, ma mataitusi PLA i le laina o le mataupu (maua i le Igilisi, Potukale, ma le Sipaniolo).

Ina ia aoao atili e uiga i le perisitua, tagai i le "Fesootaiga o Afafine o le Atua i Lona Mana o le Perisitua" i le itulau e 34.





Jason ma Jackie Wong

Hong Kong, Saina



O manatu i matafaioi o itupa e esese mamao lava mai i lea aganuu i lea aganuu, ae o le luitau o le mafuta faatasi o ni tagata faatoa faaipoipo e foliga mai e tutusa lava. Na aoaoina e Jason ma Jackie ni lesona taua ao la galulue faatasi.

LESLIE NILSSON, TAGATA PUEATA

Jason:

Na ou tuputupu ae ma le mafaufau o teine e tatau ona faia uma feau i le fale. Na vave lava ona ou iloaina e le o le mea moni lena. Sa pisi tele Jackie ma na vevesi tele i lana galuega. Ao ou vevesi foi au ia, na ou iloaina ua tatau ona ou amata ona faia se mea e sili atu e fesoasoani ai.

Jackie:

O le avea ma se tagata faatoa faaipoipo o se suiga. O le mea moni lava, o le Atua e tulagaese lava le taua i totonu o lo ma sootaga. Ana le seanoa le Atua, semanu ua ma tetea!

Jason:

Na ma iloaina sa ma manaomia ona faalu le tele o le taimi e faatasi ai. O le taimi la lenei ma te faia ai feau i le fale faatasi. E fesoasoani lenei mea ia i maua e faia ai feau uma, ma ua mafai ai ona ma faatasi le tasi ma le isi.

Jackie:

Ma te taumafai foi e faaavanoa le taimi i afiafi e talanoa ai e uiga i lo ma aso; ona ma tatalo lea ma faitau tusitusiga paia ae ma te lei momoe. O le ola ai i le talalelei ua faamunuiaina ai le ma faaipoipoga.

SAILI NISI MEA

Ua molimau mai Peresitene Russell M. Nelson i faamanuiaga o le faaipoipoga faaselesitila i le lds.org/go/031906.

Saili punaoa e faamalosia ai lau faaipoipoga ma le aiga i le lds.org/go/031907.

Saili isi "Ata o le Faatuatua" i le Potutusi o Ala o Faasalalauga i le lds.org/go/18.

Mataupu Faavae mo le Auaunaga

AUALA E **SILI** ONA FAIGOFIE E
FAASOA ATU **AI LE MOLIMAU**



O LE AUAUNAGA O LE MOLIMAU ATU LEA.

O LE FESUISUIAI O LE AUAUNAGA E MAFAI ONA FAATELEINA A TATOU
AVANOA E FAASOA ATU AI LE MOLIMAU I AUALA ALOAIA MA LE ALOAIA.

Ua tatou osi feagaiga e “tutu o ni molimau a le Atua i taimi uma ma i mea uma, ma i nofoaga uma” (Mosaea 18:9). O le faasoai atu o a tatou molimau o se vaega o le tu atu o se molimau ma o se ala mamana e valaaulia ai le Agaga Paia ia pai atu le loto o se tasi ma suia o latou olaga.

“O le molimau—molimau moni lava, e tuuina mai i le Agaga ma faamaonia e le Agaga Paia—e suia

ai olaga,” na saunoa ai Peresitene M. Russell Ballad, Sui Peresitene o le Korama a Aposetolo e Toasefululu.¹

Ae o le faasoaina atu o a tatou molimau e mafai ona taufaafefe ma le manaia mo nisi o i tatou. Atonu ona tatou te manatu o le faasoaina atu o la tatou molimau o se mea tatou te faia i sauniga anapogi ma molimau po o se taimi foi e aoao atu ai se lesona. I na tulaga aloaia e masani

ona tatou faaaogaina ni upu faapitoa ma fuaitau na e foliga mai e le fetaui i talanoaga masani.

O le faasoaina atu o a tatou molimau e mafai ona avea o se faamunuaga e sili atu ona oo soo mai i o tatou olaga ma olaga o isi pe a tatou malamalama i le faigofie tele ona mafai ona faasoai atu mea tatou te talitonu i ai i tulaga o aso uma. O nai faataitaiga nei e te amata ai.

Ia Faafaigofie

O se molimau e le manaomia ona amata i se fuaitau, “Ou te fia tuuina atu lau molimau,” ma e le manaomia ona faaiu i le, “i le suafa o Iesu Keriso, amene.” O se molimau o se faailoaga o mea tatou te talitonu i ai ma iloa e moni. O lea la o se talanoaga ma sou tuaoi i le auala e uiga i se faafitauli o loo ia te ia ma faapea atu, “Ou te iloa e tali mai le Atua i tatalo,” e mafai lava ona mamana e pei o se isi lava molimau e faasoai mai le pulelai i le lotu. E le oo mai le mana mai gagana e tauteuteu; e oo mai le Agaga Paia e faamautuina le upu moni (tagai Mataupu Faavae ma Feagaiga 100:7–8).



Faafetaui le Gasologa o le Talanoaga Masani



Afai tatou te naunau e faasoai atu, e tele avanoa o loo siomia ai i tatou e faafetaui ai le molimau i talanoaga o aso uma. Mo se faataitaiga:

- Ua fesili atu se uo ia te oe e uiga i lou faaiuga o le vaisao. “Sa maoae,” e te tali atu ai. “O le lotu o le mea tonu lava lea na ou manaomia.”
- Ua faaleo mai e se tasi le alofa ina ua faalogo i se luitau o lou olaga: “Ua ou faanoanoa lava.” E te tali atu:


“Faafetai lava mo lou manatu mai. Ua ou iloa e fesoasoani mai le Atua ia te au. Na i ai o Ia iina mo au muamua.”

- Ua faapea mai se tasi: “Ou te faamoemoe o le a vave ona suia lea tau leaga tele,” po o “E mautinoa lava ua tuai le pasi,” po o “Vaai ia i lenei laina o taavale.” E mafai ona e tali atu: “Ou te mautinoa o le a fesoasoani mai le Atua ina ia lelei mea uma.”

O Le Faataitaiga a le Faaola

Na vaivai mai se malaga e ala atu i Samaria, na koma ai le Faaola e malolo i se vaieli ma feiloi ai ma se fafine iina. Na ia amataina se talanoaga e uiga i le asuina o le vai mai le vaieli. I le faaaogaina o lenei galuega o aso uma na faia e le fafine na tuuina atu ai ia Iesu le avanoa e molimau atu ai i le vai ola ma le ola e faavavau o loo avanoa ia i latou e talitonu ia te Ia (tagai Ioane 4:13–15, 25–26).





la Saunia

uiga o le faamoemoe o loo ia te i [tatou]" (1 Peteru 3:15).

Muamua, o le saunia e mafai ona faauigaina o le vaai atu i le ala o loo tatou ola ai. Pe o tatou valaaulia ea le Agaga Paia i o tatou olaga ma faamalolosia a tatou lava molimau i aso uma e ala i le ola amiontonu? Pe o tatou tuuina atu ea avanoa e fetalai mai ai ia i tatou ma tuuina mai ia i tatou upu tatou te manaomia e ala i le tatalo ma le suesue i tusitusiga paia? E pei ona fautuaina ai Ailama Samita e le Alii, "Aua le saili e talai atu la'u upu, a e muai saili ia maua la'u upu, ona mataala ai lea o lou laulaufaiva" (Mataupu Faavae ma Feagaiga 11:21).

Lona lua, o le saunia e mafai ona faauigaina o le vaai atu i luma ma mafaufau i avanoa e mafai ona e maua i lena aso po o lena vaiaso e faasoat atu ai lau molimau. E mafai ona e saunia mo na avanoa e ala i le mafaufau e uiga i le ala latou te tuuina atu ai ia te oe se avanoa e faasoat atu ai mea e te talitonu i ai.



Faasoat Ou Aafiaga

E masani ona tatou talanoa e uiga i o tatou luitau. Pe a tau atu e se tasi e uiga i mea o loo latou feagai, e mafai ona e faasoat atu se taimi na fesoasoani ai le Atua i ou faigata ma molimau atu e te iloa e mafai ona fesoasoani foi le Atua ia i latou. Na fetalai mai le Alii Na te faamalosia i tatou i o tatou faigata "ina ia mafai ona outou tutu e avea o ni molimau mo a'u i le lumana, ma ina ia mafai ona outou iloa ma le mautinoa o A'u, o le Alii le Atua, e asiati atu i o'u tagata i o latou puapuaga." (Mosaea 24:14). E mafai ona tatou tutu o ni molimau ia te Ia pe a tatou molimau atu i le ala na ia fesoasoani ai ia i tatou i o tatou faigata.



Ia Tumau le Faatotonugalemuina i le Faaola ma Lana Aooga Faavae

Na aoao mai Peresitene Ballard, "E ui ina mafai ona tele mea e mafai ona tatou molimau ai, o ni tagata o le Eklesia, ae e i ai lava upumoni faavae e tatau ona aoao atu ai e le tasi le isi ma fetufaai ma i latou." O ni faataitaiga, na ia lisina: "O le Atua o lo tatou Tama Faavavau, ma o Iesu o le Keriso. O le ata o le faaolataga e totonugalemu i le Togiola a le Faaola. Na toefuatai mai e Iosefa Samita le atoaga o le talalelei faavavau a Iesu Keriso, ma o le Tusi a Mamona o le faamaoniga lea e moni la tatou molimau." Ao tatou faaleo atu na upumoni loloto, tatou te valaaulia le Agaga e molimau atu o mea na tatou tau atu e moni. Na faamamafa mai e Peresitene Ballard faapea "e le mafai ona taofia le Agaga pe a tuuina atu le molimau mama atoatoa e uiga ia Keriso."²



E Mafai E Se Molimau Faigofie Ona Suia Olaga

Na faamatala e Peresitene Russell M. Nelson se tamaitai tausi soifua lea na fesili atu ia Dr. Nelson-i le taimi lea, se fesili i le mavae ai o se taotoga faigata. "Aisea e te le pei ai o isi fomai tipitipi?" O nisi fomai tipitipi na te iloaina e mafai ona itaita gofie ma palauvale ao latou faatinoina na ituaiga o galuega faigata.

Na mafai ona tali atu Dr. Nelson i le tele lava o auala. Ae na ia tali faigofie atu lava, "Aua ua ou iloa e moni le Tusi a Mamona."

O lana tali na uunaia ai le tamaitai tausi soifua ma lona toalua e duesue le Tusi a Mamona. Na papatiso e Peresitene Nelson mulimuli ane le tamaitai tausi soifua. I le fiasefulu tausaga mulimuli ane, ao pulefaamalumalu i se konafesi a se siteki i Tenesi, ISA, o se Apostolo faatoa faauuina, na olioli Peresitene Nelson i se faatasiga faafuasei ma le tamaitai tausi soifua lava lea. Na ia faamatalaina lona liliu mai, na oo mai i lana molimau faigofie lava ma le faatosinaga o le Tusi a Mamona, na fesoasoani e taitai atu i le liua o le isi 80 tagata.³

Valaaulia e Faatino

Aua le fefe e faasoa atu lau molimau. E mafai ona faamanuiaina ai i latou e te auauna atu i ai. E faapefea ona e faaaogaina nei manatu po o ou lava manatu e faasoa atu ai lau molimau i le aso? ■

FAAMATALAGA

1. M. Russell Ballard, "Molimau Mama Atoatoa," *Liahona*, Nov. 2004, 41.
2. M. Russell Ballard, "Molimau Mama Atoatoa," 41.
3. I le Jason Swensen, "Be Ready to Explain Your Testimony Using the Book of Mormon, President Nelson Says," Church News section of LDS.org, Feb. 6, 2018, news.lds.org.



O tusiga "O Mataupu Faavae o le Auaunaga" ua faamoemoe e fesoasoani ia i tatou e aoao e fetausia'i ai le tasi ma le isi—ae aua ne'i faasoaina atu o se savali i le taimi o asiasiga. A o tatou iloaina i latou tatou te auauna atu i ai, o le a uunaia i tatou e le Agaga Paia ia iloa po o le a le savali latou te ono manaomiaina e faoopoopo atu i la tatou tausiga ma le agaalofa.


FAASOA OU AAFIAGA

Auina mai ou aafiaga ia i matou a o e auauna atu i isi pe na e mauaina ni auaunaga. Alu i le liahona.lds.org ma kiliki le "Submit an Article po o Feedback."



E mafai
faapefea
ona tumau
i le filemu,
matafiafia, ma
le malosi e o
loo feagai ma
luitau?





Saunia e Elder
Carlos A. Godoy
O Le Au Peresitene
o Fitugafulu

Punaoa o le Filemu ma le Mana

Ose tasi o aafiaga e sili ona loloto na ou oo i ai o se Pulega Aoao o le auauna lea i Au Paia pele i Venesuela. O tagata iina, e aofia ai tagata o le Eklesia, e nonofo tulaga faigata. E ui i lea, e ui ina i ai lea mea moni, sa mafai foi ona ou vaai, i au asi-asiaga masani i le atunu, sa i ai lava se eseesege o tagata lautele ma le Au Paia o Aso e Gata Ai.

O le Aafiaga FaaVenesuela

O le Au Paia i Venesuela o loo faia lea mea sili latou te mafaia. E moni e toatele o loo mafatia ma tauivi, ma o loo tinou le Eklesia i le lagolagoina o i latou o e moomia le fesoasoani e ala i tupe o le taulaga anapogi, polokalama o le uelefea, ma taumafaiga amata o le ola tutoatasi. Ae ao faigofie ona mafai ona maua e le Au Paia mafuaaga e faanoanoa ai, e aofia ai ma luitau uma o lo o latou feagai ai, o i latou o ni tagata fiafia—o lo o filemu ia i latou lava, e tele lava ina ataata, ma faamoemoe mo aso lelei i luma atu.

E moni lenei mea mo le autalavou o le Eklesia i Venesuela. O o latou luitau faaletagata ma faaleaiga o loo faamalosia atili ai i latou ma saunia ai i latou mo le lumanai. E moni foi lenei mea mo a tatou faifeatalai Venesuela. E tatau ona latou malolosi mo i latou lava, mo a latou tagata sailiili, ma mo o latou aiga. Ma o loo latou faia. Latou te faamanatu mai ia i latou le autau

talavou e 2,000 a Helamana. E ui ina itiiti i fainumeria, ua latou “matuā totoa i le lototetele” (tagai Alema 53:20–21). O loo saunia e le Alii se augatupлага o tina, tama ma taitai malolosi i Venesuela. Soo se taimi lava ma te i ai i le lotolotoi o le Au Paia iina, ma te mauaina le faatumulia o i maua i le faatuatua i le talalei ma i le lumanai.

Filemu i Taimi o Puapuaga

E mafai faapefea ona tumau pea i le filemu, matafafia, ma le malosi, e o lo o feagai ma na luitau? Ou te talitonu o le mea o lo o tupu i le toatele o i latou ua amata ona latou faalagolago atili atu i le Atua. O se taunuuga, o lo o latou maua le malosi mai le punaoa o le malosi uma. O lo o latou iloaina faamanuiaga ua latou maua mai i le Tama Faalelagi, ua latou faalagolago i le mana o Iesu Keriso ma Lana Togiola, ma o lo o faamafanafanaina, lagolagoina, ma faamalosia e le Agaga Paia. O se taunuuga, e faamamaina atili a latou avega, o o latou mafatiaga e fofoina, ma latou te maua le filemu i le totonugalemu o o latou tofotofoga.

O tagata o le eklesia i Venesuela o lo o aafia i se faataitaiga faaonaponei o le mea na tupu ia Alema ma ona tagata i le Tusi a Mamona:

“Ma o lenei sa oo ina faamamaina avega sa tuu i luga o Alema ma ona uso; ioe, sa faamalosia i latou e le Alii ina ia mafai ona latou tauave ma le faigofie a latou avega, ma sa latou gauai atu ma

O le Au Paia i Venesuela o ni tagata fiafia—ua malilie ia i latou lava, e tele ina ataata, faamoemoe i aso lelei i luma atu.


le fiafia ma le onosai i le finagalo atoa o le Alii” (Mosaea 24:15).

O Le Mana Faaola o Iesu Keriso

O lau molimau i le finagalo o le Atua e faamunuaina i tatou ua faamalosia atili i le faaalu ai o le taimi e faatasi ma tagata o le ekalesia i Venezuela. I le aafiaga o Alema ma e na mulimuli ia te ia, o le Au Paia i Venezuela ua faamalosia, ma o le faatele ai o lo latou alualu i luma ua faamainai ai avega ua latou tauaveina. Ua valaaulia i tatou e le Faaola e o atu ia te Ia pe a i ai ni a tatou avega mamafa, ma o le a tatou maua le malologa (tagai Mataio 11:28–30). O nei tagata

- Pe o tatou tepe atu i le Atua e fesoasoani mai ia i tatou e manumalo mai i na taimi faigata?
- Pe o tatou naunau ea e totogi le tau e avea ai ma se tagata sili atu ma atinaeina uiga faaKeriso ua alagatatau mo lo tatou alualu i luma?
- Ua tatou malamalama e ala atu i le mana o le Togiola a le Faaola, tatou te maua ai le malosiaga ma le faamoemoe?

E faapefea ma aisea e mafai ai e le Faaola ona tuuina mai lena faamafanafanaga ma le mana? Ua tau mai e tusitusiga paia ia i tatou: “Ma o le a



O se tasi o auala latou te tumau ai i le malosi o le faalogo lea i fautuaga a perofeta ma apostolo, e pei ona faia e nei Au Paia ina ua saunoa atu Elder Quentin L. Cook i Caracas, Venezuela, i le 2013.

o le ekalesia lelei ua faamalosia e tauave a latou avega i le malosi o le Alii.

E avea ma taunuuga o o latou tofotofoga, ma se faamanuiaga mo le tuu atu o lo latou faatuatua i le Faaola ma Lona alofa mutimutivale, ua latou maua ai se suiga i le loto ma ua taitoatasi i latou ua avea “e pei o se tamaitiiti e usiusitai, agamalu, lotomaualalo, onosai, ma tumu i le alofa, loto ima usitai uma ua silafia e le Alii e tatau ona faao mai i ona luga, e pei ona usitai atu se tamaitiiti i lona tamā” (Mosaea 3:19).

I le otootoga, e ala i tofotofoga ua latou atinae ai amioga faaKeriso ua faamoemoe soo uma o Keriso ia maua.

O le a le mea ua tupu ia te i latou o le mea tonu foi lea e tatatu ona tupu ia te i tatou taitoatasi. O le a tofu i tatou uma ma luitau ma tofotofoga i o tatou olaga. A tatou oo i ai, e tatau ona tatou faapea ifo ia i tatou lava:

afio atu o ia, ma mafatia i tiga ma puapuaga ma faaososoga o ituaiga eseese uma; ma o le a oo ia te ia nei mea, ina ia mafai ona faataunuina o le upu ua fai mai, o le a ia ave i ona luga tiga ma ma’i o ona tagata.

“Ma o le a ia ave i ona luga le oti ina ia mafai ona ia tatalaina fusi o le oti ia ua noatia ai ona tagata ma o le a ia ave i ona luga o latou vaivaiga ina ia mafai ona faatumuina lona loto i le alofa mutimutivale e tusa ai ma la le tino ina ia mafai ona ia silafia e tusa ai ma la le tino le ala e fesoasoani ai i ona tagata e tusa ma o latou vaivaiga” (Alema 7:11–12).

O Io o Silafia e le Alii

E pei ona aoao mai e Elder David A. Bednar o le Korama a Apostolo e Toasefululu, “Na puapuagatia le Faaola e le mo na o a tatou agasala ae faapea foi mo le le tutusa, o le



*O le amo e faatagaina
ai manu e toso faa-
tasi ma le malosi, e
pei lava ona fesootai
e le amo a lesu Keriso
i tatou i Lana mana
faaola ma gafatia*

amioletonu, o le tiga, o le ita, ma le faavauvau faalelagona lea e masani ona tatou pagatia ai. E i ai le taimi o o tatou vaivaiga tatou te alalaga atu ai, ‘E leai se tasi e malamalamama. . . . E leai se tasi e iloa.’ Atonu e leai se tagata soifua na te iloa. Peitai o le Alo o le Atua na te silafia ma malamalamama lelei lava, aua sa Ia lagonaina ma tauave a tatou avega ona faatoa tatou oo lea i ai. Ma talu ai ua uma ona Ia totogia le tau atoa ma tauave lena avega, ua Ia malamalamama lelei ai lava ma mafai ona faaloaloa mai Lona aao o le alofa mutimutivale i le tele o itu o o tatou olaga” (“O Le Togiola ma le Malaga i le Olaga Faitino,” *Liahona*, Ape. 2012, 19).

Ona sii mai lea e Elder Bednar lenei mau, lea e fesoasoani ia i tatou e malamalamama ai faapea o le Togiola a Iesu Keriso, e mafai ona maua ai e i tatou taitoatasu le filemu:

“Ia outou o mai ia te au, outou uma o e tigaina ma mafatia i avega, o au foi e malolo ai outou.

“Ia outou amoina la’u amo, ma ia outou faaa’oa’o ia te au, aua o au lē agamalu ma le loto maulalo, ona maua lea e outou o le malologa mo outou agaga.

“Aua e avegeofie la’u amo, o la’u avega foi e mama ia” (*Mataio* 11:28–30).

E fia faaopoopo atu lau molimau i upu a Elder Bednar. Ua ou iloa foi e ala i aafiaga faaletagata lava ia e mafai ona tatou maua le malosi ma le filemu i aao agaalofa o lo tatou Faaola. O le mana faaola ma gafatia o le Faaola e le na o se punaoa o le faamagaloina o a tatou agasala, ae o se punaoa maoae o le faamoemoe, filemu, malosi, mafanafana, taleni, musumusuga, ma mea uma ua tatau ai e fesoasoani ia te i tatou e ala atu i la tatou faigamalaga i lenei olaga ma manumalo

ai. E mafai moni lava ona tatou faalagolago “i galuega, ma le alofa mutimutivale, ma le alofa tunoa o le Mesia Paia” (2 Nifae 2:8).

O Io Tatou Lava Faaaogaina i le Olaga


E mafai faapefea ona tatou maua lenei punaoa o le malosi? O le a le mea e tatau ona tatou faia e maua ai le fesoasoani tatou te manaomia?

Muamua, e tatau ona ia i tatou le faatuatua i le Alii o Iesu Keriso ma Lana Togiola. E tatau ona tatou malamalamama o Ia ma Lona Tama o punaoa o le filemu ma le mana. Latou te faia mea uma ia mafai ona faataunu.

Ona, tatau lea ona tatou galulue ma faia le mea sili tatou te mafaia i soo se mea o tatou feagai ai. Atonu o loo tatou galulue e foia se vaivaiga, sailia o se toomaga mai le puapuaga, pe o tauivi foi e atinaeina se taleni. E ui ina pei e le lava a tatou taumafaiga silisili i nisi o taimi, afai tatou te tuuina atu moni lava le mea sili, o le a faamanuia mai tatou e le Alii i Lona alofa mutimutivale i mea tatou te manaomia.

“Ao faasolo ina malamalamama oe ma au ma faagalue le mana galue o le Togiola i o tatou olaga patino,” na faapea mai ai Elder Bednar, “o le a tatou tatalo ma saili mo le malosi e sui ai o tatou tulaga nai lo o le tatalo mo o tatou tulaga ia suaia. O le a avea i tatou ma sui e galulue nai lo o ni mea faitino e taugalueaina (tagai i le 2 Nifae 2:14)” (“The Atonement and the Journey of Mortality,” *Liahona*, 16).

E tatau foi ona tatou manatua pe a fai o faia lo tatou vaega, o loo i ai le Alii i o tatou autafa. O lo tatou vaega o le taua e le faapea e moomia ona tau toatasi. O le a ia faatasi mai ia i tatou, mai le amataga e oo i le faaiuga. Ou te molimau o upu o Isaia e moni: “Aua o a’u le Alii lou Atua o le ua taofi lou lima taumatau, o le ou fai atu ia te oe, Aua e te fefe; o au o le a ou fesoasoani ia te oe” (*Isaia* 41:13). E moni lenei mea mo Au Paia i Venesuela, ma e moni mo Au Paia i soo se mea i le lalolagi. ■





Saunia e Elder
Dieter F. Uchtdorf
O Le Korama
a Aposetolo e
Toasefululua

O Lau Malaga e le Mailoa i le Olaga Faitino

Talitonu—ma o le a faatasi le Atua ma oe. Ia ua'i atu lou loto ia te Ia—ma o le a Ia taiala oe i lau faigamalaga.

Mai se faigalotu i le lalolagi mo talavou matutua, "O Lau Malaga e le Mailoa i le Olaga Faitino," na tuuina atu e Elder Dieter F. Uchtdorf ma Sister Harriet Uchtdorf i le Nofoaga Autu mo Konafesi i le aso 14 o Ianuari, 2018.

E lelei le i ai ma outou i le aso ma lagona lo outou agaga, la outou malosi, la outou naunautai. Ua ou fafia ua tatou maua se avanoa e faalogologo atu ai ia Sister Uchtdorf. O Harriet o le lasusulu o lo'u olaga. Ua silafia uma e tagata o ia, ma alolofa ia te ia. O ia le ituaigna o tagata na te faaleleia ma faafiafaina atili i latou o sio-miaina o ia. O ia moni lava o le faatosinaga ia te au.

O lea faatoa uma ona faamanatu le 55 tausaga o le ma faaipoipoga. A ma vaavaai atu i le ma fanau e toalua ma o la taitoalua, a ma fanau a fanau e toaono ma o latou aiga, ma le ma fanau a fanau a fanau e toafa, ma te maofa lava i le maoae tele o le malaga o la ma olaga.

O Le Vaitau o Tali Vave

Sa oo mai se manatu mata'ina ia te au a o ou saunia mo lenei faasalalauga. Ioe, e moni, o tausaga a o 18 i le 30 ou tausaga sa seasea iloa atu i le faaata i tua ae e ui i lo'u matua o i ai nei, o loo ou lagonaina pea le talavou i totonu. O le mea moni, o le toatele o i tatou o tagata matutua e manatu ia i tatou lava o ni tagata talavou ua leva ona ola mo se taimi umi.

A outou vaavaai mai ia i matou, o le "tupulaga matutua," e mafai ona e maofa i le tele o mea tatou te tutusa ai ma la outou tupulaga nai lo le mea e te ono manatu i ai. Ou te talitonu o eseesega i le va o fanau a le Tama Faalelagi, po o le a lava lo latou matutua, e ititi lava e faatususa i tulaga e tutusa ai. Mo se faataitaiga, e toatele outou o loo i ai fesili e uiga i le Atua ma oe lava ia—fesili loloto, ma taua ia e talitutusa ma fesili ai tagata e matutua atu ia te outou:



"O le mauaina o tali [faalelagi] e tele ina manaomia ai le ositaulaga, galue, ma le onosai," na saunoa ai Elder Uchtdorf, o loo i ai i le ata ma Sister Uchtdorf ma autalavou matutua i le Maota Autu mo Konafesi.

“O i ai moni ea se Atua? E alofa ea o Ia?”

“Pe o ou i ai ea i luga o le ala sao?”

“Aisea ou te lagona ai i nisi taimi le leai o se faamoemoe, lofituina, le amanaiaina, po o le tuuatoatas?”

“Aisea e le o faatosinaina ai e le Atua lo’u olaga?”

“Aisea na le tali mai ai o Ia i se tatalo?”

“Aisea na Ia faatagaina ai au ia oo i lenei faanoanoa, ma’i, po o se faalavelave?”

E mafai ona avea nei fesili ma ni fesili e faigata ona taliina.

I lenei vaitau o tali vave—lea ua faigofie ai lava ona maua se malamalamā maoti ma lē mailoa i le Google—tatou te le fiafia ai i nisi taimi pe a tuai ona maua mai ni tali i a tatou fesili e sili ona patino, taua, ma faananati. Tatou te sii ae o tatou loto i le lagi ae na o le pau le mea e foliga mai o tatou maua o se “faailo (cursor) faatalitali” faaitatagata o loo taavilivili pea.

Tatou te le fia faatalitali.

A tatou faatalitali e sili atu ma ni nai sekone mo se sailiga i le initonetū e tali mai, tatou te ono manatu ua faaletonu pe ua motusia foi le fesootaiga. I lo tatou le fiafia, e ono tatou lafoaia ai lava le sailiga. Ae a oo mai i fesili e faavavau, o mataupu tau i le agaga, e tatau ona tatou onosai atili.

E le o tali uma e tutusa le taua. O tali e oo mai le poto faalelalolagi po o manatu taatele e faigofie ona oo mai, ae e vave lava ona mou atu lo latou

tauā pe a oso mai ni teori po o ni faiga fou. O tali faalelagi—tali e faavavau—e le mafaatauina. O le mauaina o nei tali e tele ina manaomia ai le ositaulaga, galue, ma le onosai.

O nei tali e aoga ai le faatalitali.

O lo’u faamoemoega i le asō o le ofo atu lea o la’u molimau mautinoa e silafia outou e lo outou Tama i le Lagi, e faafogofa mai o Ia ia te outou, ma o le a le tuulafoaiina lava outou. A gauai atu o outou loto ia te Ia ma taumafai e mulimuli i Ona ala, o le a i ai o Ia i o outou olaga ma taitai o outou ala a o outou faimalaga ai i lenei malaga e le mailoa maoae ma faafafiaina o le olaga faaletino.

Faafesootaiina o Vaega Togitogi o le Olaga

O se tasi o tagata fatufatua’imea maoae o o tatou taimi, o Steve Jobs o le Apple, sa i ai le manatu lenei: “E le mafai ona e malamalamā i mea o le a tutupu ia te oe i le lumanai; e faatoa e malamalamā lava i ai pe a vaai i tua ina ua mavae.


*Pe a tatou vaai i o tatou
olaga i le faavaa o le
talalelei a Keriso, e mafai
ona tatou amata vaaia
le auala e fesootai solo ai
togitogi eseese i o tatou
olaga.*

O lea la e tatau ona e faatuatuaina o mea o le a tutupu [togitogi] ia te oe i le lumanai o le a e malamalama i ai.”¹

O le a le uiga o lana saunoaga? I le faaiuga o le seneturi lona 19, na amata ai e tusiata e pei o Georges Seurat ma Paul Signac ona valiina ata i se sitaili fou na iu ina lauiloa o le neo-impressionism [ata togitogi]. O le la metotia sa i ai le togitogiga o atavali i ni togitogi ninii o lanu. A lata mai, e foliga mai ai nei togitogi e le fesootai ma salalau solo. Ae a e tagai i le atavali atoa, e mafai ona e vaai i togitogiga ua taatitia lelei i ni lanu ma le auala o le a fatu mulimuli ane ai ia lanu ma faaali mai ai se mamanu matagofie. O le mea sa foliga muamua mai sa salalau solo ma fenumiae ua amata ona malamalama i ai.

O nisi taimi e pei ai o tatou olaga o se atavali togitogi. O togitogi o lanu ia e fatu ai mea e tutupu ma taimi patino i o tatou aso e mafai ona vaaia le le fesootai ma le fenumiae i nisi taimi. Ua le mafai ai ona tatou vaaia se faatalugaga i na mea. Ua le mafai ai ona tatou mafaufauina pe o i ai so latou faamoemoega.

Peitai, a tatou toe laa i tua ma vaaai atu i se vaaiga e faavavau, a tatou vaaai i o tatou olaga i le faavaa o le talalelei a Iesu Keriso, e mafai ona tatou amata vaaia le auala e fesootai solo ai togitogi eseese i o tatou olaga. Atonu e le mafai ona tatou vaaia le ata atoa i lenei taimi, ae o le a lava mea tatou te vaaia e faatuatuaina ai o loo i ai se mamanu matagofie ma silisili. Ma a o tatou tauivi e faalagolago i le Atua ma Lona Alo, o Iesu Keriso, o le a i ai





E ao la ona e fesili ifo ia te oe lava ia, “O lava ea lo’u faatuatua e talitonu ai i le Atua? O o’u loto ea e faatuatuaina e alofa o Ia ia te a’u ma finagalo e faatonu o’u ala?”

se aso o le a tatou vaaia ai le fua faaiu, ma o le a tatou iloa ai sa taitaiina ma taialaina lava e le aao o le Atua a tatou laasaga.

O le a tatou iloa o le Agai o Tupu (Tufuga Sili) sa i ai se fuafuaga mo na togitogi salalau solo i le taimi atoa lava. O le a tatou iloa ai na Ia faalauteleina a tatou taleni, saunia avanoa, ma faailoa atu i tatou i avanoa e sili atu le mamalu nai lo mea sa tatou mafaufauina pe ausiaina e i tatou lava ia. Ua ou vaaia moni nei mea i lo’u lava ia olaga.

O La’u Malaga e le Mailoa o le Olaga Faaitino

A o ou laitiiti lava, sa faalua ona faamalosia i matou e sosolaese mai lo matou aiga ma tiai

ai mea uma. I solaaga uma e lua, sa manino lava o tagata sa i o matou nofoaga fou sa manatu ia i matou o ni tagata “faatauvaa” i lo i latou. I tamaiti o la’u tupulaga, o la’u gagana tautala sa faailogaina ai au o se tagata mai fafo, ma o se mea tele lea mo latou e faatauemu ma toē i ai.

O le le fiafia ma le atuatuvalo ona o feoaiga i nofoaga fou na mafua ai ona faaletonu la’u aoga ma maumau ai le tausaga a’oga atoa e tasi. I Siamani i Sasae, sa ou aoao ai le FaaRusia o se gagana lona lua. Sa faigata, ae sa ou gafataulima-ina lava. Ae, i Siamani Sisifo, sa manaomia ona ou aoaoina le Igilisi.

Sa foliga mai e le mafafia lea mea ia te au! Sa ou talitonu sa le’i faia tonu lo’u gutu mo le gagana Igilisi.

I le vaitaimi o o’u tausaga talavou, sa ou faananaau ai lava i se teineitiiti e sili ona ofoofogia ma ona mata eena lapopoa aulelei. Ae paga lea, sa foliga mai sa leai ma sina fiafia mai o ia ia te a’u.

O lea la, o au o se alii talavou sa le taua ma tauivi sa ola i Siamani i le mavae o le taua ma o le sa lei foliga mai sa tele se avanoa e faamanuiaina ai i le olaga.

Peitai, sa i ai ni nai mea lelei sa i ai mo au. Sa ou iloa sa alolofa lo’u aiga ia te a’u. I le aoga ma le lotu, sa i ai ni faiaoga sa uunaia au ia seti peea ni a’u sini maualuluga. Ou te manatua pea le taimi na aoao mai ai e se faifeatalai talavou Amerika le mataupu faavae lenei mai tusitusiga paia: “Afai o le Atua e mo [oe], o ai la e faasaga-tau atu ia te [oe]?”²

Sa i ai se mea e uiga i lea manatu na taiaina au i se mana malosi. “Afai o le tulaga lena,” sa ou manatu ai, “aisea ea la ou te fefe ai?”

O lea sa ou talitonu ai. Ma sa ou faatuatuaina le Atua.

Mo se taimi, sa ou i ai i se polokalama o se galuega faataitai. Sa lu’iina au e se tasi o a’u faiaoga ina ia taulai maualuga atu ma auai i aoga po e suesue le faaenisinia o afi. Sa matua tele se galuega faaopoopo na faia ai, ae sa taitai atu ai au e mauaina lo’u fiafia tele i mea tauvaalele! Sa faateia a’u ina ua ou iloaina ina ia avea ma se

pailate sa manaomia ona ou iloa le Igilisi. Ae sa ou manao ia avea ma se pailate, ma sa pei o se vasega le suia o lo'u gutu, ma sa lei toe avea ai le Igilisi ma se gagana faigata.

Faatasi ai ma se unaiga fou, o se tautinoga fou e galue malosi, ma le faalagolago i le Tama Faalelagi, sa ou faia ai ni laasaga iti ia na fesoasoani ia te au e atiae le talitonuga e mafai ona ou faia. Ioe, sa lei faapea la na sologa lelei ai pea mea i taimi uma.

A o 19 ou tausaga, sa ou malaga atu ai i San Antonio, Texas, e amata la'u aoaoga faapailate i le ea fosi. I luga o le vaalele, sa ou saofai ai i autafa o se alii sa tautala i se gagana malosi Faa-Texas. Sa ou iloa ai ma lo'u fefe o le Igilisi lea sa ou matua galue malosi e aoao sa le i tutusa ma le Igilisi sa latou tautatala ai i Texas!

I le a'oga faapailate, sa faigata foi. O se polokalama na matua fefeu, faatasi ma tagata uma sa tauva mo le tulaga sili i le faauuga. Sa ou iloaina vave ua ou i ai i se tulaga le lelei ona o le toatele o tagata o la'u vasega o le latou gagana tautatala i le Igilisi.

Sa lapataia au e a'u faiaoga e uiga i se isi tulaga le lelei e ono tupu—sa ou faaaluina le tele o le taimi i le lotu. Sa talilelia a'u e tagata o le ekalesia i le lotoifale i le latou paranesi ma i o latou aiga, ma sa matou fausiaina faatasi foi se falesa i Big Spring, Texas. Sa popole a'u faiaoga i



na gaoioiga ina nei faaletonu ai lo'u avanoa i se tulaga mauluga. Ou te lei manatu faapena. O lea sa ou faatuatuaia ai le Atua ma faia le mea sili na ou mafaia.

Mulimuli ane, sa ou aoaoina le Igilisi e ui o loo ou galue ai pea i le aso. Sa ou faamaeaina la'u a'oga faapailate—ma faaiu i le sili i la'u vasega. Sa avea a'u ma se pailate o vaalele tau ma mulimuli ane o se kapeteni o vaalele laupasese. Ma o lena teineitiiti aulelei mata enaena o a'u miti na avea ma au ava.

Fai ma le Atoatoa Mea Iti

Pe o i ai se lesona i lenci mea? Ou te manatu e tele!

O le tasi atonu o lenei: Aua nei lofituina i le tele o galuega tetele ma faigata o le olaga. Afai e te tuuto atu e fai ni mea “faigofie”—mea “iti” ia ua talosagaina oe e le Atua e fai—ma e te faia ma le atoatoa i le mea e te mafaia, o le a mulimuli mai mea tetele.

O nisi o nei mea iti ma faigofie e mafai ona e faia ma le atoatoa e i ai le suesueina o tusitusiga paia, ola i le Upu o le Poto, auai i le lotu, tatalo ma le faamoemoega moni, ma le totogiina o sefuluai ma taulaga.

Ia faia nei mea e tusa lava pe e te le fia manao e fai. O nei “osigataulaga” atonu e foliga mai e ititi, ae e taua tele, aua “o osigataulaga e aumai faamanuiaga o le lagi.”³

I se lagona, o au osigataulaga ititi ma faatauvaa o togitogi ia o le olaga o aso taitasi ia e maua ai le atavali silisili o lou olaga. Atonu e te le vaaia le auala e fesootai ai togitogi i le taimi nei, ma e te le manaomia ona vaai i ai i le taimi nei. Tau lava ina ia i ai le faatuatua ia lava mo le taimi patino o loo e ola ai i le taimi nei. Faalagolago i le Atua, ma “o mea iti [o le a] tutupu mai ai mea tetele.”⁴

Talitonu i le Atua

Ia, atonu tou te manatu, ”Ioe, Elder Uchtdorf, ua lelei uma na mea mo oe. Ae o oe o se Apostolo. Ua na o au o se tagata masani o le Ekalesia. E le o taliina a'u tatalo. E le o taitaia lo'u olaga.



Afai o i ai se fuafuaga mo au, ua na o se kopi o lau fuafuaga. O se fuafuaga tuufaasolo mai lalo. O se fuafuaga e iloa ai o loo silafia oe e le Atua ma ia tau lava ina faamalieina i mea ua maua.”

Au uo pele, o outou o fanau a le Atua soifua, o le Atua o le atulaulau. E alofa o Ia ia te outou, e finagalo o Ia ia outou manuia, e i ai Sana fuafuaga ua saunia mo lo outou manuia, manatua le tala a Steve Jobs: “E le mafai ona e faafesootaiina vaega togitogi ao taulai atu i luma; e mafai ona e faafesootaiina i latou i le toe tagai i tua.”

A o ou pei o outou, sa leai ma so’u iloa i mea o le a ave i ai a’u e lo’u olaga. Sa ou lei vaaia le fesootaiina o togitogi i o’u luma.

Ae sa ou faalagolago i le Atua. Sa ou faalogo i le fautuaga a se aiga alofa ma uo atamamai, ma faia ni nai laasaga laiti o le faatuatua, sa talitonu afai ou te faia le mea sili ou te mafaia i lea taimi, o le a taulimaina e le Atua le ata e tele atu.

Io, se Ia faia.

Sa Ia silafia le taunuuga mai le amataga i le taimi sa ou le iloaina ai.

Sa le mafai ona ou vaaia le lumanai, ae sa Ia silafiaina.

E oo lava i na taimi o faigata sa ou manatu ai na tuulafoaiina au, sa faatasi o Ia ma a’u—ua ou vaaia nei lena mea.

I le Faataoto, tatou te maua ai le folafolaga maoae lenei: “Ia e faatuatua ia Ieova ma lou loto atoa; a e aua le faalagolago i lou lava atamai.

Ia e manatua o ia i ou ala uma, ona faatonuina ai lea e ia lava ou ala.”⁵

Ou te le talitonu o loo i ai se faailoga fesili i le faaiuga o lena fuaiupu. Leai, ou te manatu e tatau ona i ai se faailoga ofo!

E ao la ona e fesili ifo ia te oe lava ia, “O lava ea lo’u faatuatua e talitonu ai i le Atua? O o’u loto ea e faatuatuaaina e alofa o Ia ia te a’u ma finagalo e faatonu lo’u ala?”

O le mea moni, atonu e sologa lelei lou olaga na o oe i le tele o mea. Ae ou te augani atu ia e talitonu o le a lelei atu lou olaga pe a e faalagolago i le Atua e taiala ou laasaga. Na te silafia mea e le mafai lava ona e iloaina, ma ua ia te Ia se lumanai ua saunia mo oe e le o mafai ona e mafaufauina. Sa molimau mai le Aposetolo maoae o Paulo, “O mea e lei vaaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou e alofa ia te ia.”⁶

E te manao i lou Tama Faalelagi e taiala oe, faamanuia oe, ma tausia oe?

Ia talitonu la.

Alofa ia te Ia.

Saili atu ia te Ia ma lou loto atoa.

Savali i Ona ala—o lona uiga, tausi i poloaiga, faamamalu i au feagaiga, mulimuli i aoaoga a perofeta, ma faalogo i uunaiga a le Agaga.

Ia fai le mea lenei ma o le Atua o le a “faatoafeina le faatoateleina o outou ma faamanuia

outou e pei ona ia folafola mai!”⁷

Ou te malamalama mo nisi e foliga mai e fai-gofie lava ona faalele ae faigata ona faatino. Ou te ioe e te le tau alu mamao i le aganuu o nei aso e faalogo ai i leo feteenai ia e faalotovaivaia pe oo foi ina faifai faalauaitele i talitonuga i le Atua, ma i le tatou tapuaiga patino lava.

O ia leo ua faateteleina i o tatou aso e ala i avanoa tulagaese i fesootaiga. O lou luitau lea, ae o lou manuia foi lea.

Ou te talitonu o le a outou maua ni auala e taulimaina ai i le ala a le Alii! O le vaega lena o lau malaga e le malioa i le olaga faitino. O le auala e te faia ai o le a matua faatosinaina ai lou lumanai ma le vaega e te faia i le galuega a le Atua iinei i le lalolagi.

Ae ui i lea, o mea o loo e oo i ai i le olaga e le o ni mea tulagaese uma. O la outou tupulaga e le na o le pau lea o se tupulaga ua luitauina ma tauemuina lo latou faatuatua i le Atua. O le mea moni, e foliga mai o lenei mea o se vaega lava o le tofotofoga faaletino mo fanau uma a le Atua.

“Afai o ni tagata o le lalolagi outou,” sa fatalai atu ai Iesu i Ona soo, “po ua alofa mai le lalolagi i ona tagata; ae le ni õ le lalolagi outou, a ua ou filifilia outou nai le lalolagi, o le mea lea e inoino ai le lalolagi ia te outou.”⁸

Pau lava la le mea o lou taliaina lea o le tulaga e faapea, o le taimi lava e te faia ai le tautinoga e mulimuli i le Faaola, o le a le fiafia mai i latou o e nonofo i totolu o le fale tele ma le ateatea—fai lava si leotetele i nisi taimi.⁹ Atonu latou te tau-mafai foi e faapalopalo ma faamaasiasi outou.

Ae ia manatua tou te le tali atu ia i latou. Tou te tali atu i le Atua. E i ai le aso o le a e tu ai i Ona luma ma tali atu mo lou olaga.

O le a Ia fesili atu po o a au mea na fai na faa-toilalo ai faaoososoga o le lalolagi ma mulimuli i le ala o le amiontonu. O le a Ia fesili atu pe na e mulimuli i le Faaola, pe na e alofa i lou tuaoi, pe na e taumafai ma le naunautai e tumau i luga o le ala o le avea ma soo.

Manatua, e le mafai ona e mauaina i ala uma e luga. E le mafai ona tatou mauaina ni faamanuiaga le mafaatusalia o le avea ma soo ae i le taimi lava

e tasi o loo i ai ou pepa faamaumau i le Uarota Muamua a Papelonua. Uo pele, o le taimi lenei e tuito atu ai ia Keriso ma mulimuli i Ona ala.

E i ai se aso o le a iloa ai e fanau uma a le Atua le mea sa’o—e aofia ai i latou o loo faatauemua nei i le upumoni. O le a latou tootutuli ma tautau atu o Iesu o le Keriso, le Togiola, le Faaola o le lalolagi.¹⁰ O le a latou iloa na maliu o Ia mo i latou.

I lena aso, o le a manino lava o Lona siufogea ua na o le pau lea o le siufogea e taua moni lava.

O le a e iloa ai ma le mautinoa le faamanuiaina o oe ona sa e tausisi i le faatuatua, tausi i poloaiga a le Atua, auauna atu i uso a tagata, ma fausia le malo o le Atua iinei i le lalolagi. Au uo pele e, ia talitonu—ma o le a faatasi le Atua ma outou. Ia ua’i atu lou loto ia te Ia—ma o le a Ia taiala oe i lau faigamalaga i lenei malaga maoae ma le faagaeetia o le olaga faaletino.

“E Le Afaina”

A tatou talanoa e uiga i le tuu atu i le Atua e taiala o tatou olaga, ou te fia faamaninoina se mea se tasi. Atonu tou te le fiafia i mea o le a ou tau atua ia te outou. A e ole atu i le Atua po o le a le mea e fai e uiga i faaiuga i lou olaga—e oo lava i nisi o faaiuga taua—atonu Na te le avatua ia te oe se tali manino. O le mea moni o nisi taimi e le afaina le mea ua e filifilia, pau lava le mea o lou tumau i totolu o feagaiga ma mataupu faavae autu o le talalelei.

I le tele o tulaga, o faaiuga tou te faia atonu e le taua e pei o le mea e te faia pe a uma ona faia le faaiuga.

Mo se faataitaiga, atonu e filifili se ulugalii e faaipoipo e ui e manatu nisi o o laua lava aiga e le o i laua o se paaga tutusa atoatoa. Peitai, e maoae lo’u faamoemoe mo se ulugalii faapea, pe afai e maea ona faia le faaiuga, la te tumau ona tuuto i le tasi ma le isi ma i le Alii ma o la loto ma mafaufau atoao. E ala i le taulimaina o le tasi ma le isi i le alofa ma le agalelei ma taulai atu i manaoga faalelagona, faaleagaga, ma faaletino o le tasi ma le isi—e ala i le faia pea o mea iti—e oo ina avea i laua ma paaga tutusa atoatoa.

I se eseesege ma se ulugalii e manatu na la pikiina le tagata “atoatoa” ona manatu lea ua tuanai atu avega mamafa [o faaiuga]. Afai la te le toe tafafao faamasani ma le tasi ma le isi, le toe fesootai le tasi i le isi, ma see atu i tua i le faamaualuga ma le manatu faapito—o lenei ulugalii ua i ai i luga o se ala e tau atu i le faanoanoa ma le lotofaaauvau.

E faatatau le mataupu faavae lava lea e tasi i filifilia o matata eseese. E maoae lo’u faamoemoe mo i latou e pikiina se galuega e itiiti se taua ae latou te faia le mea sili latou te mafai e saili ai auala e fiafia ai ma luitauina ai la latou galuega.

E itiiti so’u faamoemoe mo i latou e filifilia ni galuega faagaeetia ae i le aluga o le ala e mouese lo latou fiafia e manaomia e faamanuiaina ai i latou i la latou galuega. O le mea moni, o le fetuunai ma le manuia i

suiga i falefaigaluega o le a avea lea ma se tasi o uiga autu e ao ona atiaeina e la outou tupulaga i le lumana.

E faapefea la ona finagalo le Alii ia te oe e tau lima ni faaiuga autu?

O Ana faatonuga ia Oliva Kaotui ma Iosefa Samita ua matua aoga ia te au. Na tau atu e le Alii ia i laua, “E ao ina e suesue i ai i lou mafaufau; ona ao lea ona e ole mai ia te au pe ua sao.”¹¹

Ua tuuina atu e le Tama Faalelagi ia te oe se faiai ma se loto. A e faalagolago ia te Ia, o le a Ia fesoasoani atu ia te oe e faaaoga uma [le faiai ma le loto] ma le tatau i au faaiuga fai.

Mo le tele o faaiuga, e sili atu ma le tasi sau filifiliga lelei e te filifili mai i ai. Ina ua tupu lenei mea ia Iosefa ma ana soa, sa faaaoga e le Alii se fasifuitau mata’ina a o latou saili atu i Lana taitaiga. “Ua le afaina.”¹²

Ae sa vave ona faaopoopo atu le Alii, “Tau ina ia faamaoni.”¹³

O lau galuega o le faia lea o faaiuga silisili e te mafaia e fua i faamatalaga o loo e mauaina ma ia faamauaaina i tulaga faatauaaina ma mataupu faavae o le talalelei. Ona tauivi lea ma lou malosi ia faamanuiaina i mea o loo e faia—ma ia faamaoni.

Fai le mea lena ona fesootai lea o togitogi.

Masalo e fai si le fiafia i le faalogo atu e le avatua tonu e le Atua ia te oe se faamatalaga auiliili mo lau malaga i le olaga. Ae e te manao moni ea i faatonuga i vaega patino uma o lou olaga? E te manao moni ea i se tasi e avatu ia te oe ni auala ‘alo i le olaga ae e te lei mauaina se avanoa e fuafua ai mea mo oe lava ia? O le a le ituaiga malaga e le mailoa o le a i ai lena malaga?


Au ue talavou pele, e na o le faatasi lava ona e pasia le malaga o le olaga faaletino. Pe le aveesea ea e se faamalamalamaga ua mamanuina patino ua aofia ai faamatalaga o mea o le a tutupu ma tali i fesili maoae uma o le olaga, lou lagona maoae o le ausiaina o mea ma le faateleina o lou talitonuga i le Alii ma oe lava ia?¹⁴

Ona ua foai atu e le Atua ia te oe lou fitalia, e tele itu e mafai ona e filifili e te alu ai ae maua ai pea se olaga faamalieina. O le olaga faaletino o se malaga faifai pea, filifili-sau-oe lava ia tala o le malaga e le mailoa. Ua ia te oe poloaiiga, ua ia te oe feagaiga, ua ia te oe fautuaga musuia faaperofeta, ma ua ia te oe le meaalofa o le Agaga Paia. Ua matua lava lea e taitai atu ai oe i le fiafia faaletino ma le olioli e faavavau. E ese mai lena, aua nei e faanoanoa pe a e faia ni faaiuga e le atoatoa. O le auala lena e te aoao ai. O le vaega lena o lau malaga e le mailoa.

Leai, e le sologa lelei pea malaga mai le amataga i le faaiuga, ae afai tatou te faamaoni, e mafai ona faamautinoa mai ia i tatou se taunuuga fiafia. Mafaufau i le faataitaiga a Iosefa o Aikupito. I le tele o ala, sa pagatia ai lona olaga. Sa faatau atu o ia e ona uso e fai ma pologa. Sa lafo o ia i le falepuipui mo se solitulafono na te lei solia. E ui i tulaga pagatia uma sa faifaamalosi ia te ia, ae sa ia tausisi pea i lona faatuatua. Sa ia faalagolago i le Atua. Ma sa ia maua mai ai se mea silisili ona lelei. I lea tausaga ma lea tausaga—e ui lava ina foliga mai sa le amanaiaina o ia ma tuulafoaiina—ae sa ia talitonu [pea]. Sa ua’i atu pea e Iosefa lona loto i le Atua. Ma sa faaali mai ai e le Atua e mafai ona Ia liua mea le lelei i mea lelei.¹⁵

I aso nei, pe tusa ma le 4,000 tausaga mulimuli ane, o loo tatou maua pea unaiga mai le tala a Iosefa.

O lau malaga atonu e le fai si pagatia, ae o le a i ai pea lugā ma lalō. O lea, manatua le faataitaiga a Iosefa: Tumau i le



faamaoni. Tumau i le Faatuatua Talitonu. Ia faamaoni. Aua le lotoita. Aua le faapalopalo i isi. Alofa i le Atua. Alolofa i o outou aiga. Faalagolago i le Alii, e tusa lava pe foliga mai e faavaivailoto.

Atonu e le mafai ona e vaai i ai seia oo i se taimi mulimuli ane, ae o le a e tepa i tua ma iloa, e moni sa faatonu ma taitaia lava e le Alii lou ala.

Sa fesootai lava togitogi.

O Mea e Lima ia Manatua

Seia oo i lena taimi, e mafai ona ou fai atu ia te oe e manatua ni mea e lima?

Muamua, ia iloa o tali a le Atua i au fesili aupito sili ona loloto e ono umi se taimi e faatali ai ma e oo mai i ni auala e te lei faamoemoeina. O tali a le Atua e i ai le taua e faavavau. E taua le faatalitali i ai.

Lua, ia i ai sina faatuatua. Ua'i atu o outou loto i le Atua. Ia talitonu e taua oe i le Atua, ma faalagolago o le a Ia faalau-teleina oe nai lo le mea e mafai ona e faia mo oe lava ia. Aoao e uiga ia te Ia. Alofa ia te Ia. Talitonu ia te Ia. Talanoa ma le naunautai ia te Ia e le aunoa. Faalogo mo Lona siufosoga.

Tolu, savali i le mea sili e te mafaia i luga o le ala o le avea ma soo. Aua nei lofituina. Tau lava o le fai o mea iti i le atoatoa e te mafaia ai, ma o le a tulaga lelei ai mea tetele.

Fa, aua nei faatagaina leo faalotovaivai e faavaivaia oe mai lau malaga o le faatuatua. Manatua, e te le tali atu i e faitio mai ia te oe. E te tali atu i lou Tama Faalelagi. O Ana tulaga faatauaina e taulia.

Lima, fai le faaiuga sili ona lelei e te mafaia e ala i le mulimuli i musumusuga e oo mai i lou loto ma le mafaufau. Ia tuu i ai au taumafaiga silisili e mulimulitaia ai. Ia faatuatua, ma o le a faapaiaina e le Atua au taumafaiga faamaoni mo lou lelei e faavavau.¹⁶

Fai le mea lenei, i le faaiuga, o le a lelei mea uma.


A outou saili e mulimuli i lo outou Faaola, o le a faatupute-leina lo outou talitonuga.¹⁷ Ma a outou savavali i le faatuatua ma tatala atu o outou loto i le Malamalama o Keriso, o le a faamatuaina lo outou alofa mo le Atua ma o le a faaleleia lo outou tomai e alolofa ai i o outou tuaoi.

Ma o nei mea uma o le a aumaia ia te outou le fiafia ma le olioli.

O le a aumaia ia te outou le filemu.

I se aso, o le a aumaia ia te outou le mamalu e faavavau.

I lena aso i le lumanai, o le a outou toe tepa ai i tua i lenei malaga e le mailoa faapelepele ma faafafiaina o le olaga



faaletino, ma o le a outou malamalama ai. O le a outou vaaia ai sa fesootai moni lava togitogi i se mamanu matagofie, sili atu ona matagofie nai lo se mea sa e mafaufauina.

Faatasi ai ma se lotofaaftai lemafaamatatalaina, o le a outou vaaia o le Atua lava Ia, i Lona alofa, alofatunoa, ma le alofa mutimutivale naua, sa i ai pea iina i taimi uma e leoleo outou, faamanuia outou, ma taiala o outou laasaga a o outou savavali ai agai atu ia te Ia. ■

FAAMATALAGA

1. Steve Jobs, Stanford University commencement address, June 12, 2005.
2. Roma 8:31 New International Version (1984).
3. "Viiā Le na Fetaia'i ma Ieova," *Viiga*, nu.15.
4. Mataupu Faavae ma Feagaiga 64:33.
5. Faatao 3:5–6.
6. 1 Korinito 2:9, New International Version.
7. Teuteronomie 1:11, New International Version.
8. Ioane 15:19.
9. Tagai i le 1 Nifae 8:26–28.
10. Tagai Roma 14:10–12; Filipi 2:10.
11. Mataupu Faavae ma Feagaiga 9:8.
12. Mataupu Faavae ma Feagaiga 60:5; 62:5; 80:3.
13. Mataupu Faavae ma Feagaiga 62:5.
14. Tagai Mataupu Faavae ma Feagaiga 121:45.
15. Tagai Kenese 37, 39–46.
16. Tagai 2 Nifae 32:9.
17. Tagai 2 Nifae 32:9



Saunaia e le Au
Peresitene Aoao
o le Aoga Sa

Aoaoina o se Ala Fou e Aoao ai

Ao tatou agai atu i luma, mafaufau i mataupu faavae nei e lima e taialaina ai le aoaoina mai ma le aoao atu o le talalelei.

Ua lua nei masina talu ona tatou amata faaaogaina le *Sau, Mulimuli Mai ia te Au* mo le Peraimeri, Aoga Sa, ma i le aiga. O a ni ou lagona i le taimi muamua lava? Na faapefea ona fesoasoani nei punaoa fou ia te oe ma lou aiga?

Mafaufau i au tali i nei fesili ao e faitau i mataupu faavae nei na e mafai ona fesoasoani ia i tatou ia faaaoga ai ma le manuia nei punaoa fou. O le a tatou talanoaina pe faapefea ona faaaoga nei mataupu faavae e lima i tagata aoao ma faiaoga.

MATAUPU FAAVAE 1: *O le mataupu e aoaoina e faatatau i le siitiaina o le aoaoina i le aiga.*

Mo le tagata aoao:

E 168 itula i se vaiaso, ma ua na oni nai itula o na itula e faaalu i le lotu. O lea atonu e te aoaoina le tele o mea i au vasega i le Lotu, o le a e manaomia foi le taumafai e aoao ma ola i le talalelei i le vaiaso atoa lava. Mafaufau i le aoaoina faaleagaga e pei o le faamalositi: o le a e vaaia le tele o aoga pe a faamalositi tino i ni nai taimi o se vaiaso nai lo le na o le faatasi i se vaiaso. A faapea e te suesueina tusitusiga paia i le fale, o le a faatumuina oe i manatu ma le malamalamafaaleagaga lena o le a faamanuiaina ai lou olaga ma ola o isi ao e faasoa atu mea e te aoaoina.

Mo le faiaoga:

E le lava le na o le tuuina atu faigofie lava o se lesona lelei i aso Sa taitasi. O se tasi o sini a se faiaoga e tatau ona uunaia le suesueina patino ma le aiga o tusitusiga paia. O a ni aafiaga na oo i ai tagata o le vasega i le suesueina o tusitusiga paiai le vaiaso lenei? O a ni manatu e mafai ona latou faasoa mai? Atonu e te iloaina e fesoasoani le iloiloina o lau matafaioi e pei o se faatonu o se aufaipese o loo aoaoina le usuina ma le aumaia i fafo o leo uma ia maua ai se leo e tasi ma matagofie. E mafai ona e aoaoina atu se lesona, taitaia le talanoaga, ma aumaia mea uma e te iloaina i le aafiaga, ae e le mafai ona e faia se musika musuia pe afai e le faasoaina mai e tagata o le vasega o latou lava manatu ma musumusuga.

MATAUPU FAAVAE 2:

E finagalo le Alii ia tatou aoao ma tuputupu ae i lo tatou malamalama faaleao-aoga faavae.

Mo le tagata aoao:

Pe a e duesueina tusitusiga paia, e mafai ona e maua upumoni o le talalelei—aoaoga faavae—e fesoasoani ia te oe ia iloa atili le Atua ma maua le malamalama sili atu e feagai ai ma ou luitau. E mafai foi ona e mauaina nisi o upumoni o le talalelei o loo tuu sao mai lava i le tusiga ae o nisi e le o tuusao maia. Mafaufau i lau duesuega o le upumoni e pei o se sailiga mo le oa natia. Atonu e manao-mia lou eliina o se lua ia maua ai ma iloaina le upumoni, ae i le faaiuga, o le a e mauaina “taui sili na maua e Atua ma tagata.”¹

Mo le faiaoga:

O faiaoga e sili atu nai lo faatonu ma faufautua; latou te maua le avanoa e aoao atu ai aoaoga faavae—molimau atu, taitaia, ma uunaia. Ao e sauna e aoao atu e ala i le duesue, mafaufau loloto, ma le tatalo, o le a e sauna e fesoasoani ia i latou e te aoaoina ia malamalama atili ma faatino se aoaoga faavae musuia. Ia maua le lago lelei i lau matafaioi o se faiaoga i Le Ekalesia a Iesu Keriso o le Au Paia o Aso e Gata Ai. Faatasi ai ma le taumafaiga pulunaunau, o le a sili atu loa ona mafai ona e aoao atu e pei o le Faaola.





MATAUPU FAAVAE 3:

O faaaliga patino e totonugalemu i le aoao mai ma le aoaoina atu o le talalelei i le Eklesia.

Mo le tagata aoao:

Na valaaulia talu ai nei e Peresitene Russell M. Nelson tagata o le Eklesia ia “faateleina lou tomai faaleagaga o i ai nei e maua ai faaaliga.”² Ao e suesueina le afioga a le Atua, ua e faaali atu ia te Ia e te fia maua faaaliga. O faaaliga patino e masani ona oo mai pe a e suesueina faaaliga ua uma ona tuuina mai e le Alii i Ana perofeta. I le toe faaupuina o le mataupu faavae o le faatuatua lona iva: pe a e suesueina mea uma “ua faaalia mai” e le Atua, ua e sau-nia oe lava ia maua mea uma “ua Ia faaalia mai nei,” ma mea uma “o le a Ia faaalia mai.”

Ao e mauaina faaaliga, atiina ae le masani o le faamaumauina o ou manatu ma faatinoina. E le gata ua e faaalia i le Alii e te faatauaina mea ua Ia aoaoina ai oe, ae ina ia suia i mea ua tatou aoaoina, e tatau ona tatou faaaogaina.³

Mo le faiaoga:

O faaaliga i mea e tatau ona aoao atu i le vasega e mafai ona oo mai ia te oe i le tele oala. Atonu e oo mai ao e suesueina tusitusiga paia mo oe lava ia. Pe e mafai foi ona oo mai ao e iloiloina punaoa o le Sau, *Mulimuli Mai ia te Au* mo le aiga pe mo vasega i le Eklesia. Pe a oo mai se faaaliga, faamaumau ma faatino loa uunaiga ua e maua.

E tusa lava pe ua uma ona e faia ni fuafuaga mo mea e mafai ona e faia i totonu o vasega, aua le fefe e tali atu i musumusuga i le taimi o le vasega ina ia taulimaina manaoga o i latou o loo e aoaoina.

MATAUPU FAAVAE 4:

O anotusi fou o ni punaoa, e le o le pogai.

Mo le tagata aoao:

O le afioga a le Atua o se pogai o le mala-malama ma le malosi faaleagaga. O le *Sau, Mulimuli Mai ia te A'u—Mo Tagata Taitoatasi ma Aiga*, ua fuafuaina o se punaoa e lagolago i au suesuega faaletagata lava ia ma suesuega faaleaiga i le tale. Faaaoga o se taiala po o se fesoasoani ao e suesue i le Feagaiga Fou. Afai o oe o se matua, e mafai ona e faaaogaina e fuafua ai ni aafiaga musuina o afiafi faaleaiga ma lagolago ai lou aiga i le suesueina o tusitusiga paia faatasi. E mafai e talavou nofofua ona faapotopoto ma faaaoga mo le suesueina o tusitusiga paia o se vaega. Ia faaaoga le punaoa i soo se auala e fesoasoani ai ia te oe ma lou aiga e aumai ai le mana lena e oo mai le aoaoina ma faatinoina i luga o le afioga a le Atua.

Mo le faiaoga:

Manatua o tagata o lau vasega e maua aafiaga mamana ao latou suesue i le aiga. Faaalu le taimi i vasega taitasi e saili ai mea ua latou aoaoina. O punaoa o le *Sau, Mulimuli Mai ia te A'u* mo le Aoga Sa ma le Peraimeri, ua saunia ni gaoioiga fautuaina e fesoasoani ia te oe e fatuina ai ni aafiaga aoga mo i latou e te aoaoina. Ae aua le lagonaina le noatia i mea ua tusia i luga o itulau. Faafaigofie pe fatuina ni gaoioiga e te manatu o le a fausia i luga o le faatuatua, malamalama, ma molimau a tagata o le vasega. Afai e le lagona e nisi tagata aoao le manao e faasoa mai, aua le popole. Fesoasoani ia i latou faapea o lo latou faatuatua o loo faaalia foi i le i ai iina ma le manao ia faalogo i le afioga a le Atua.

MATAUPU FAAVAE 5:

E mafai ona tatou faaleleia a tatou taumafaiga ia auauna atu i isi.

Mo le tagata aoao:

O au taumafaiga e auauna atu i isi e mafai ona faamanuiaina e ala i mea ua e aoaoina i tusitusiga paia. Atonu e te mauaina se mea i lau suesuega e mafai ona faasoa atu i se isi tagata. I le Feagaiga Fou lava ia, o le a e mauaina ai faataitaiga faaletusipaia i le ala na auauna atu ai le Faaola ma isi ini ala mamana. O le valaaulia a le Alii ia “sau, mulimuli mai ia te au” (Luka 18:22) e faatatau i le mea o le a e faia pe a uma ona e suesue—faatinoina o mea ua e aoaoina ma lagonaina. O lea la ao e suesueina le soifuaga o Iesu Keriso i lenei tausaga, vaai mo mea ua aoao mai e Lona soifuaga ia te oe i le ala e auauna atu ai i isi ma le ala e mafai ona faamanuiaina e la oe lava auaunaga olaga o i latou o siomiaina oe.

Mo le faiaoga:

O se faiaoga e nafa mo le auauna atu e le gata i tagata e o mai i le vasega ae faapea foi i latou e le auai. I le avea ai o se faiaoga, ia mataituna po o ai o loo i totonusi o le vasega ao ai e le o i ai. E mafai ona e auauna atu i tagata i fafo o le vasega e ala i le asiasti ia i latou i o latou tale, valaaia i latou i le telefoni, pe auina atu ia i latou se savali i le initonetia, ma uunaia i latou ia auai i le aoaoina o le talalelei i le tale ma i le lotu. O lau faatosinaga e sili atu nai lo le mea e te iloaina, ma o lou alofa ma le popole mo isi o le a faia ai se eseesege tele.

Ao tatou tumau i le taulai atu i mataupu faavae taiala i tua atu o le mataupu e aoaoina fou o le *Sau, Mulimuli Mai ia te Au* o le a sili atu lo tatou faamanuiaina i le avea ai o se vaega o o tatou olaga ma faatagaina e sua o tatou olaga i ala ua fuafuaina e le Atua. ■

FAAMATALAGA

1. “Upu Moni, o A?” *Viiga*, nu. 170.
2. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
3. Tagai Richard G. Scott, “Ia Maua le Taitaiga Faaleagaga,” *Liahona*, Nov. 2009, 6–9.

E mafai ona e maua mataupu e aoaoina ma punaoa e fesoootai i le comefollowme.lds.org.

E le faatatau i Nofoa

Le avea ai o se peresitene o Tamaitai Talavou, e leai se tasi na i ai i le lotu ina ua ou taunuu e faatulaga nofoa i le potu tele faafafia i le po ae lei faia le gaoioiga a Tamaitai Talavou. Sa ou fitu masina o le maitaga, ma sa tatau ona ou faatulagaina nofoa toeitiiti lava na o au. Ae na vave ona oo mai lau failautusi ma se fesoasoani ma fesoasoani ia te au e faauma. Ona amata lea ona matou tautau i luga teuteu.

O le taimi lena na onoono mai ai le ulu o se tamaitai ma fai mai. "Ou te faamalie atu," na ia fai mai ai, "ae ua uma ona fuafua le potu lenei e le Aualofa mo la matou vasega faamalositino nanei."

Na matou fesili atu pe i ai se isi potu e mafai ona latou faaaogaina, ae o isi potu na faaaogaina uma. O lea na matou faia ai le mea lava e tasi e mafai ona matou faia: na matou tuu i lalo nofoa. Na ou alu i le fale i lena pu ua le lava, ma le iloaina o le a ou toe faatulagaina nofoa i le taeao.

O nisi taimi e foliga faapea mai le olaga. Faatasi ai ma se pepe fou ma le toafa laiti, e foliga mai ou te faataamilo ou uili i le aso atoa ona ala mai lea e toe faia lava le mea lea e tasi i le isi aso. I soos se taimi lava, o loo i ai tamaiti e fafaga ma faaputuga o lavalava, meataalo, ma ipu e tuuese—ou te faatulaga nofoa ma toe teu i lalo. O lo'u olaga lena.

Ae pe faatatau ea i nofoa? Ao ou tuuina i lalo nofoa i le maea ai o le gaoioiga a Tamaitai Talavou, sa le mafai ona ou taofia le ataata ao mafaufau e uiga i na teineiti malie ma aulelei ua ou alofa faapelepele i ai. Sa ou faafetai mo le taimi sa ou faatasi ai ma i latou.

E faapena foi i le aiga. E le faatatau i le pata pinati ua olo solo i le nofoa po o totini e le maua lava se pea. E faatatau i lou tamai aiga, lea e faatumuina lou loto i le olioli.

Na fetalai mai le Alii: "O le mea lea, aua le faavaivai i le faia o mea lelei, ona

o lo o ouluu faataatiaina le faavae o se galuega tele. Ma o mea iti e tutupu mai ai mea tetele" (Mataupu Faavae ma Feagai-ga 64:33).

Ua oo ina i ai se uiga tele o mea iti ia te au: o opo mai, pese e fatuina, valivaliga o valigao, musamusua atu i le pusameli ma toe foi mai, ma le aiina o falaoa ua mu ona sa faia faapitoa lava mo au.

Atonu tatou te faia ni mea e le manaia mai i lea aso i lea aso, e pei o le faatulagaina o nofoa ona toe teu lea i lalo. Ae pei faatatau i tagata tatou te alolofa i ai e nonofo ai i luga o nofoa. E le faatatau i le galuega e fai—e faatatau i tagata tatou te auauna atu i ai. Pe a ou mafaufau ia i latou ma le tele o lou alofa ia i latou, ou te faafetai i le Alii mo le matagofie o le olaga ma mo a taeao, pe a ou ala ae ma toe faatulagaina na lava nofoa ma le fiafia. ■

Janessa Orgill, Iowa, ISA

Atonu tatou te faia ni mea e le manaia mai i lea aso i lea aso, e pei o le faatulagaina o nofoa ona toe teu lea i lalo. Ae pei faatatau ea i nofoa?



E Te Manatu O Le A E Toe Vaai i Lou Tuagane?

O le leva o le po, na o au le faa-tauoloa na tiute, ma e leai se isi agaga i totonu o le faleoloa atoa. Ao ou soloina laulau fai faatau, sa amata ona ou uu.

Sa vave ona sui lau uu i le pesepese. Sa amata ona ou pese i le "O Mai, Outou o le Au Paia," (*Viiga*, nu. 17). E le masani ona ou usuina ni viiga e faafafia ai, ae na ou usu ma le malosi seia oo ina taofia au i le vaai atu i se tasi.

Na savali mai se toeaina matua.

"Ou te *iloa* le pese lena," na ia faapea mai ai. "E faapefea ona e iloaina?"

"O se viiga matou te usuina i la'u ekalesia," na ou faapea atu ai.

"O oe o se Mamona?"

Na ou tali atu o au o se Mamona.

Na ia faapea mai o lona toalua sa avea o se Au Paia o Aso e Gata Ai ma sa maliu i le kanesa i le 2011. Sa ia faapea mai o le "O Mai, Outou o le Au Paia," sa usuina i lona falelauasiga. Na ou faa-iloa atu lou faamaisega ma ou fai atu ia te ia o lo'u tuagane matua na maliu i le 2011 ao ave se misiona i Chile. Sa matou usuina foi lenei viiga i lona falelauasiga. Na pai mai le Agaga i maua loto ao maua maofa i lea "mea fetau."

"E te manatu la e te toe vaai i lou tuagane?" na ia fesili mai ai.

Sa ou fesili faafia ia te au lava ia i lenei fesili. I masina faigata ina ua maea le maliu o lo'u tuagane, sa ou tauivi ai i masalosaloga. E lei pine, ae faamanu-iaina au e le Tama Faalelagi i le malamalamalama suamalie e faavavau aiga. Sa i

ai pea au fesili, ae na ou pupula atu i le toeaina ma faapea atu, "Ioe, ou te iloa!"

"E tele le faatuatua o ia te oe," na faapea mai ai le toeaina. "Sa masani ona faapea mai lo'u toalua e tatau ona ia te i maua 'se susulu atoatoa o le faamocmoe.'" Na ou iocina ma tau-lotoina le faaiuga o le 2 Nifae 31:20, lea e tatau ona tatou alolofa i le Atua ma tagata uma, fetaomi atu i luma, ma taumamafa i le afioga a Keriso, ma tumau e oo i le iuga.

"O lena tonu lava!" na faimai ai le toeaina ma loimata i ona mata. "O le mea lena e ono ia faimai ai! E faapefea ona e ilo lena mea?"

Na ou fai atu ia te ia sa i ai i totonu o le Tusi a Mamona. Sa ia fesili mai pe faapefea ona ia maua se kopi. Sa ou tau atu i ai le auala e faia ai i luga o upega tafailagi. Sa lulu e le toeaina lou lima, faafetai mai ia te au i lou igoa, ma alu.

O le i ai o le faatuatua o lona uiga tatou te faalagolago i le Atua tusa lava pe tatou te le iloaina tali uma. Ou te faafetai ina ua valaauiua au e tali fesili a lea toeaina, sa mafai ona ou faalagolago i lou faatuatua i upu moni o loo ou iloaina. Sa lei atoatoa lou faatuatua, ae na ou iloa ua lava lea i luma o le silafaga a le Alii. ■

Wendy Jennings (e pei ona taua ia Leah Barton), Iuta, ISA



E le masani ona ou usuina ni viiga e faafafia ai, ae na ou usu ma le malosi seia oo ina taofia au i le vaai atu i se tasi.



se tasi po, pe a ma se tau-saga talu ona ou le toe alu i le lotu, na fai ai sau miti.

O Taeao, Ou Te Alu Ai i le Lotu

Elua tausaga talu ona ma papatiso ma lou toalua, o Madeleinne, ma faamauina, na ou le toe toaga ma le toe alu i le lotu. O taeao o Aso Sa uma lava, na te faamalosia ai lava au ia nofo i luga ma ma o faatasi i le lotu, ae ou te fai atu lava leai.

“Ua ou le lava. Tuu mai au e moe,” ou te tali atu ai. Mulimuli ane, ou te alu o’ taalo soka.

E nofo i luga Madeleinne lava ia ma agai atu i le falelotu ma le ma tama

tama, o Luka. Pe i le timu pe malulu, e alu pea lava o ia.

O le toe tepa i tua, na ou iloa ai na osofaia au e Satani. Na ia uunaia au faapea o loo lelei lava au e aunoa ma le Ekalesia. Na ia tau mai ia te au, “O loo lelei lava oe, o loo e filemu, o loo e lagolelei.” Ae o le mea moni lava, na leai ni ou faamanuiaga, alualu i luma, ma le fiafia. E faafetai lava, ona sa fesoasoani mai lou toalua ma lou Tama Faalelagi ia te au ia vaai manino i mea.

I se tasi po o le aso Faraile pe o se tausaga talu ona ou le toe alu i le lotu, na fai ai sau miti. Na ou miti sa ou i ai i se nuutua matagofie lava, ma sa savavali ma uulima faatasi ma lou toalua ma lou atalii. Sa matou matuai fiafia lava.

Ae tei lava ua amata ona pogisa. Sa matuai pogisa lava ma na le mafai ona ou vaai i se mea. Na faafuasei lava, ona ou iloaina sa ou le toe uuina lima o lou toalua ma le atalii. Na ou valaaau i o la igoa, ma faamoemoe o le a le toe foi mai.

O Se Lesona Ave Taavale

Na ou manao ia toe foi mai i laua, ma na ou manao ia mou ese atu le pogisa.

I lena taimi, na ou oo ai i le mea moni lava e taua o le faavauvau. Ua leiloa mai ia te au Madeleinne ma Luka. Ua la agai atu i luma e aunoa ma au, ma tuua ai na o au, ua siomia i le pogisa.

Ina ua ou alu ae i le taeao na sosoo ai, na ou iloaina na tuuina mai ia te au e lou Tama oi le Lagi se faailoga. Afai ou te toe foi i le lotu ma ave lou toalua ma lou atalii i le malumalu e faamau faatasi ai, o le a ou le maua i laua. O le a ou le maua i laua i le ologa a sau. O le a ou i ai i se tulaga ua leiloa, ma faavauvau.

“O taeao,” na ou tau atu ai ia Madeleinne, “o le a ou alu ai i le lotu.”

O taeao o aso Sa uma lava talu mai lena taimi, ou te alu ai i le lotu faatasi ma lo’u aiga. Ou te lei toe misia lava se sauniga se tasi talu mai lena miti i le lima tausaga talu ai. Na iu lava ina faamauina i matou i le malumalu ia Setema 2016.

Ou te faafetai mo ou faamanuiaga uma lava. Ou te faafetai faapitoa lava mo lou aiga ma mo le lototoa, malosi, ma le faataitaiga a lou toalua. Ou te faafetai e lei fiu lava o ia ma lou Tama Faalelagi ia te au. Ua avea nei au ma tagata ua i ai nei e faafetai ai ia i laua. ■

Harmin Toledo Gonzalez, Chiloé, Chile

Sa ou aveave agai i le fale mai se fono a le autalavou-matutua i se aoauli matagofie o le Aso Sa. Sa ou lagona le mafanafana ma le toofilemu ao ou mafaufau i savali na ou faalogo i ai e faatatau i le atinaeina o lo tatou agavaa o ni fanau o le Atua. Sa ou fesili ia te au lava po o le a sau mea e mafai ona fai e atinae ai le malosi o loo ia te au.

O le auala i le fale na ou ui atu ai i se auala va iti, e lua itu le lautele. Sa umi se laina taavale mai i le isi itu, ae sa leai se isi i tua o au. Ae, tei lava, ua ou faalogo i le faaee faalausosoo mai o se pu o se taavale. O lea la ua i ai nei se ave taavale i ou tua. Sa ia faaemoemo mai moli tetele ma ee mai ia te au ou te alu ese mai le auala. Na foliga mai ia te au na ia manao e ave faatelevave atu.

Sa ou manatu e manaomia e lea tagata ona aoao le onosai ma le faaaloalo mo isi, o lea na ou alu lemu ai lea. Ao ma pasi atu i ni nai auala, sa ia faaauau pea ona faaee lana pu ma faaemoemo ana moli. Ona ia alu ese lea mai le auala ma tu. Sa ou vaai atu i le faaae e vaai i tali mai i le le mafai ai ona alu televave atu. Sa ou maua se lagona lelei e uiga i lou aoaoina o ia i se lesona.

Na vave lava, ona oso i fafo le ave taavale mai lana taavale, ma tatala le fai-totoa o le pasese. Sa vave ona oso i fafo

sefafine o lo o sii se pepe i ona lima. Sa ou tilotilo e vaai po o fea e o i ai. E le mamao atu, na ou vaai atu i mataitusi o loo momu mai: “Potu o Gasegase Faafuasei o le Falemai.”

“O le a la’u mea ua fai?” Sa ou fesili ifo ai ia te au lava ia. Sa ou taunu i le fale, faapau ifo i ou tulivae, ma loimata i ou mata, sa ou faatoga atu i le Atua e faamagalo au.

I lena aso na ou aoao ai o amioga a tagata o loo siomia i tatou e mafai ona uunaia e mea e le mafai i le tele o taimi ona tatou vaaia pe malamalamama i ai. I nei aso, a ou vaai i se tasi o amio i se auala ou te faamasinoina e sese, ou te filifili e mafaufau ou te le malamalamama tele i mea o lo o latou feagai ai. Ou te taumafai e faaali le alofa ma le agalelei na faapea mai Iesu Keriso ia i tatou ia faaalia atu i isi ma taulai atu ina ia malamalamama ma fesoasoani atu ia i latou o loo siomia au.

E mafai faapefea ona ou atinacina lou malosi o se atalii o le Atua? E mafai ona ou tali atu i amioga a isi i le alofa ma le malamalamama. O le faia o lea mea ua faatagaina ai au e lagonaina atili le alofa o le Faaola i lou lava olaga ma faatagaina isi e lagonaina lou alofa mo i latou. ■

Julio Meza Michel, Chihuahua, Mekisiko

Sa ou lagona le mafanafana ma le toofilemu ao aveave atu i le fale. Ae, tei lava, ua ou faalogo i le faaee faalausosoo mai o se pu o se taavale.





SOOTAGA O Afafine o le Atua I LONA Mana o le Perisitua

Saunia e Barbara Morgan Gardner

Le polofesa lagolago o Talafaasolopito ma Aoaoga
Faavae o le Ekalesia, i le lunivesite o Polika laga

Ua ou oo ina iloaina mo le taimi muamua lava le taua o le malamalama i le perisitua ma ona faamanu-iaga fesootai mo tamaitai. O loo tatou ola i se vaitau ua talanoaina soo ai le aia tutusa, mana, faiga tutusa, ma le onosaia—e sili atu nai lo isi uiiga mama. Ma le sili atu nai lo lena, o le faasinomaga, pule, faaleagaga, ma e oo lava i le Atua o ni autu o le tele o le fenumiai mo le toatele.

O le toatele o tamaitai, i le iloaina po o a faamanu-iaga latou te mauaina, e le o faaogaina atoatoa le taumafataga faaleagaga e mafai ona latou maua. O le tele foi o alii o le o malamalama i lea mataupu.

E mafai faapefea ona tatou malamalama atili i le sootaga o loo i ai a tamaitai ma le mana o le perisitua ma fesoasoani ia te i latou e “laa i luma,” e “ave lo[latou]

nofoaga moni ma manaomia i o [latou] aiga, i o [latou] nuu, ma i le malo o le Atua—e sili atu nai lo [latou] faia muamua”?¹ Muamua, e mafai ona tatou saili i le lotomaualalo e malamalama i upu moni e o faatasi ma le perisitua, ae maise aoaoga lata mai a taitai o le Ekalesia. Lona lua, e mafai ona tatou saili e malamalama pe aisea e le o iloa atoatoa ai e nisi tamaitai lo latou agavaa i le mana o le perisitua a le Atua. Lona tolu, e mafai

**O TAMAITAI O NI TAGATA
AUAI TAU A I LE GALUEGA
O LOO FAATAUNUUINA
E LE ATUA E ALA I LONA
MANA O LE PERISITUA.**

ona tatou nofoua i auala e mafai ai ona tatou fesoasoani i tamaitai e auai atoatoa i le galuega e faataunuina e le Atua e ala i Lona mana o le perisitua.

1. O a ni Upu Moni ua Faamanino Mai e Uiga i Tamaitai ma le Perisitua?

O aposetolo ma taitai aoao o ausilali a tamaitai ua faamamafina mai talu ai nei le sootaga o tamaitai ma le perisitua. O nisi nei o upu moni e taua le malamalama i ai ma aoao atu i le ala sao.

O le perisitua o le mana ma le pule a le Atua.

O le perisitua o le mana o loo auala mai ai le faataunuina e le Atua o Lana galuega maoae o le faaolataga, le aumaia “o le tino ola pea ma le ola faavavau o le tagata” (Mose 1:39). O alii ma tamaitai uma e i ai se matafaioi taua i le galuega a le Atua, ma o alii ma tamaitai foi e mauaina Lona mana e faataunuina ai Lana galuega.

O tamaitai e i ai sa latou matafaioi aloaia ma taua i le galuega o le faaolataga.

Na faapea mai Bonnie L. Oscarson, o se tasi sa avea ma Peresitene Aoao o Tamaitai Talavou: “E manaomia e tamaitai uma ona tagai ia i latou lava o ni tagata auai taua i le galuega o le perisitua. O tamaitai i lenei Eklesia o ni peresitene, fesoasoani, faiaoga, sui o aufono, uso, ma tina, ma o le malo o le Atua e le mafai ona gaoioi sei vagana ua tatou tutula’i

ma faataunuu o tatou tiute i le faatuatua.”²

Na aoao mai Peresitene Gordon B. Hinckley (1910–2008), “Ua tuuina mai e le Atua i tamaitai o lenei eklesia se galuega e fai i le fausiaina o lona malo. O lea e aofia ai itu uma o o tatou matafaioi taua e tolu—o le, muamua, ia aoao atu le talalelei i le lalolagi; lua, ia faamalosia le faatuatua ma fausia le fiafia o tagata o le Eklesia; ma le, tolu, ia tauave i luma le galuega tele o le faaolataga mo e ua maliliu.

“O tamaitai i le eklesia o ni soa faatasi ma o latou alii i le tauaveina i luma o lenei galuega maoae a le Alii. . . . O loo tauaveina e tamaitai ni matafaioi tetele ma ua pa’u ia i latou le faataunuina o na matafaioi. O loo faaluulu latou ia latou lava faalapotopotoga, ma o na faalapotopotoga e malolosi ma taua ma o ni aafiaga taua mo le lelei i le lalolagi. Ua latou tutu i ni matafaioi lagolago i [e umia] le perisitua, ma tauivi faatasi e fausia le malo o le Atua i le lalolagi. Matou te faamamaluina ma faaaloalogia outou mo lo outou malosiaga. Matou te faamoemoe i le taitaiga, ma le malosi, ma taunuuga aoga mai la outou puleaina o faalapotopotoga o loo outou vaaia. Matou

te puipuia ma lagolagoina outou o ni afafine o le Atua, o galulue i se faigapaaga maoae e fesoasoani ia te ia i le aumaia o le tino ola pea ma le ola e faavavau o atalii ma afafine uma a le Atua.”³

O tamaitai faapea alii ua faasoaina i ai le mana ma le pule e i latou o loo umia ki o le perisitua.

O ki o le perisitua “o le pule lea a le Atua ua tuuina mai i [e o umiaina] le perisitua e faatonu ai, faafoe ai, ma pulea ai le faaogaina o Lana perisitua i luga o le fogaelee.”⁴ Ua faamatala mai e Peresitene Dallin H. Oaks, o le Fesoasoani Muamua o le Au Peresitene Sili, “O galuega po o sauniga uma e faatinoina i totonu o le Eklesia e faia i lalo o le pule tuusao po o le pule faamatuu a le tagata o loo umiaina ki mo lena matafaioi.”⁵

Ua i ai i tamaitai le pule e faatino ai o latou valaauga, i lalo o le taitaiga a se tasi e umia ki o le perisitua, e pei lava ona faia e alii. Na faamatalaina e Peresitene M. Russell Ballard, “O i latou o loo i ai ki o le perisitua . . . ua latou faafaigofieina moni mo tagata uma o loo auauna atu ma le faamaoni i lalo o la latou taitaiga e faaaoga le pule o le perisitua ma maua ai le mana o le perisitua.”⁶

Na saunoa mai Peresitene Oaks: “E le masani ona tatou talanoa i tamaitai i le i ai o le pule o le perisitua i o latou valaauga faale-Eklesia, ae o le a se isi pule o i ai? Pe a vaetofiaina se tamaitai—talavou pe matua—e talai le

talalelei o se faifeautalai faamisiona, ua tuu atu ia te ia le pule o le perisitua e faatino ai se matafaoi faaleperisitua. E moni foi lena mea pe a vaetofiaina se tamaitai e galue o se taitai po o se fai-aoga i se faalapotopotoga o le Eklesia i lalo o le taitaiga a se tasi o loo umiaina ki o le perisitua.”⁷

Pe a aoaoina atu lenei mataupu i au tamaitai aoga, e masani ona ou fesili atu, “Afaia e fiaia e se siteki se fonotaga a le au peresitene o Alii ma Tamaitai Talavou, o ai e pulefaamalumalu?” Ona sa valaauiina ma vaetofia uma le peresitele o Tamaitai Talavou o le siteki ma le peresitene o Alii Talavou o le siteki e se tasi o loo umia ki o le perisitua (le peresitene o le siteki), i o latou valaauga, o i laua uma e i ai le pule o le perisitua lava lea e tasi ma o le mea lea e leai se tasi e pulefaamalumalu i le tasi. E fetau lava mo i laua le auauai i le taitaiga o fonotaga.

E faamanuiaina tutusa e le Alii tamaitai ma alii e ala atu i Lana perisitua.

E saunia e le Alii le tele o faamanu-iaga e ala atu i Lana perisitua lena e oo atu i tagata uma o e osia ma tausia feagaiga paia. Na aoao mai Peresitene Ballard, “O i latou uma o e osia feagai-ga paia ma le Alii ma e faamalamaluna na feagaiga o le a agavaa e maua faa-aliga faaletagata lava ia, ia faamanuiaina e ala i auauanaga a agelu, e fagatua ma le

Atua, e maua le atoaga o le talalelei, ma, mulimuli ane, ia avea ma suli faatasi ma Iesu Keriso i mea uma o i ai i lo tatou Tama.”⁸

Na faatonu mai Peresitene Iosefa Filitia Samita (1876–1972): “O faamanu-iaga o le perisitua e le faapea e gata ai i na o alii lava. O nei faamanu-iaga ua liligiina mai foi i . . . tamaitai faamaoni uma o le Eklesia. . . . Ua ofo mai e le Alii i ona afafine meaalofa uma faale-agaga ma faamanu-iaga e mafai ona maua e ona atalii.”⁹

Ma ao galulue tamaitai i le galuega a lo latou Tama, o le a faamanu-iaina foi i latou e avea ma “suli lava o le Atua, o suli faatasi ma Keriso” (Roma 8:17; tagai foi fuaiupu 16).

O tamaitai faapea ma alii (nofofua pe faaipoipo) e mafai ona faaeeina i le mana o le perisitua i le malumalu.

I le 1833 na folafola atu ai e le Alii ia Iosefa Samita faapea o le Au Paia, o alii faapea ma tamaitai, o le a faaeeina i le “mana mai luga” (Mataupu Faavae

ma Feagaiga 95:8). Na faamanino mai e Peresitene Ballard: “O le faaegaa paia o se meaalofa moni lava o le mana. O i latou uma lava e ulufia le maota o le Alii, e galulue i sauniga o le perisitua. E tutusa lava i alii ma tamaitai.”¹⁰ O tagata agavaa uma na maua o latou faaegaa paia ma tausia feagaiga na latou osia i le malumalu ua i ai le mana o le perisitua. O lea la, o tamaitai, faaipoipo pe nofofua, e mafai ona maua le mana o le perisitua i o latou aiga e tusa lava pe leai se asiasiga mai se o umia le perisitua.

Na fesili Sheri Dew, lea sa fesoasoani i le Au Peresitene Aoao o le Aualofa: “O le a le uiga o le mauaina o le mana o le perisitua? O lona uiga e mafai ona tatou maua faaaliga, faamanu-iaga ma maua le fesoasoani e ala i le galuega a agelu, aoao e tatala le veli lena e vavaecina i tatou mai lo tatou Tama Faalelagi, ia faamalosia e tetee i faaososoga, ia puipuia, ma ia faamalamalamaina, ma faia ia sili atu le poto nai lo o le mea o loo tatou i ai—e faia uma lava e aunoa ma se fesoasoani faalelalolagi.”¹¹ O le a le taunuuga sili o lenei mana ma e faapefea ona maua? Na faaali mai e le Alii faapea “o le

O faifeautalai tamaitai o se faataitaiga o ni tamaitai ua vaetofiaina ma tuuina atu i ai le pule o le perisitua e faatino ai se matafaoi faaleperisitua.



mana o le faaleatua,” e aofia ai le mana e avea ai faapei o Ia, e faaalia e ala mai i sauniga o le perisitua (tagai Mataupu Faavae ma Feagaiga 84:20).

O nisi taimi e faaaoga ese-ese ai le pule o le perisitua i le Ekalesia nai lo totonus o le aiga.

O le faalapotopotoga o le Ekalesia e tuufaasolo i le pule; o le aiga e faale-tama. Na faasoai mai e Peresitene Oaks “e tele mea e tutusa ai ma ni nai ese-esega i le auala e galueaiina ai le pule o le perisitua i totonus o le aiga ma le Ekalesia.”¹² E ala i le mamamanu faalelagi, o le tane ma le ava e mafai ona i ai ni tiute-tauave esese, ae la te galulue faatasi o se “paaga tutusa.”¹³ Na aoao mai e Elder L. Tom Perry (1922–2015) o le Korama a Apostolo e Toasefululua: “Manatua, uso e, i lau matafaioi o se taitai i totonus o le aiga, o lau ava, o lau soa lea. . . . Talu mai le amataga, sa aoao mai ai e le Atua le tagata, o le faaipoipoga e tatau ona tuu faatasia ai le tane ma le ava ia tasi. O lea, e leai se peresitene po o se sui peresitene i se aiga. E galulue faatasi le ulugalii e faavavau mo le manuia o le aiga. E tuu faatasia i le upu, i galuega, ma faatinoga, a o la’ua taitai, ma faatonu lo la’ua iunite faaleaiga. O i la’ua o se paaga tutusa. La te fuafuaina faatasi ma faatulaga mataupu a le aiga ma le lotogatasi a o agai atu i luma.”¹⁴

O le a le mea e tupu pe a maliu le toalua o se tasi? Na aoao mai Peresitene Oaks: “Ina ua maliu lo’u tama, sa pulefaamalumalu lo’u tina i lo matou aiga. Sa leai sona tofi o le perisitua, ae i le avea ai

o se matua o loo ola o la la’ua ulugalii, o lea sa avea ai o ia ma tofi e pulea lona aiga. O le taimi foi lena, sa ia matua faaaloalo ai i le pule o le perisitua a lo matou epikopo ma isi taitai o le Ekalesia. Sa pulefaamalumalu o ia i lona aiga, ae sa latou pulefaamalumalu i le Ekalesia.”¹⁵



2. Pa Pupuni

O a nisi o pa pupuni na e mafai ona taofia tamaitai mai le iloaina atoatoa o lo latou mauaina o le mana o le perisitua?

Le mautonu o alii ma tamaitai foi e faatatau i le perisitua.

Na aoao mai Peresitene Oaks: “O le Perisitua Mekisateko e le o se tulaga po o se faailoga faapipii. O se mana faalelagi ua taofia i le faatatuaga e faaaoga mo le manuia o le galuega a le Atua mo Lana fanau. E tatau ona tatou manatua i taimi uma o alii o loo umiaina le perisitua e *le o* “le perisitua.” E le talafeagai le faasino atu i “le perisitua ma tamaitai.” E tatau ona tatou faasino atu i ai, ‘o e umiaina le perisitua ma tamaitai.’”¹⁶

E ala i le fai atu, “O le a usuina nei e le perisitua se pese,” po o “tatou te manaomia ni perisitua ofo fua mai e o i le tolauapiga a Tamaitai Talavou,”

ua tatou faia i tatou lava ma isi, e tusa lava po o le a le faamoemoega lelei, se faaleagaina e ala i le uunaia ma faatupuina le fenumiai ma faaititia ai le taua o le mana o le Atua.

Ma manatu ai faapea o le perisitua e leai se sootaga ma tamaitai.

Ina ua valaaulia e suesue le perisitua, o nisi o tamaitai na tali mai, “Ou te le manaomia ona oo i lena autu. E le faatatau ia te au.” Ae ona e faamanuiaina uma fanau a le Atua e le perisitua, tatou te manuia uma lava i le mauaina o se malamalamama sili atu i ai. O le a faamanuiaina uma i tatou mai se malamalamama sili atu o le perisitua. Mafaufau pe faapefea ona faamanuiaina le Ekalesia ma o tatou aiga pe afai o tamaitai ma alii o le Ekalesia e tutusa uma le malamalamama ma le aoaoina lelei i upumoni e faatatau i le perisitua.



Na faamamafa mai e Linda K. Burton, o le sa avea ma Peresietne Aoao o le Aualofa, faapea o tamaitai e faapea foi alii e manaomia ona suesue i le autu o le perisitua. "Uso e, e le mafai ona tatou tutu i luga ma aoao atu na mea tatou te le malamalama i ai ma iloa mo i tatou lava."¹⁷

Tuuina o tuaoi i tamaitai na e le o i ai moni lava iina.

E manino lava faapea o nisi o valaauga i le Ekaleisa e manaomia ai le faauuina i le tofi o le perisitua, ae e tatau ona tatou faaeteete ia aua nei taofia o tatou tamaitai i le faigofie lava ona faalagolago i aganuu, talafaasolopito, aoaoga sese, po o tu masani. Mo se faataitaiga, e mafai e tamaitai ona avea ma ni taitai ma faiaoga lelei, leo taua i aufono o le Ekalesia, ma ni faataitaiga mamana o le avea ma soo i tagata o soo se tausaga.

3. O Le A Se Mea e Mafai Ona Tatou Faia?

O nisi nei o ala e mafai e i tatou uma lava ona fesoasoani i o tatou tuafafine i le talalelei ia sili atu ona atoatoa le auai i le galuega e faataunuina e le Atua e ala i Lona mana o le perisitua.

E tatau ona tatou masani i upu a le Usoga ma o tatou taitai tamaitai.

I le aluga o nai tausaga ua mavae, na saunoa ai sui sinia o le Korama a Apostolo e Toasefululuia e faapitoa lava i le matafaioi a tamaitai i le Ekalesia. Pe o tatou faalogo ea ma le faaeteete i nei lauga?

Mo se faataitaiga, i le 2015, na faailoa mai ai e Peresitene Russell M. Nelson, "E le mafai ona atoa le malo o le Atua ma e le mafai lava ona atoa e aunoa ma tamaitai o e osia feagaiga paia ona tausia lea, o tamaitai o e e mafai ona tautatala atu ma le mana ma le pule a le Atua!"¹⁸

Fesoasoani i tagata uma ia malamalama i le tulagaese o le matafaioi a tamaitai i le galuega o le perisitua.

Na faamanatu mai e Peresitene Ballard i tamaitai o le Aualofa faapea o lo latou "lio o faatosinaga o

se lio tulaga ese—o se lio e le mafai ona kopiina e alii. E leai se tasi e mafai ona puipuia lo tatou Faaola i ni isi faatauanau po o le mana nai lo outou—o afafine o le Atua o loo i ai se malosiaga ma le talitonuga i totonu. O le mana o le leo o se tamaitai ua liua e le mafuatiaina, ma ua sili atu ona manaomia e le Ekalesia o outou leo i le taimi nei nai lo se isi lava taimi."¹⁹ Na folafola mai e Bonnie L. Oscarson: "E manaomia ona vaai [tamaitai] o le Ekalesia ia i latou lava o ni tagata auai taua i le galuega o le faaolataga o loo taitaia i le perisitua ma ia le tau na ona matamata i ai ma lagolago."²⁰

Tuu atu le faamalo i taitai tamaitai.

E faamaoni lava, tatou te tuuina atu le gauai maoae i mea e tau mai e i latou tatou te lagolagoina o ni perofeta, tagatavaai, ma talifaaaliga. Latou te umia ki o le malo, ae taitaia e le Alii Lana galuega e ala mai ia i latou. E faaopoopo atu i a latou aoaoga, o taitai tamaitai o le Ekalesia ua vaetofia ma tuuina atu i ai le pule o le perisitua e saunoa ai i alii ma tamaitai foi o le Ekalesia. Matou te fia faalogologo ia latou aoaoga ma faalogo foi i fautuaga ua tuuina mai e le Atua ia i tatou e ala mai ia i latou.



Faaaofia tamaitai i aufono, e le gata i na o se tofi ae faatasi ma le faatinoga.

Na saunoa mai Peresitene Ballard: "Ma o soo se taitai perisitua o e e le fa'aofiaina ona tuafafine a taitai i le faaaloalo atoa ma fa'aaogaina ua ia le faamamaluina ma faalauteleina ki ua tuuina atu i ai. O lona mana ma unaiga o le a faaititia seia oo ina ia aoaoina le ala o le Alii."²¹

Aua le tuuina atu tali "ma le pule" i fesili e lei taliina mai e le Alii lava la.

Na lapatai mai Peresitene Oaks i tagata o le Ekalesia ia aloese mai le taliina o fesili e lei taliina mai e le Alii: "Aua ne'i o tatou faia le mea sese sa faia i le taimi ua tuanai, . . . o le taumafai e faapipii ni mafuaaga i faaliga. O mafuaaga e iu ane lava o mea e fai e tagata i se tulaga maoae. O faaaliga o mea ia tatou te lagolagoina o le finagalo o le Alii

ma o le mea lena e taoto ai le saogalemu."²²

Ua tuuina mai e Peresitene Ballard se faataitaiga sili o lenei mea: "Aisea o alii—ae le o tamaitai—e faauuina i tofi o le perisitua? . . . E lei faaalia mai lava e le Alii pe aisea ua Ia faatulagaina ai Lana Ekalesia e pei ona Ia faia ai."²³ Na lapatai mai foi Peresitene Ballard ia i tatou "ia aua nei faaso atu ni tala po o ni mea moni e faamoemoe e faatupu ai le faatuitua ae le faamaonia e moni po o ni malamalamaaga ma ni faamatatalaga ua le toe faaaogaina o a tatou aoaoga faavae ma faiga ua tuanai. O se tulaga atamai tele le avea ma se faataitaiga masani o le suesue i upu a perofeta ma aposetolo soifua; ia ogatasi pea ma mataupu, aiaiga faavae, ma faamatatalaga o i ai nei a le Ekalesia e ala atu i le mormonnewsroom.org ma le LDS.org; ma saili atu i galuega a tagata popoto aloaia, magafagafa lelei, ma faamaoni a le Au Paia o Aso e Gata Ai ina ia mautinoa ai e te le o aoaoina atu ni mea e le sao,

tuai, pe le talafeagai."²⁴ Manatua o nisi taimi, "Ou te le iloa" o se tali moni sili lena. E tatau ona tatou suesue ma le maelega i le malamalama o le faatuatua ia aoao le upumoni faalelagi.

Fesoasoani i tamaitai ma alii ia sili atu le malamalama i le perisitua.

O le fesoasoani i alii ma tamaitai foi ia mautinoa lo latou mafai ona suesue ma aoao e uiga i le perisitua e taua tele. O nisi nei o mau e mafai ona fesoasoani i lenei faagasologa e aofia ai, ae e le faatapulaaina i le, Alema 13 ma le Mataupu Faavae ma Feagaiga vaega 2, 13, 20, 76, 84, 95, 107, 110, 121, ma le 124. O le auai i le malamalau mo le faamoemoe o le sailia ma le faamaoni e le gata mo tali ae faapitoa lava mo fesili musuia e faatatau i le autu e taua tele lava.

Na faatonu mai Elder Bruce R. McConkie (1915–85) o le Korama a Aposetolo e Toasfululua: "O lenei aoaoga faavae o le perisitua—e le iloa e le lalolagi ma e itiiti lava ua iloaina e oo lava i le Ekalesia—e le mafai ona aoaoina mai na o tusitusiga paia. . . .

"O le aoaoga faavae o le perisitua ua na ona iloaina e ala mai i faaaliga patino. E oo mai, lea fasifuaiteau ma lea fasi fuaitau, i le mana o le Agaga Paia ia i latou o e alolofa ma auaua i le Atua ma o latou loto atoa, manatu, mafaufau ma le malosi atoa. (Tagai i le MF&F 98:12.)"²⁵

4. Faaiuga

Fesoasoani i tamaitai ia malamalama e tatau ona latou tutu faatasi ma le Alii ma Ana perofeta.

Ua sili atu le feesesesei ma le fenumiai o le lalolagi. O tamaitai, i le tele o ala, ua fetauai o le tasi ma le isi. Ua malolosi manatu ma o lagona i tamaitai ua matautia. Vaai faale-mafaufau i le faatosinaga mo le lelei i lenei lalolagi pe afai o tagata uma o le Ekalesia o le a mafai ona vaai atu faapea o i latou, e pei o Eseta, ua faasaoina “mo se taimi faapenei” (Eseta 4:14) ma o i latou, taitoatasi ma i le avea ai o se vaega lototasi atoa, ua manaomia e taitai, ae le mulimuli, i le lalolagi.

Na saunoa Ema Samita: “O le a tatou faia se mea tulaga ese. . . . Tatou te faamoemoeina ni mea tutupu tulaga ese ma ni valaau faanatinati.”²⁶ O nei valaau faanatinati, e oo lava i talosaga, ua oo mai taitai o le Ekalesia i tamaitai i le aluga o nai tausaga ua mavae e lei faia lava muamua. Ao tatou malamalama atili i upumoni e fesootai i le perisitua, ia iloa mafuaaga tatau pe aisea ua tele ai tamaitai o loo nonofo i lalo ae o o latou faamanuiaga, ma faatino le malamalama tatou te maua mai e faata-tau i tamaitai ma o latou avanoa e auai i le galuega o le perisitua, e mafai ona tatou “maua le olioli ma le filemu lena e oo mai i le iloaina e ala i lau aoaoga faapea na e uunaia se olaga, na e siitia se tasi o fanau a le Tama Faalelagi i lana malaga i se aso o le a toe olioli ai i Lona afioaga. ■

- Alii,” *Liahona*, 48–49.
9. *Aoaoga a Peresitene o le Ekalesia: Iosefa Filitia Samita* (2013), 163. Mo se isi talanoaga loloto i faamanuiaga o le perisitua, tagai Bruce R. McConkie, “O Faamanuiaga e Sefulu o le Perisitua,” *Liahona*, Mati. 1978, 52–55.
 10. M. Russell Ballard, “Let Us Think Straight” (Faigalotu a le Iunivesite a Polika Iaga, Auk. 20, 2013); 7, speeches.byu.edu.
 11. Sheri Dew, *Women and the Priesthood: What One Mormon Woman Believes* (2013), 125.
 12. Dallin H. Oaks, “Pule o le Perisitua i le Aiga ma le Ekalesia,” *Liahona*, Nov. 2005, 26.
 13. “O le Aiga: O se Folafolaga i le Lalolagi,” *Liahona*, Me 2017, 145.
 14. L. Tom Perry, “O Le Tulaga Faatamā, o se Valaauga e Faavavau,” *Liahona*, Me 2004, 71.
 15. Dallin H. Oaks, “Pule o le Perisitua i le Aiga ma le Ekalesia,” 26.
 16. Dallin H. Oaks, “O Mana o le Perisitua,” *Liahona*, Me 2018, 65.
 17. Linda K. Burton, “Priesthood: A Sacred Trust to Be Used for the Benefit of Men, Women, and Children” (Brigham Young University Women’s Conference, May 3, 2013), womensconference.byu.edu/transcripts.
 18. Russell M. Nelson, “O se Talosaga I Ou Tuafafine,” 96.
 19. M. Russell Ballard, “Alii ma Tamaitai ma le Mana o le Perisitua,” *Liahona*, Sete. 2014, 36.
 20. Bonnie L. Oscarson, “Tutula’i A’e i le Malolosi, Uso e i Siona,” *Liahona*, Nov. 2016, 14.
 21. M. Russell Ballard, “Alii ma Tamaitai ma le Mana o le Perisitua,” *Liahona*, 35.
 22. Dallin H. Oaks, *Life’s Lessons Learned: Personal Reflections* (2011), 68–69.
 23. M. Russell Ballard, “Alii ma Tamaitai ma le Mana o le Perisitua,” *Liahona*, 35.
 24. M. Russell Ballard, “O Avanoa ma Tiutetauave a Faiāoga o le OAE i le Seneturi 21 (saunoaga i faiāoga faaelotu a le Ofisa o Aoga a le Ekalesia, Fep. 26, 2016), broadcasts_lds.org.
 25. Bruce R. McConkie, “O le Mataupu o le Perisitua,” *Ensign*, Me 1982, 32–34.
 26. Ema Samita, i le *O Afafine i Lou Malo*, 14.
 27. M. Russell Ballard, “O Avanoa ma Tiutetauave o Faiāoga a le OAE i le Seneturi Luasefulu-tasi.”

FAAMATALAGA

1. Russell M. Nelson, “O Se Talosaga i O’u Tuafafine,” *Liahona*, Nov. 2015, 97.
2. Bonnie L. Oscarson, “Tutula’i A’e i le Malolosi, Uso e i Siona,” *Liahona*, Nov. 2016, 14.
3. *Aoaoga a Peresitene o le Ekalesia: Gordon B. Hinckley* (2016), 74.
4. *Tūsitalima 2: Tātaiiina o le Ekalesia* (2010), 2.1.1.
5. Dallin H. Oaks, “O Ki ma le Pule o le Perisitua,” *Liahona*, Me 2014, 51.
6. M. Russell Ballard, “Alii ma Tamaitai i le Galuega a le Alii,” *Liahona*, Ape. 2014, 48; tagai foi *O Afafine i Lou Malo: O Le Talafaaolopito ma le Galuega a le Aualofa* (2011), 138.
7. Dallin H. Oaks, “O Ki ma le Pule o le Perisitua,” 51.
8. M. Russell Ballard, “Alii ma Tamaitai i le Galuega a le



Galala mo le Malamalama Sili Atu

se tasi taimi na ou alu ai i se tafoga faamasani muamua lava ma se teine o lau uarota. O le taeao na sosoo ai na o maua lava e toalua na oo atu mo le malaga a le matou uarota i le malumalu. Na ma ofo atu e fesoasoani i soo se sauniga e manaomia ai le tele o tagata ... lea na iu ae o faamauga.

Sa ou matuai popole lava, ae i lou faateia tele, o le faia o faamauga e sui ma se teine i le itiiti ifo ma le 12 itula talu ona uma le ma tafaoga faamasani muamua sa lei matuai leaga lava e pei ona ou manatu i ai. Afai e i ai se mea, o lena aafiaga na tuuina mai ia te au le **vaaiga e sili atu i le taua tele o vaega taitasi o galuega faalemalumalu**—e aofia ai faamauga (faitau atili i la'u tusiga i le initoneti).

E tulaga ese uma lava o tatou tulaga, ae afai tatou te **tauvi ia malamalama atili i feagaiga** tatou te osia i le malumalu, o na feagaiga o le a faaititia le pei o ni mea e kolosi ese ia tatou lisi faaleagaga ae o le a sili atu pei o punaoe e matuai manaomia lava o le **"vai ola" lena e aumaia ia i tatou le malosi faaleagaga** (tagai Matapu Faavae ma Feagaiga 63:23). Ma i le lalolagi vevesi o loo tatou ola ai, tatou te manaomia le malosi uma e mafai ona tatou maua!

I lenei lomiga, **ua faasoa mai e talavou matutua o latou aafiaga i le malumalu**. Na faasoa mai e Kealohilani le ala na faamanuiaina ai lona olaga i le ofuina ma le faamaoni o le ofusa o le malumalu (tagai itulau 44). I se tusiga


ua na o le polokalama faatekinolosi e maua ai, ua faasoa mai e Zariah ona popolega e uiga i le mauaina o se lagona o le lava o le lelei e ulu ai i le malumalu. Afai o loo e sauniuni foi e auai i le malumalu mo le taimi muamua, ua matou tuu-faatasia se F&T atonu e te mauaina e fesoasoani (na o le initoneti). Ma ua talanoa mai Mahesh e uiga i le ala na ia toe foi atu ai i le malumalu ia malamalama atili ai i feagaiga na ia osia iina (tagai itulau 48).

Ao ou taumafai e

alu i le malumalu i le tele o taimi ou te mafaia ia **faatumu ai lau punavai faaleagaga**, o le mea e sili le taua o le faapea **ou te faatagaina le Agaga i le malumalu e aoao au ma suia au** i totolu ma fafo foi o ona puipui. Ona mafai lea e "vai ola" na e tafe mai le malumalu ma e ala mai i a'uf feagaiga e mafai ona fesoasoani e faamalie ai lo'u galala i aso taitasi.

Malo!

Alex Higie



AUTALAVOU MATUTUA

FAUTUAGA SILI ONA LELEI ...

Ua faasoa atu e le autalavou matutua le fautuaga sili ua latou mauaina e uiga i le faia o le malumalu o se vaega o lou olaga.

"Na tau mai e lou epikopo ia te au o le malumalu o le a avea o se aafiaga paia pe a ou manao i ai. E faitalia lava au e filifii po o le a le tele o se aoga o le malumalu e mafai ona faia i lou olaga."

—Jasmyn Nye, Iuta, ISA

"O le i ai o se malumalu e latalata mai e maoae, ae afai e le o lava tagata i le malumalu, ona mamao ese lava lea. E tatau ona tatou turau le latalata i le malumalu, e tusa lava po o le a le mamao e i ai."

—Cole Murphy, Kafeonia, ISA

"Ia i ai se faamoemoe. Alu ma se fesili, faia se galuega mo se tuaa, saili le filemu, pe faalogo mo uunaiga."

—Sydney Orton, Iuta, ISA

O le a le fautuaga aupito sili ona lelei ua e mauaina e uiga i le faia o measese ma toe taumafai? Auina mai lau tali i le liahona.lds.org i le aso 31 o Mati, 2019.

Faasoa Mai Lau Tala

O i ai sau tala mataina e faasoa mai? Pe e te fia vaai i tusiga e uiga i ni autu faapitoa? Afai o lea, matou te fia faalogo atu ia te oe! Auina mai au tusiga po o lou manatu faaalia i le liahona.lds.org.

E UIGA I TUSITALA TALAVOU MATUTUA

Kealohilani Wallace e tusia ni tala fatu mama, ma fiafia i ai talavou matutua na uunaia e ona olaga ma ona talitonuga foi. Sa aoga o ia i le lunivesite o Polika laga-Hawaii ma o se tagata toaga i lana uarota YSA.



Mahesh Kumar Vedurupaka e sau mai Andhra Pradesh, Initia. O ia o se tane ma le tama o se fanau aulelei e toalua. E i ai sona faailoga tikeri i le enisinia saienisi i komepiuta ma e galue o se sinia i le atiina ae o polokalama komepiuta. E olioli o ia i tafaoga ma lona aiga, aoao tekinolosi fou, ma le kuka.



Zariah Inniss e sau mai Barbados. E 21 ona tausaga ma o le ulumatua o se fanau e toalima. Sa avea ma se tagata o le Ekalesia mo lona olaga atoa. E fiafia o ia e tusitusi ma tata musika.



Alex Hugie e sau mai Oregon, ISA. Sa faauu mai le lunivesite o Polika laga ma se faailoga tikeri i le Igilisi. E faapitoa lava lona fiafia i suesuega i tusi a tagata talavou, tusia o tala pupuu malie ma tusi fatu, ma le inuina o le susu.



I LE VAEGA LENEI

44 Puipua e Feagaiga

Saunia e Kealohilani Wallace



48 Toe Vaai agai i le Malumalu Paia

Saunia e Mahesh Kumar Vedurupaka

NA O POLOKALAMA FAATEKINOLOSI

Faaeega Paia o le Malumalu F&T

Ua Lava le Lelei mo le Malumalu?

Saunia e Zariah Inniss

Mafuaaga e 5 e Tatau ai ona Auai Tagata Nofofua i Faamauga o le Malumalu

Saunia e Alex Hugie



Saili nei tusia ma le tele:

- I le liahona.lds.org
- I le [YA Weekly](http://YAWeekly.com) (i lalo "Young Adults" i le the Gospel Library)
- I le facebook.com/liahona



Puipuia e Ala i Feagaiga

Saunia e Kealohilani Wallace

O le mana ma
le puipuiga ua
folafolaina mai ia
i latou e ofuina
ma le faamaoni le
ofusa o le malu-
malu e le sau
faamaneta; e sau
mai le Atua.

O lou fiafia i le ofuina o le ofusa o le malumalu e le mafai ona faamatalaina atoatoa i upu. E ui o le ie faaletino o loo faia ai le ofusa e māmā ma tau le iloa ina ua ou masani i ai, o le mea o lo o suitulaga ai le ofusa, o faamaniaga e oo mai ai, ma foliga vaai a fafo o lau tautinoga faaleagaga i le Atua—ma lou alofa *mo* le Atua—e faia ai lou ofuina i aso uma o se aafiaga matagofie ma faaleagaga. O le filemu lea. O le malosi lea. O le toafimalie lea. O le mana lea. E paia. O se faamanuiaga i lou olaga e pei ona ou faia i ai.

I nisi taimi e mafaufau ai tagata o le ofusa ua na o se ofu i totonus, po o se fua faigofie o le tauagafau, ua faia ia faaali atu ai ia te i latou ofu e mafai ma le mafai ona ofuina—o se laina faaataata o le mea e talafeagai ma le le talafeagai. Ma e ui o le ofuina tatau o le ofusa e mautinoa lava e faamalosia ai le tauagafau (ae maise lava i tu faalelalolagi), o le ofusa o le perisitua paia e suitulaga mo mea e sili atu.

Vaaiga Mamana e Faavavau

Na ou maua lou lava faaeega paia i le 19 o tausaga ao sauniuni ai mo lau faaipoipoga faalemalumalu. Ma e ui o tulaga le maalofia na iu ai lena faaipoipoga, sa ou faamaoni pea i au feagaiga, ma o na feagaiga na ou osia ma le Alii na tumau pea. Na ou piimau atu i ai ma sa

faamausaliina ai au. Sa le tuulafoaiina au i ou tofotofoga ma sa faamalosia au mo na tofotofoga.

Ua ou maua le anoanoai o faamaniuga mo le faaaauau pea ona umia se pepa faataga o le malumalu, mo le ofuina ma le tatau o le ofusa e pei ona faatonuina, ma mo le tausiaina o feagaiga na ou osia i le malumalu. E ui ina le mafai ona tolauauina taitasi faamaniuga uma mai lea usiusital, o mea mataalia na ou iloaina o le mafaia lea ona faamausaliina se vaaiga faalelagi ma le faamanatu faaletino faifai pea ia faia filifiliga sao e ui ina le faia e i latou o e siomiaina au—ma e ui foi ina ou tiga ona o filifiliga a isi.

E *tele* mea na sese i lou olaga i le 11 tausaga ua mavae (o mea e sili ona le lelei e aofia ai le tetea ma le toalua, mafatia i faafitaauli tau tupe, ma vaivaiga faatigaulu faalegaluega ma faaletagata), ae o le tumau ai ona ofuina le ofusa ma le toaga i le malumalu na fesoasoani ia te au e iloa ai e tele atu mea i lenei olaga nai lo o se tofotofoga ua ou aafia ai i lea taimi—tusa lava po o le a le faigata po o le tiga o na taimi uma.

Ona sa fesoasoani nei faamanatu e lua ia te au e tumau ai le latalata i le





Agaga, sa taitaieseina au mai puapuaga faaletino e ala i uunaiga faaleagaga na ou filifili e mulimuli i ai—ma na tuuina mai foi ia te au se faamoemoe ma se vaaiiga e faavavau malosi lea na taitaiina au i ou taimi pogisa ina ua ou le lag-naina le i ai o sou malosi e faia ai se isi laasaga i luma i le faalelagona pe faale-tino i lau faigamalaga. O lenei filemu ua faaauau pea ona faamalosia au i le oo mai ai o luitau ma tofotofoga fou.

O faamanuiaga mai le malumalu ua ou aafia ai e amata mai faamanuiaga i lea aso ma lea aso tatou te le ano i ai i nisi taimi (e pei o le filemu i le loto ma musumusuga), e oo atu i mea e mataina, faavavau, ma mea ua iloga (e pei o le faamauinua e faavavau i o tatou aiga). O aafiaga a tagata taitoatasi e uiga ese ma e patino—ae o faamanuiaga e oo mai ia i tatou i taimi uma i le taimi sao a le Alii pe a tatou tausia a tatou feagaiga (tagai Mataupu Faavae ma Feagaiga 82:10). Ma o le ofuina o le ofusa o se auala taua ma patino o le faaalia i le Alii o lo o tatou manatua pea a tatou feagaiga.

Puipuiga Faaleagaga Faifai Pea

Na faamatala mai
e Peresitene Boyd K.
Packer (1924–2015),
le Peresitene o
le Korama a



Aposetolo e Toasefululua, se tasi o faamanuiga e mafai ona tatou faamoemoe e maua pe a tatou ofuina ma le tatau le ofusa: "O le ofusa e suitulaga i feagaiga paia. E faamalosia le tauagafau ma e avea o se talipupuni ma se puipuiga i le ofuina."¹

O lenei talipupuni e mafai ona puipuia i tatou mai mea ua taua e Nifae o "ufanafana mu a le fili" (1 Nifae15:24). Ana mafai ona tatou fuafuaina le tele o ufanafana e velo mai e Satani ia i tatou i aso taitasi uma, ou te vaai faalemafaufau o le fuainumera o le a pei o fetu o le lagi. Ua tatou ola i se lalolagi o loo taumafai malosi e faaleaga mea tatou te talitonu i ai. E siomia i tatou i soo se mea i ata ma savali le talafeagai, faapea ai ma le vevesi mai e faaaoga vailaau faataumaoi pe solia le tulafono o le ola mama. Esili atu ona masani ai o le vevesi ma le faaosoosoga e finau ma agaleaga, pe i le tino po o luga o upega tafailagi; e ulagia ai pe faamaasiasi ai isi i le faaalia o latou manatu ma talitonuga; po o le ula

i se tagata mo sina mea itiiti lava e pei o se mea sese tau tusitusi. O nei osofaiga faaleagaga, a faapea e usitaia, e faapogisaina ai o tatou mafaufauga ma faaititia ai lo tatou mafai ona lagonaina lapataiga mai le Agaga Paia.

O le lisi o "ufanafana mu" o lo o velo mai e Satani ia i tatou e moni lava e le mavae ma e matautia i taimi uma lava. Na fai mai Elder Tanieli B. Wakolo o le Fitugafulu, "O mea faalavefau ma faaosoosoga o le olaga e pei lava o ni 'luko feai.'" E faapefea la ona tatou puipuia i tatou lava? Mulimuli ane i lena lava tautalaga, na ia faaopoopo ai, "Ou te folafola atu o le auai i sauniga ma le faamamaluina o feagaiga e fesoottai i ai o le a aumaia ia te outou le malamalama ofoofogia ma le puipuiga i lenei lalolagi ua matua faapogisaina."²

Afai o "ufanafana" o loo tauai mai e Satani ia te oe o ni mea maamaai moni lava e mafai ona e vaai i ai ma lagonaina, pe e te tuua se talipupuni i le fale? Pe o le a e le amanaiaina ea le

malamalama o le auala e puipuia ai oe lava—po o le ala i se nofoaga malu? Pe o le a e faatuai ea ona osia ma tausia feagaiga ma le Atua ae na la folafola mai o na feagaiga o le a fesoasoani ia te oe e te manumalo ai?

O le Mana o Feagaiga i lo Tatou Alualu i Luma

O le puipuiga e tuuina mai e le ofusa e le oo mai i soo se ituaiga o maneta i le ofusa faaletino lava ia, e pei ona talitonu sese ai nisi. Nai lo lena, o le puipuiga ua folafolaina o le puipuiga a le Alii e tuuina mai faaletino ma faaleagaga pe a tatou tausia a tatou feagaiga ma faaalia lo tatou tuuto faamaoni ia te la i aso uma.

O feagaiga o le malumalu ma le ofusa e le mo tagata atoatoa. Ua fuafuaina e fesoasoani e talipupuni ma puipuia tagata le atoatoa o e o loo taumafai i le mea sili latou te mafai ia avea ai ma tagata e sili atu. O tagata o e salamo pe a latou pauu ma agai pea i luma. O tagata e pei o oe ma a'u.

E pei lava ona tatou tagofia faaletino le faamanatuga i vaiaso taitasi ia manatua ai ma faafou a tatou feagaiga o le papatisoga, o le faia o le ofusa i aso uma e avea o se faamanatu faitino o feagaiga na tatou osia i totonu o le malumalu. O mea nei tatou te manaomia i la tatou malaga i le avea atili ai faapei o Keriso.

I tua atu o le puipuiga faalelagi, o le tausia o a tatou feagaiga ma le ofuina o ofusa o se auala lea e faaali atu ai i le Atua i aso uma le tele o lo tatou alofa ia te la, ma o le a tatou mulimuli i Ana poloaiga *ona* tatou te alolofa ia te la—ma o se ala lea mo i tatou e maua ai le tele o faamanuiaga e finagalo le Atua e tuuina mai ia i tatou. E alofa moni lava o la ia i tatou e sili atu i le mea e mafai ona tatou malamalama ai ma e finagalo o la ia tatou saogalemu ma ia maua le puipuiga na la folafola mai.

Faamanuiaina i Aso Uma

O loo tatou tau pea i aso taitasi i se taua faaleagaga, pe tatou te iloaina pe leai. O feagaiga e osia i totonu o le malumalu ma tausia i o tatou olaga i aso taitasi o le a fesoasoani ia i tatou e manumalo ai i le agasala ma Satani, ae e pule lava i tatou pe saunia—ma ona faatuatua lea.

Ou te matuai fafia lava mo lau filifiliga e ulu atu i le malumalu—ma mo isi filifiliga na sosoo ai ua ou faia ina ia tausia au feagaiga. Ua faamanuiaina au i aso taitasi mo lau filifiliga ma mo le ofuina tatau o le ofusa, e pei ona ou osi feagaiga e fai. Ua ia faatumauina lou saogalemu. Ua ia faamanatu mai ia te au au feagaiga. Ma ua ia faaalia i le Atua ou te alofa ia te la e

sili atu i le lalolagi ma o le a ou faia mea ua la tau mai ia te au e fai. ■

E alaala le tusitala i Hawai'i, ISA.

FAAMATALAGA

1. Boyd K. Packer, *The Holy Temple* (1980), 75.
2. Taniela B. Wakolo, "O Sauniga Faaola o le a Aumaia ia i Tatou le Malamalama Ofofogia," *Liahona*, Me 2018, 40, 41.

AOAO ATILI

- Aoao atili e uiga i malumalu, sauniunga mo le malumalu, ma sauniga o le malumalu i le temples.lds.org.
- Maimoa i se vitio na saunia e le Ekalesia lena e mafai ona fesoasoani e faamatala ai ofusa o le malumalu i isi i le mormonnewsroom.org/article/temple-garments.





TOE VAAI AGAI I le Malumalu Paia

Saunia e Mahesh Kumar Vedurupaka

Na ou iloaina ou te manaomia le toe foi i le malumalu ia malamalama atili ma manatua feagaiga na ou osia.

I le fa tausaga talu ai, na fai atu ai Uso Suresh Natrajan, o lou faiaoga o le inisitituti, i le vasega, "E toafia outou ua o i le malumalu?" Ona o au ma lou toalua, o Anantha, na faia se malaga e 10 itula i le Malumalu o Hong Kong Saina mo le taimi muamua i le tausaga talu ai, na ou sii i luga lou lima ma le mitamita. Ona ia fai mai lea o se isi fesili: "Tou te manatua feagaiga na outou osia i le malumalu?"

O lana fesili na loloto. Na matuai tele naua mea e manatua i lou taimi muamua i le malumalu. Ao ou taumafai e mafau-fau, i le mavae ai o lena taimi atoa lava, na ou iloaina ua galio ia te au feagaiga na ou osia i le malumalu. I le taimi lava lena, na ou faia ai le filifiliga e toe foi i le malumalu mo le taimi lona lua ma o le taimi lea ia taulai atu ma manatua feagaiga na ou osia ma isi mea e taua mo lou faaolataga.

Ua mavae se taimi. Ua ou feagai ma ni tofotofoga matautia i lo'u lava olaga. Ae sa ou lesitala i se vasega inisitituti, ma i se tasi aso na fai ai se matou lesona i le perofeta o lona. E lei manao lona e fai le mea na poloaiina ai o ia e le Alii e fai. O se

tasi o fuaiupu na taia ai lou mafaufau o le lona 2:4: "Ona ou faapea ai lea, ua lafo-aiina au ai luma o ou fofoga; a ou te toe faasaga atu i lou malumalu paia."

Na ootia lou loto i lenei mau, ma na ou tatalo i le Tama Faalelagi e tuu mai ia te au ma lou toalua se avanoa e asiiasi ai i le malumalu.

I le mavae ai o le fa tausaga, na faamanuiaina i maua e le Tama Faalelagi e toe ulu atu i Lona maota, o le taimi lea i le Malumalu o Taipei Taiuani.

A o i ai iina, sa ou maua le avanoa e fai ai ni sauniga mo le uso o lou tama na maliu i le kanesa. Ao papatisoina au mo ia, na ou mafaufau i faamanuiaaga o le a ia maua e ala i lenei sauniga o le malumalu. Sa ou matuai fiafia lava, ma na ou iloaina le mea na tau mai e le peresitene o le malumalu ia te au ina ua ou sau i le malumalu mo le taimi muamua lava ae na fai si le mautonu. Na ia tau mai ia te au, "Uso, atonu e te le malamalama i mea uma o loo e faia i le taimi nei, ae o le a oo mai le aso o le a e lagona ai na e faia ni mea maoae iinei."



Ua ou maua lau tali. Na fa tausaga mo au e malamalama ai e ala i le asiasi atu i le malumalu mo le taimi lona lua.

O lenei la, ao tago atu i le faamanatuga i vaiaso taisi, ou te manatua le mamana tele o le Togiola a lesu Keriso ma le paia tele o feagaiga na ou osia i totonus i le malumalu.

O le tausaga lenei o le lona 10 lea o tausaga o lau faaipoipoga ma lou toalua. Ou te manao e faamanatu i le malumalu ma faia sauniga faamau mo ou tuaa. Ina ia faia lenei mea, ua ou faigaluega i se galuega lona lua mai lau galuega masani, se galuega e le afaina ai lou taimi ma lou aiga.

Ou te iloa ma ou te lagonaina o galuega faalemalu e moni. E leai se isi mea e mafai ona suitulaga ai, ma e matuai aoga ai lava soo se osigataulaga ina ia auai i le malumalu ma faia le galuega a le Tama Faalelagi mo i tatou lava ma mo agaga o loo i le isi itu o le veli. ■

E alaala le tusitala i Andhra Pradesh, India.



Mahesh ma Anantha Vedurupaka i luma o le Malumalu o Taipei Taiuani.

FAAEEGA PAIA O LE MALUMALU F&T

Afai o loo e sauni e alu i le malumalu mo le taimi muamua, fatau la matou F&T i le vaega faatekinolosi o lenei tusiga i le Gospel Library po o i le liahona.lds.org. O se tasi lea o fesili e lima o le a e maua.

O le a se mea e mafai ona ou faia ia malamalama atili ai i le faaeega paia o le malumalu ma feagaiga ou te osia iina?

Taulai atu i aoaoga ma feagaiga o le malumalu i lau suesuega patino. Saili mo mau fesoootai i mataupu faavae ma feagaiga o le faaeega paia o loo maua i tusitusiga paia, lauga o konafesi aoao, ma isi tusitusiga a le Ekalesia. O le iloiloina o nei upumoni i lau suesuega patino o le a fesoasoani ia te oe e tuputupu ae ai i lou malamalama i sauniga ma feagaiga o le malumalu. Pe a suesueina le tulafono o le ola mama, mo se faataitaiga, e mafai faapeafea e le amiosao o losefa ina ua faaososoina e le ava a Potifara ona faamanuiaina lou naunau e usiusitai i lenei tulafono? (tagai Kenese 39). E mafai faapeafea e le naunau o Nifae e usiusitai i poloaiga a le Atua ona faaaoga i le ala e te vaai ai i lau auauanga i lou valaauga? (tagai 1 Nifae 3:7).

Toe foi i le malumalu i le tele o taimi e mafai ai e lou tulaga faaletagata.

"Tatou te mauaina uma faatonuga tutusa, ae o lo tatou malamalama i le uiga o sauniga ma feagaiga o le a faateleina a o tatou foi atu e le aunoa i le malumalu ma le agaga o le aoaoina ma le mafaufau i upu moni e faavavau na aoaoina ai."

Silvia H. Allred, fesoasoani muamua talu ai i le Au Peresitene Aoao o le Aualofa, "Malumalu Paia, Feagaiga Paia," *Liahona*, Nov. 2008, 114.

Alu i le [lds.org/go/031949](https://www.lds.org/go/031949) e fatau se tusiga lena e mafai ona fesoasoani ia te oe e malamalama ai i feagaiga tatou te osia i le malumalu ma le Atua.



COLORADO
54
STATE LEAGUE
SPORTS

Ou te Fiafia i Talafaasolopito o Aiga!

Ou te lei fiafia i taimi uma i galuega o talafaasolopito o aiga. O lena mea na suia ina ua papatisoina au mo se tasi o ou tuua i le Malumalu o Chile Santiago.

Sa avea au o se tiakono i le taimi muamua na ou alu ai i le malumalu. Ina ua ou sauni e ulu atu i le vai papatisoga, na ou lagona le i ai o se tagata ua ulu mai i le potu. Sa ou ea ae ma vaia ai se toeaina o ofuina ni ofu tuai. Sa ou lagonaina lona alofa ma le faafetai mo au aua o loo ou faia lona galuega sui. Ina ua uma ona ou papatiso mo ia ma sau i luga mai le vai, na ou autilo solo mo ia, ae ua le o i ai o ia iina.

Na masani ona ou mafaufau o le malumalu e saunia igoa mo galuega o le malumalu, o lea na ou le fiafia ai i le faia o sailiga o talafaasolopito o aiga. Ae o lenei aafiaga na faaoso ai lou fiafia e uiga i le sailia mo ou lava igoa o le aiga.

I se tasi aso na ou alu ai i lau komepiuta ma vaai ai na ou mauaina se imeli mai le Eklesia faatasi ma se igoa o le aiga. Na ou lagonaina sa ou manaomia le toe sailia o isi igoa, o lea na ou fesili ai i lou tina pe faapefea ona saili lelei mo igoa ma ao mai nisi faamatalaga e uiga i ou tuua.

O le taimi nei, ua ou maua ni igoa e 11 o le aiga, ma ou te iloa e mafai ona ou maua nisi igoa e sili atu. O nei tagata e lei maua le avanoa e papatiso ai ao i ai i le lalolagi, ma na latou faatalitali mo se taimi umi mo o latou galuega faalemalumalu ia faia. Ou te fiafia e mafai ona ou fesoasoani ia i latou e ala i galuega o le malumalu ma talafaasolopito o aiga.

Lucas,

16 tausaga, Santiago, Chile

I LE VAEGA LENEI



60

52 O Le a Le Mea e Moni Ae O le A e Le Moni?

Saunia e Elder Carl B. Cook

55 "E Moni, E Moni."

Saunia e David Muanda

56 Mauaina o le Masani Faalekonafesi

58 Toefaatupuina o le Lototele i Lo'u Lava Taua

Taofia le igoa

60 Mauaina o Vavega i le Olaga o Aso Taitasi

Saunia e Breanna Call
Herbert, Alex Hugie, ma
Aspen Stander

63 Pepa Lautele o I Ai se Savali: Taimi i le Malumalu

64 O Le Upu Mulimuli Faalo- goina o Le Siufogfa o le Alii i le Konafesi Aoao

Saunia e Elder Neil L.
Andersen



Saunia e Elder
Carl B. Cook

O Le Au Peresitene
o Fitugafulu

O LE ALE MEA E MONI

Na ou feiloai talu ai nei i se tamaitai talavou ofoofogia, e 17-tausaga o Caylee, ao ia faasoa mai ona lagona ootia i se konafesi a le siteki. Na ia folafola mai faapea e moni le Atua, e moni le Ekalesia, ma o Peresitene Russel M. Nelson o le perofeta a le Atua. Na ia tuuina mai foi se molimau malosi faapea o mea le lelei ua tau mai e nisi e uiga i le Ekalesia ma le talalelei a lesu Keriso e sese.

Na ou ofo i le talitonuga a Caylee ma lona mafaia ona iloa po o le a le mea e moni ma o le a le mea e le moni.

Ae na sili lou ofo ina ua ou talanoa ia Caylee i le maea ai o le sauniga ma iloa ai lona popolega ma o le talitonuga e lei faigofie ona oo mai. O le mea moni, na ia onosaia se luitau faigata i lona faatuatua.

O le mea lea na ia faasoa mai.

Tauiviga e Saili ni Tali

Na toaga lava Caylee i le Ekalesia. Ae ui i lea, ao ia amata ona mafaufau loloto e uiga i le talalelei ma le Ekalesia, na oso mai i lona mafaufau ni fesili faigata. Na ia lagonaina le nofosala mo le fesiligia ma amata loa ona suesue mo ni tali.

"O lou faafitauli," na fai mai ai Caylee, "o lou saili lea i nofoaga sese uma lava. Nai lo le sailia o tusitusiga paia po o lauga o konafesi ma talanoa i ou matua, na ou tau i ni tusiga i upega tafailagi na tau maia latou te maua-inia uma tali i au fesili."

I le amataga, na manatu Caylee o tusiga i upega tafailagi na faasusuluina le malamalama i ana fesili. Ae ui i lea, ua ia fai mai ai, "Ao ou faaaauau pea ona suesue i au fesili, o mea na ou faitauina na faatumuina au i isi ma isi mau fesili ma isi ma isi masalosaloga."

Na amata ona leai se faatuatua ma se faamoemoe o Caylee. "Na amata ona tau



MA O LE A LE MEA E LE MONI?

emoemo le malamalama o lau molimau," ua ia manatuaina, "ma na amata ona ou taofia le faia o mea sa aoaoina ai au—faitau tusitusiga paia ma tatalo, ma auai i le seminare."

Na iu lava ina lofituina o ia i le pogisa ma le le mautonu na ia lagonaina. Ua ia fai mai, "Na le mafai ona ou filifili po o fea le mea e mai le Atua ae po o le a le manatu valea lea ua fenumiai ma fatuina e se tasi e faapogisaina ai au. Sa le toe mafai ona ou filifili po o fea le mea sao ae o fea e taufaasese. Na faale-againa ai au."

Ua faatusa e Caylee lona tulaga ia losefa Samita ina ua ia saunoa mai, "Ina ua mavae se taimi, sa oo ina ou taunu i le faaiuga o lo'u tumau pea i le pogisa ma le fenumiai, pe ou te faia e pei ona faatonu mai e lakopo, o lona uiga, ia ole atu i le Atua. Ina ua mavae se taimi sa ou filifili e 'ole atu i le Atua, [lakopo 1:5], i le manatu ifo afai e tuu mai e ia le poto ia i latou ua leai se poto, ma foai tele mai, ma lē ta'uta'ua mai, atonu o le a ou taumafai i ai." (losefa Samita—Talafaasolopito 1:13).

*Pe sa e
mafaufau ea
pe e faapefea
ona fuafua po
o le a moni lava
le mea e moni?*

Talanoa i Tagata Na te Talitonuina

I lea taimi faigata, na aapa atu Caylee i lona faiaoga semi-nare, lona tinamatua, ma lona tina. Na faamautinoa atu e lona faiaoga seminare ia te ia faapea o ona lagona e le sese ma e le na o ia le tagata e i ai ni fesili. Na faasoaa atu e lona faiaoga lana molimau ma fautuaina e faitau tusi na e mafai ona fesoasoani ia Caylee i lana sailiga.

E lei lauga atu le tinamatua o Caylee ia te ia. Na o lona uunaia faigofie lava o ia e mafaufau po o fea punaoa o faamatlagaa e siitia ai o ia—faamatlagaa i upega tafailagi po o aoaoga faavae o le Ekalesia? Na amata ona faatusatusaina e Caylee: "O le fea na siitia ai au? O le fea na aumaia le olioli ma le filemu i lou agaga? O le fea na aoaoina au faapea o le a ou faatasi ma lou aiga e faavavau i se tulaga o le fiafia e-le-iu pe afai ou te mulimuli i poloaiga a le Atua? O le fea e tuuina ni leo malo-maloa i lou mafaufau?"

Sailiga o le Atua e ala i le Tatalo ma Tusitusiga Paia

Na uunaia e le tina o Caylee o ia e tatalo. Na iu loa, ina alu atu Caylee i lona potu ma sasaa atu lona loto i le Atua. Ua ia faamatala mai: "E leai se mea na tupu. E lei o mai i lalo ni agelu. E lei faatumuina lou loto i le filemu ma le agaga faafetai. Na ou toe foi atu i lou tina. Na ma tatalo faatasi, ona ia uunaia lea o au e faitau le Tusi a Mamona mo le 10 minute. Ao ou faitauina, na ou lagonaina se folafolaga i lou loto faapea afai ou te faaauau pea ona faia o lea mea, o le a ou vaai i faamanuiaga. O le a mafai ona ou vaai ma iloa po o fea aoaoga na oo mai le Atua ae o fea e leai."

Na amata ona tatalo Caylee i aso uma ma faitau le Tusi a Mamona. Na ia aloese mai le saite o le Twitter ma uepisaite na amataina ona masalosaloga i le taimi muamua lava. Na ia alu i le seminare ma le manatu e aoao, ae aua le vaai mo manatu le lelei e uiga i le Ekalesia.

Filifili Po o Fea E Moni

Pe a ma le lua vaiaso mulimuli ane o le taumafaiga faifai pea, na ia lagonaina ai na leo le lelei ua faifai malie atu lava. Na faasolo ina sili atu ona lelei le aoga. O galuega na sili atu ona fiafia i ai, ma na ia maua se mafutaga sili atu ma ona matua. Na sili atu lona fiafia.

Ona o lena fiafia, ua ia fai mai ai, "Na iu lava ina ou vaai i lau tali. Na mafai ona ou filifili po o le fea e mai le Atua ae po o le fea e leai aua na ou vaaia au lava ia i mea na la faia mo au pe a ou faia mea Na te tau mai e fai."

"Ua na o le pau lava lena," na ia faaiu ai, "o le ala e mafai ai ona e filifili moni lava po o le fea e mai le Atua ae o le fea e leai. E mafai ona tatou suesue ma mafaufau loloto ma fesiliglia mea uma tatou te mananao ai, ae sei vagana ua tatou faia e pei ona faatonuina mai e lakopo ma le mea na fai e Iosefa Samita—ole atu ma faia loa—ona faatoa mafai lea ona tatou iloa moni lava po o le fea e moni ae o le fea e leai."

O le a la se mea tatou te aoao mai le aafiaga o Caylee?
O ni nai manatu nei.

- E le tatau ona tatou maua se lagona leaga pe a i ai ni a tatou fesili.
- E le tatau lava ona tatou taofia le tatalo ao tatou saili mo ni tali.
- E tatau ona tatou suesue ma mafaufau loloto i le Tusi a Mamona.
- E ala i le filifilia ma le faaeteete po o a mea tatou te fai-tauina ma faalogoologo i ai, e mafai ona tatou tapeina leo malomaloa o tekinolosi ma agafesootai na e tosoina ese i tatou mai le upumoni ma fuafua e faaleagaina i tatou.
- E tatau ona tatou fefautuaai ma tagata tatou te iloa, alolofa i ai, ma faaaloalogia—nai lo le saili atu o le fesoasoani mai tagata ese.
- O le a iu lava ina tali mai le Atua ia tatou fesili i Lana lava ala ma Lana lava taimi. E alofa o la ia i tatou.
- O le a oo mai tali ao tatou fai le finagalo o lo tatou Tama Faalelagi—ae le pe a tatou faia mea ua tau mai e le lalolagi.

Ua uunaia au e Caylee ma tamaitai talavou ma alii talavou ua saunia e le Atua mo lenei taimi. O ia, e pei o le toatele o outou, e pei o le ituaiga o tagata na vaaia e Peresitene Russell M. Nelson: "Matou te manaomia tamaitai e i ai le meaalofa o le iloatino o e e mafai ona iloa taualumaga i le lalolagi ma iloaina i latou o e e le faavaea i upumoni pe lamatia foi, e tusa po o le a le lauiloa i fea."¹

O outou o tagata saili i le upumoni, o tagata tausia feagaiga, ma tagata e fausia le malo. Faatasi ai ma le fesoasoani a le Atua ma e ala mai le mana o lesu Keriso ma Lana Togiola, e mafai ona e maua le meaalofa o le filifili ma iloa, ola, ma faasoa atu le mea e moni. ■

FAAMATALAGA

1. Russell M. Nelson (upusii a Boyd K. Packer), "O se Talosaga i Ou Tuafafine," *Liahona*, Nov. 2015, 96.



LA SAINTE BIBLE

Ina ua ou tatalo mo se molimau o le Tusi a Mamona, sa leai
se mea na tupu—seia iu ina amata ona ou faitauina le Tusi Paia.

Saunia e David Muanda

I na ua ou pe a ma le 12 tausaga, sa ou manao
ia iloa e a'u lava ia e moni le Tusi a Mamona.
I se tautalaga, e mafai ona ou molimau atu
ai o le Tusi a Mamona o le afioga a le Atua ona
sa fai mai ai lau faiaga o le Peraimeri. Ae o
totonu o au lava ia, sa ou le malamalama i le
uiga o lena mea.

Sa ou iloaina le folafolaga a Moronae
loloto, ma tatalo, e mafai foi ona ou iloa (tagai
Moronae 10:3-4). Sa ou faitau mo ni vajaso
mea maoae—leai se susulu, leai ni agelu, leai
se leo. I le iuga, sa ou tuua le fuitauina o le Tusi
a Mamona.

I se tasi aso ao suesue i le Esoto, na ou fuitau
ai ao tau leai ni meaai i Israelu, na auina atu e
le Atua le manai ia te i latou. O tagata taitiasi.
sa ave se aofai faatulagaina i aso taitiasi. Na la
auina atu ia i latou ni meaai, ae sa fuitalia i latou
ma fuafua le faaputuina.

Na oo mai ia te au upu a Nifae: "E le tuiuina
mai e le Alii ni poloaiga i le fanauga a tagata,
vagana o le a saunia e ia se ala mo i latou ina
ia mafai ai ona latou faataunuina le mea ua ia

"poloaiina ai i latou" (1 Nifae 3:7). Mai lea mea
na ou malamalama ai na poloaiina e le Atua
Israelu e tuua Aikupito ma fuafua e tausia lo
latou fia aa. O lenei mau o le Tusi a Mamona
na faalauteleina ai lou malamalama o le Tusi
Paia, ma sa ou faapea ai loa o le Tusi a Mamona
o le afioga a le Atua.

E pei ona faamatilaina e Elder David A.
Bednar o le Korama a Aposetolo e Toasefululu,

o faaaliga faaletagata lava ia e sili atu ona pei
o le oso lemu ae o le la nai lo le malamalama e
faafusei ona maua pea ki se moli.¹ Sa amata
ona ou vaai i le Tusi a Mamona i se itu e ese.

I masina na mulimuli ane ai, sa ou iloa moni
lava nai lo o se isi lava taimi o le Tusi a Mamona
o le afioga a le Atua. O le uunaiga na oo mai
pea lava pea ia te au e ala i le leo o le Agaga, o
le "E moni, e moni, e moni."

Ou te fuitau pea i le Tusi a Mamona toeitiiti
a o aso uma, ma taimi uma, ma o taimi uma ou
te faalogo ai i upu nei: "E moni." ■

FAAMATALAGA


1. David A. Bednar, "O Le Agaga o Faaaliga,"
Liahona, Me 2011, 87-90.

E alala le tusitala i le Ripapeika Faatemokalasi o le Congo.

"E moni, E MONI"

LE
LIVRE
DE
CPMON

MAUAINA O LE MASANI FAALEKONAFESI



O nisi nei o mea e mafai ona e faia e maua ai le masani faalekonafesi mo le olaga:

Eoo mai i Aperila taitasi ma Oke-topa taitasi. Atonu, ua e masani i le masani faaleafatausaga. Ae e mafai faapefea ona e mautinoa o se vaega moni lava o lou olaga—mo le taimi o totoe o lou olaga?

I le lumanai, pe a tuua na o oe, o le a se mea o le a e faia i ono masina taitasi pe a taamilo mai le konafesi? la faia se filifiliga nei ina ia pulea le mana o lenei vaega e tupu faalua-i-le tausaga e ala i le auai. Aua le tau ina faapea atu "O le a ou matamata i ai i le initonet i se taimi." Avea le konafesi o se gaoioiga taua ma o se masani i lou olaga.

1

FAATU SE SINI.

O le faalogo i perofeta ma aposetolo soifua o se tasi o mea e sili ona taua e mafai ona e faia. Taumafai ia maimoa i sauniga uma i le vave e te mafaia. Taumafai e fuafua se aso ma le taimi o le a e matamata ai i sauniga uma lava.



2

FAASAO LE ASO.

I le mea sili e mafaia, ia faasao se taimi ia aafia ai i le konafesi ma ia faavanoa lau kalena i soo se taaloga lava, gaoioiga ma uo, po o isi mea e faalavelave. Afai e le mafai ona e faalogo i le konafesi aoao i le taimi lava lena e sau ai, e mafai lava ona e faia o se gaoioiga ma fuafua se aso e matamata ai.





3

IA FAI NI TU MASANI.

O nisi o tu masani aoga e mafai ona aofia ai talanoaga faaleaiga o lauga e fiafia i ai, tatalo faaleaiga ae lei amata se sauniga, po o le faia o se lisi o upusii patino. O tu masani malie e mafai ona aofia ai meaai—taumafa po o meaai mama ma ni nai mea malie, igoa e fesootai ma le konafesi (meaai mama o le konafesi, nachos grandes de conferencia, aisa kulimi musuia, po o ni karoti o le konafesi).

4


IA I AI SE FUAFUAGA MO LE MAVAE AI O LE KONAFESI.

Avea lauga o le konafesi o se vaega o lau suesuega masani o le talalelei. E mafai ona e faitauina se lauga o le konafesi i Aso Sa taitasi mo le isi ono masina, faalogo i se tasi i luga o le pasi po o totonu o le taavale i aso taitasi mo le lua vaiaso, pe sue uma mau mai le konafesi i le taimi o suesuega faaletusi-paia patino. Po o le a lava lau filifiliga, fai se fuafuaga ia fai loa. ■



"Ia suesue e le aunoa i savali o lenei konafesi—pe faisoo foi—i le isi ono masina o sosoo ai nei. Ia tagai ma le toto'a i ni auala e faaaofia ai nei savali i a outou afiafi faaleaiga, o au aoaoga o le talalelei, o a outou talanoaga ma aiga ma uo, e oo lava i a outou talanoaga ma i latou e le o nisi o la tatou faatuatuaga."

Peresitene Russell M. Nelson,
"Faamalosi la i le Galuega Nei,"
konafesi aoao Ape. 2018.





*O le aoao e uiga i o'u
augatama na ou maua
ai le lototele e tau ma
o'u taua faaleagaga.*

LOTOTELE I

Taofia le igoa

Le pe a ma le 11 o o'u tausaga, sa ou amata iloa ai ponokalafi. O lena mea e tasi na tuputupu ae o se faafitauli tele atu na faapea ona avea ma tauiviga aupito tele ao o'u avea ma se tagata talavou. E oo ane i le taimi na ou i ai i le aoga maualuga, ua ou liliuese mai ponokalafi ae agai atu i le Togiola a lesu Keriso. E ui ina sa ou maua se vavega i le tapeeseina o le eleelea mai lo'u mafaufau, ae sa ou lagona-inia pea i lo'u loto le lofituina o le tausalaina.

Pe a o le vaitaimi lea, sa nono mai ai e lo'u tinamatua le tusi o talaaga tusi-tusia o le olaga o le tina o le tina o tinamatua o Thea. I totonu o ni nai aso, na ou lagona le matuai loloto o lo'u pipii atu ia Thea Martina Waagen (1883–1967). Sa maliu faafuasei le tama o Thea i ni nai masina a o lei fanau mai o ia, o lea sa tausia ai o ia e lona tina sa malaga mai Nouei, ua oti lana tane. Sa faigata le tuputupu ae, ae sa ia maua le olioli i le tauina o vivao ma le taina o le okeni i lana lotu Luteru i le latou nuu. Sa toe faaipoipo le tina o Thea, ma faatasi ai ma le fesoasoani a le toala o lona tina, sa aoga ai o ia i le kolisi. Mulimuli ane i le olaga, sa liliu mai Thea ma lona aiga i le Ekalesia ma siitia atu ai i luta, ISA. Sa le faigofie ia mea mo Thea. Sa tetea o ia ma lona toala. Sa ia oo i le loloto o le lototiga ma le ogaoga o le atuatuvala, ae sa ia tumau faamaoni pea i lana molimau.

A o ou aoao e uiga ia Thea ma lana filifiliga ia onosai pea e ui i faigata, sa lofituina a'u i se alofa malosi na faapea ona faatupuina ai lo'u lototele e

ATA NA TUSIA E ALEX NAVABUM



LO'U TAUUA

uiga i lo'u tauua ma sa fesoasoani ou te faatoilaloina ai lo'u faataupepe i le tausalaina. Sa ou iloa ai, afai na mafai ona ia faia ia mea faigata, ou te mafai foi.

Sa ou alu i le LDS.org ma talosagaina le faamanuiaga faapeteriaka o Thea. Sa atili ai lo'u ootia ina ua ou faitauina, "O le a tulai mai fua o ou sulugatiti ma valaau ia oe amuia oe i fafine i Siona." Sa ou iloa ai o lo'u faaaloalo loloto mo ia o se faataunuuga lea o lena fuaiupu faatauvaa. O le alofa o Thea sa fesoasoani e faamalolo ai lo'u loto i le tausalaina ma liliu atu ai lo'u loto i o'u augatama. O la'u molimau muamua lea i le folafolaga a Elder David A. Bednar e faapea, o le auai i le galuega o talafaasolopito o aiga, o le a "puipuia ai [a'u] e faasaga i faatosinaga malolosi a le fili" ("O Le a Liliu Atu Loto o Fanau i o Latou Tama," *Liahona*, Nov. 2011, 27).

Ua ou lagonaina se fuataga faaopoopo o le malosi ma le manino i lo'u olaga a o faaauau ona ou sailia o'u aiga ma aoao i a latou tala. O le auai i taimi uma i gaoioiga o talafaasolopito o aiga, ou te lagona ai le pei e maua se autau atoa o aumea o e e fesoasoani ia te au e tauina a'u tauua faaleagaga. E mafai ona ou ola e aunoa ma le fefe aua, "e toatele ua ia te i tatou [o o tatou augatama] i e ua ia te i latou [o au a Satani]" (2 Tupu 6:16).

E ui ou te le'i maua ni afe o igoa o le aiga e ave i le malumalu, ae ua ou aoaoina i tala a o'u augatama ma sueina o latou aiga e ala i suesuega toto'a. Ua ou faaluina le taimi e manatua ai o latou olaga ma faaaloalo ai i o latou talatuu. Ou te iloa ua faamalosia ma puipuia e faasaga ia Satani a'o ou faatumulia lo'u olaga i le malamalama e uiga i lo'u aiga. ■

Mauaina o **Vavega** i le Olaga o Aso Taitasi

Saunia e Breanna Call Herbert,
Alex Hugie, ma Aspen Stander

Mekasini a le Eklesia

*Afai tatou te vaai i le
olaga e ala atu i ni
tioata o le faatuatua
ia lesu Keriso, o le a
matala o tatou mata i
le tele o vavega o loo
siomia ai i tatou.*

O le a le Vavega?

Ua tatou iloa uma le vavega, e sa'o? O Mose na vaeluaina le Sami Ulaula. O le Faaola na tuuina atu le pupula i se tagata tauaso O se fafine na faamaloloina mai se mai tuga. O se tasi o vavega e aupito tulagaese lava o le Togiola a lesu Keriso—e lei i ai lava se isi vavega e faavavau pe mamana. Ae pe na o le pau lena o ituaiga o aafiaga na e taua o vavega?

O NISI MAFUAAGA E FAATINO AI E LE ATUA VAVEGA

- E faaalia ai Lona mana
- E aoao ai se mataupu faavae
- E faamaonia ai se faa-aliga talu ai
- E faamaonia ai ma faamalosia le faatuatua
- Ia faanatinati ai Lana galuega

Na saunoa mai Peresitene Dallin H. Oaks, le Fesoasoani Muamua i le Au Peresitene Sili, "E tele vavega o loo tutupu i aso uma i le galuega a la tatou Eklesia i olaga o o tatou tagata."¹ Ae o anafea le taimi mulimuli na e vaai ai ua siitia se mauga pe vaai i ni nai i'a ma ni nai falaoa ua fafagaina ai le fia afe? O le tele o i tatou atonu e lei vaai lava i se mea faapea. E faapefea la ona moni le saunoaga a Peresitene Oaks?

E tusa ai ma le Bible Dictionary, o vavega o ni "faaaliga o le mana faalelagi po o le faaleagaga."² I lena faamatalaga, sei tatou pupula o tatou mata i vavega e tele na o loo siomia ai i tatou—vavega na tatou te le ono mafai ona iloaina.

Tatou te vaiai moni lava le aao o le Atua i olaga o Ona tagata e ala i vavega i tusitusiga paia. Ae tatou te mafai foi ona vaai i Lona mana faaleagaga pe a

tatou fesoottai e toeitiiti lava i soo se tasi i soo se mea. Ua mafai ona vaiai le mana o le Atua i vaega uma o o tatou olaga.

Aisea e Faatino ai e le Alii Vavega?

E oo mai vavega i le tele o ala, ae ua faatinoina e le Atua mo faamoemoega lava e tasi. O nisi taimi o vavega e faamalolo, faamafanafana, pe puipuia fanau a le Atua faaletino, ae o nei aoga e vaiai e le pau ia

E i ai vavega e tele ina galo ia i tatou: o le la e oso ma toe goto atu i aso taitasi; o tamai fatu e tutupu i ni laau tetele.

tatou maua se tali i se tatalo, faamalosia a tatou molimau, pe maua se suia o le loto.

Ma le isi, e i ai isi vavega e galio ia i tatou: E oso ae ma goto le la i aso taitasi; o tamai fatu e tutupu i ni laau tetele; o le tele o vaega o lo tatou tino e galulue faatasi, ua mafai ai ona tatou manava, tamomoe, fai miti, ma aai. Le maoae o le atamai musuia i vailaau ma tekinolosi o loo tupu i aso taitasi, ma ua mafai nei ona

o mafuaaga mo vavega. E masani lava, o se vavega e le taofia ai le puapuaga po o se faalavelave. E faatinoina e le Atua vavega mo mafuaaga autu e lua: ia faamalosia le faatuatua ma ia faataunu ai le lelei.

E masani lava, o vavega e faaalia ai le mana o le Atua i Ana fanau pe aoaoina ai se mataupu faavae faaleagaga. Ua tau mai e le Bible Dictionary faapea o vavega e tele a lesu Keriso "na faamoemoe ia avea o se faamaoniga i tagata lutaia

faapea o lesu o le Keriso" ma aoao ai mataupu faavae e pei o e tauia, salamo, faatuatua, ma le alofa.³

O isi taimi, o vavega e mafai ona faamaonia se faaaliga talu ai, e pei o faailoga o le fanau mai o Keriso i le atu Amerika. E mafai foi e le Atua ona faaaoga vavega e faanatinati ai Lana galuega—galuega o talafaasolopito o aiga, galuega faafaifeatalai, ma isi.

Ae afai tatou te sailia vavega mo mafuaaga sese, e mafai ona tatou oo i ni puapuaga. O le faafitauli e masani ona tupu e oo mai pe a tatou sailia faailoga o se faamaoniga o le i ai o le Atua. Afai tatou te le faaopoopoina se faatuatua i le faafitauli, o nei faailoga o le a le taitai atu lava i le liua moni, faavavau. Sei vaai atu i mea na tutupu i le Tusi a Mamona: e toatele tagata na vaai i faailoga ma vavega, ae a leai se faatuatua, o lo latou usiusitai e lei umi.

O le a sese foi le sailia o vavega mo le tautaua po o tuge, mo le faatinoina o le taui ma sui, po o le taumafai e suia le finagalo o le Atua.

Na aoao mai Peresitene Polika laga (1801–77) "O vavega . . . e le mo e le talitonu; e mo le faamafanafanaina o le Au Paia, ma faamalolosia ai ma faamautu le faatuatua o i latou o e alolofa, matatau, ma auauna atu i le Atua."⁴ O le malamalama pe aisea e faatino ai e le Atua vavega e mafai ona fesoasoani ia i tatou e iloa ai vavega i o tatou olaga.

O LE A SE MEA E MAFAI ONA OU FAIA?

Faaalu se taimi e mafaufau ai i le vaiaso ua sola. Pe na e molimaunina ni vavega masani i lou olaga i aso taitasi? Afai o le vavega na e faamoeoeina e lei tupu, pe na i ai se isi aafiaga na saunia le mafanafana mo oe, le faatupulaia faaleagaga, po o se avanoa e faalatala atili ai i le Faaola?

E Mafai Faapefea Ona Ou Iloa se Vavega?

E faatoa tupu vavega e tusa ai ma le finagalo o le Atua ma lo tatou faatuatua ia te la. Na tusia e le perofeta o Moronae, "Ma pe sa i ai se taimi na faia ai e se tasi ni vavega seia mavae ona latou faatuatua muamua; o le mea lea sa muamua ona latou talitonu i le Alo o le Atua" (Eteru 12:18). O le mauaina o le faatuatua e faatagaina i tatou e vaai i mea lelei na e tutupu i o tatou olaga o se galuega a le Atua nai lo mea lava na tutupu faatasi pe o le fetau lelei foi. O le iloaina o se vavega o le vavega lava ia! Afai tatou te vaai i le olaga e ala atu i ni tioata o le faatuatua ia lesu Keriso, o le amatala o tatou mata i le tele o vavega o loo siomia ai i tatou.

Ae ui i lea, o le lapoa, le taimi, ma le taunuuga o se vavega e le o le fua lea o lo tatou faatuatua. Sei tatou faapea la e lua aiga na mauaina uma ni talafou ua

maua se tasi o a latou fanau i le kanesa. E tatalo uma aiga mo le pele ia vave ona manuia. E faatino uma e aiga le faatuatua i le mana faamalolo o lesu Keriso.

O le tamaitiiti o le aiga muamua ua manuia atoatoa, ua sese ai le vaaiga a le fomai ua toe oni masina o totoe e ola ai. O le tamaitiiti o le aiga lona lua ua tigaina mai i lea togafiti i lea togafiti ma na iu lava ina maliu ai, ae ua lofituina le aiga atoa i le filemu ma le mafanafana nai lo le faavauvau.

O le aiga muamua e lei faapea na sili atu le faatuatua nai lo le aiga lona lua. O aiga uma na mauaina ni vavega i a latou lava ala, ma o vavega uma o ni vaega o se mamanu o le faaaauauina o le faamau-tino faapea o le Atua e i ai se fuafuaga mo Ana fanau taitasi.

E faatinoina e le Alii vavega uma e foliga mai e masani ma se vavega tulagaese i o tatou aso. O soo faamaoni o lesu Keriso i tisipenisione taitasi na oo i ni faamalologa maoae ma ni manuia e le mafai ona faamatalaina. Ae ui i lea, e le tatau ona tatou misia mea e tutupu i aso taitasi na e faatino ai o se faamanatu o le aao o le Atua i o tatou olaga. O nisi taimi e tau lava o lo tatou iloaina! ■

FAAMATALAGA

1. Dallin H. Oaks, "Miracles," *Ensign*, June 2001, 6.
2. Bible Dictionary, "Miracles."
3. Bible Dictionary, "Miracles."
4. *Aoaoa a Peresitene o le Ekalesia: Polika laga* (1997), 349.

"O vavega . . . e le mo e le talitonu; e mo le faamafanafanaina o le Au Paia, ma faamalolosia ai ma faamautu le faatuatua o i latou o e alolofa, matatau, ma auauna atu i le Atua"

—Peresitene Polika laga

O LE FAUINA MA LE TAUSIGA O NEI MALUMALU
ATONU E LĒ SUIA AI LOU OLAGA, AE O LE

FAAAALUINA O LOU TAIMI | TOTONU O LE MALUMALU

O LE A MAUTINOA LAVA
[LE SUIA AI O LOU OLAGA].

Saunia e Peresitene Russell M. Nelson,
konafesi aoao Oke. 2018.



Faalogoina o le siufofoga o le Alii i le Konafesi Aoao

Saunia e Elder Neil L. Andersen
O Le Korama a Aposetolo e Toasefululua

Ou te tuu atu la'u tautinoga o lesu o le Keriso, o loo la taitaia mataupu o lenei galu-ega paia, ma o le konafesi aoao o se tasi lea o taimi taua tele Na te tuu mai ai faatonuga i Lana Eklesia ma ia i tatou taitoatas.

A o tatou feiloai ai i lalo o le taitaiga a Peresitene Russell M. Nelson, tatou te tulimatai atu e faalogo i le "finagalo o le Alii, . . . o le mafaufau o le Alii, . . . o le siufofoga o le Alii, ma o le mana lea a le Atua mo le olataga." (Mataupu Faavae ma Feagaiga 68:4). Tatou te faalagolago i le folafolaga a le Alii: "Pe i lou lava leo po o i le leo o a'u auauna, ua tutusa lava." (Mataupu Faavae ma Feagaiga 1:38).

I le vāvāō ma le fenumiai o lo tatou lalolagi i nei aso, o le faatuatuaina ma le talitonuina o upu a le Au Peresitene Sili ma le Korama a le Toasefululua e taua tele i lo tatou tuputupu-a'e faaleagaga ma le tumau.

Ua tatou o mai i le konafesi aoao ua uma ona tatalo ma ua saunia. Mo le toatele o i tatou, o loo i ai ni popolega e manaomia vave ni tali, ma ni fesili aupito faamaoni. Tatou te mananao ia faafou lo tatou faatuatua i lo tatou Faaola, o lesu Keriso, ma ia faamalosia lo tatou tomai e tetee atu ai i faaososoga ma aloese ai mai mea faalavefau. Ua tatou o mai ina ia aaoaina mai lugā.

Ou te folafola atu a e saunia lou agaga, ma e sau ma tulimatai atu o le a e faalogo i le siufofoga o le Alii, o le a oo atu manatu ma lagona i lou mafaufau ua faapatinoina faapitoa lava mo oe.

O loo i ai se oa natia o le taitaiga faalelagi o loo faatalitali mo lou mauaina i savali o le konafesi aoao. O le suega la mo i tatou taitoatasi o le auala tatou te tali atu ai i mea tatou te faalogo i ai, o mea tatou te faitau i ai, ma mea tatou te lagonaina.

Ou te folafola atu ia te oe a o e faafofoga i le siufofoga o le Alii ia te oe i aoaoga o lenei konafesi aoao, ona faatino lea o na uunaiga, o le a e lagonaina le aao o le lagi i ou luga, ma o le a faamanuiaina ai lou olaga ma olaga o isi o loo siomiaina oe. ■

Mai se lauga o le konafesi aoao o Oketopa 2017.

E tautala
**Igilisi, Farani,
Potukale, ma
le Sipaniolo.**



Ao avea ma se tagata aoga fou
i le lunivesite o Polika laga, na ia galue
o se **teufale e fufuluina
faletaele** i le 4:00
i le vaveao ae lei alu i vasega.



Elder

NEIL L. ANDERSEN



E fiafia e **taaalo
pasiketi
polo** faatasi ma
lona aiga pe a foi
mai le fale mai le
galuega.



I le aoga maualuga na ia alu ai i
se **konafesi a tamaiti
aoga o le malo** faatasi ma
ni talavou mai le 37 atunuu! Sa ia
tau atu i isi e uiga i le Ekalesia.



Na faauu
mai le
BYU ma
mai le Aoga
Pisinisi o
Harvard.



Na faaipoipo atu
ia Kathy Williams
i le aso 20 o
Mati, 1975, i le
**Malumalu
o Sate
Leki.**



Na filifilia o le
**peresitene
lagolago
a tamaiti
aoga** i le BYU.



Na te aveina lana fanau taitoatasmo
**se meaai o le taeao e
faatasi i le masina**
ina ia mafai ona ia tuuina atu ia i latou
taitoatasmo lona taimi atoa.



Sa soifua mai i le Aso
9 o Aokuso, 1951, i
Logan, Iuta.



E toa fa lana fanau
ma e 17 fanau a fanau.

Na valaaulia e
auauna atu i le
**Misiona a
Farani** ma
auauna atu mulimuli
ane o se peresitene
o le Misiona a Farani
Bordeaux.



Na lagolagoina i le
**Korama a
Apostolo e
Toasefululua**
ia Aperila 2009.




AUTALAVOU MATUTUA

TAPUAIGA I LE MALUMALU

*Faitau e uiga i faamanuiaga
o le ofuina o le ofusa ma le
taumafai ia malamalama atili i
au feagaiga o le malumalu.*

42



AUTALAVOU

**PE FAAPEFEA
ONA ILOA PO O LE
FEA E MONI**

52, 55

LESONA I ASO SA

**E FAAPEI FOLIGA
O SE VAVEGA I ASO
NEI?**

60

KONAFESI AOAO

UA E SAUNIA?

56, 64

O LE EKALESIA A
IESU KERISO
O LE AU PAIA O ASO
E GATA AI

UO



O se
malumalu fou i
ITALIA!
Tagai i itulau 8-11



Saunia e
Peresitene
Henry B. Eyring

Fesoasoani Lua i le
Au Peresitene Sili

Ia Avea Faapei o Iesu

I se tasi Aso Sa, sa ou matamata ai i se vaega o tamaiti o le Peraimeri o pepese:

*Ou te taumafai e avea e faapei o Iesu;
Alofa e pei o Ia, i a'u mea uma e fai.
A faaoso a'u e fai mea sese.
Ou te usitai i le leo lemu e faimai,
“Ia fealofani e pei o Iesu.
Agalelei i mea uma e fai.
I ou mafaufauga ia agamalu,
Ua a'oa'o mai o Iesu.”*

O tamaiti taitasi na faalagolago atu i luma, toeitiiti lava i luma atu o lona nofoa. Na mafai ona ou vaai i le

malamalama i o latou mata ma le naunautai i o latou foliga. O Iesu Keriso sa avea o lo latou faataitaiga. Ia avea e faapei o Ia o lo latou sini.

E mafai ona tatou avea uma e faapei o le Faaola, o Iesu Keriso, e ala i le ola i Lana talalelei. Ou te faamoe-moe o le a outou vaavaai mo ni avanoa e fai ai e faapei ona Ia faia ma alofa e faapei ona Ia alofa. O le alofa o le auala Na te taitaia ai i tatou ia avea faapei o Ia. E leai se tasi o i tatou e atoatoa. Ae e mafai ona tatou iloa o loo tatou mulimuli i Ona ala. Na te taitaia i tatou, ma e finalo o Ia ia i tatou e mulimuli ia te ia. ●

Henry B. Eyring, “O La Tatou Faataitaiga Atoatoa,” Liahona, Nov. 2009, 70–73.



E mafai faapefea ona e faaali atu le alofa mo isi? Auina mai ia i matou se fugalaau mo la tatou togalaau o le agalelei! Imeli i le liahona@ldschurch.org.

O Le Lauga i luga o le Mauga



Mataio 6:6-15



Mataio 5:14-16



Mataio 7:7-11



Mataio 5:2-11



Mana o le Tatalo

O ai e mafai ona e tatalo mo i latou i le aso lenei?

Saunia e David Dickson

Mekasini a le Eklesia
E faavae i se tala moni

*"Tatalo le Tasi mo le Tasi"
(Iakopo 5:16).*

Na valaau mai Tama i tagata uma e o mai i le komepiuta. Na faapau e Lusi le kilafi meataalo na ia taalo ai ae faavave mai. O le a le mea o loo tupu? Pe ua oo i le taimi e valaau ai Tinamatua i le upega tafailagi?


Na tusi atu Tama i le lau o le komepiuta. "Na ou fia faaali atu ia te outou se vaega o se lauga mai le konafesi aoao."

Sa faapuiti mata o Lusi. E le o Tinamatua. O Peresitene Eyring! O ia e i le Au Peresitene Sili.

Na oomi e Tama le amata. Na aoao mai Peresitene Eyring e uiga i le lagolagoina o ou taitai i le Eklesia. Na ia faamatalaina le ala e manaomia ai e taitai o le Eklesia i tatou ia tatalo mo i latou.

"O le mafuaaga lena tatou te tatalo ai mo le perofeta, e sao a Tama?" na fesili atu ai lona tuagane laitiiti, o Tavita. Na lue uma atu ulu o Tama ma Tina.

"Ioe, tatou te faia," na fai atu ai Tama. "Ae ou te mafaufau foi e uiga i la tatou au peresitene o le paranesi. Ou te manatu e manaomia foi e Peresitene Alvarez ma ona fesoasoani a tatou tatalo."



E alofa Lusi ia Peresitene Alvarez ma ona fesoasoani. E agalelei i latou ia te ia i taimi uma lava. Na manao o ia e fesoasoani ia i latou!

"O le a ou tatalo mo i latou," na fai atu ai Lusi. "Ma e mafai foi ona tatou tatalo mo i latou i a tatou tatalo faaleaiga!"

"Ou te iloa o se manatu sili lena," sa fai atu ai Tina. "Sei tatou faia loa."

Mo isi aso na sosoo ai, na taumafai ai Lusi ma le malosi e manatua e tatalo mo le au peresitene o le paranesi i soo se taimi e fai ai sana tatalo. E na o ni nai sekone faaopoopo lava i taimi taitasi. Faigofie!

O le aso Sa na sosoo ai i le sauniga faamanatuga, na tulai ai i luga Peresitene Alvarez ina ua uma le pese. Ona ia fai mai lea o se tala na faateia tele ai Lusi.

"I le avea ai ma se au peresitene o le paranesi, matou te fia faafetai ia te outou mo le tatalo mo i matou," na ia fai mai ai. "Ua matou lagonaina le malosi moni lava mai na tatalo. Matou te manaomia moni lava lo outou faatuatua ma tatalo e fai ai o matou valauga. Faafetai lava!"



"Pe a ou tatalo, ou te lagona
le latalata atili atu i le Tama
Faalelagi ma lesu Keriso."

**Lorena Eduarda N.,
5 tausaga, São Paulo, Pasila**

Sa ataata fiafia Lusi. Na ia autilo atu ia Tavita. Sa ataata foi o ia. Sa le talitonu o ia! Sa fiafia tele o ia ma na le mafai ai ona nofo filemu. Sa ia faalagolago atu ma toso mai le lima o le ofu o Tina.

"Tina," o lana musumusu atu lea. "Na e lagona atu le tala a Peresitene Alvarez?!" Sa ia manao e osooso i luga ma lalo. "E aoga! E aoga moni lava a tatou tatalo!"

Ina ua tuua le lotu, na savavali faatasi Lusi ma lona aiga i le fale.

"E faalogo moni mai lava le Atua ia tatou tatalo," na fai atu ai Tina. "Ma pe le ofogia ea le vaai i le ala e mamana ai mo



se vaega o tagata le tatalo mo se isi tagata?"

Sa lagona e Lusi le mafanafana ma le fiafia o lona loto. Na la musamusa atu ma Tavita i lalo o le ala savavi ao savavali atu Tina ma Tama i o la tua. Sa ia iloa na faafogaina e le Tama Faalelagi tatalo a lona aiga. Sa latou faia moni lava se eseesege. I le na o le tatalo lava!

I lena po, na sauni Lusi e fai ana tatalo. Sa ia mafaufau e uiga i lana faiaoga o le Peraimeri ma isi taitai o le Ekalesia e mafai ona latou faaaogaina nisi faamanuiaga faaopoopo. Atonu o le a tatalo foi o ia mo i latou! Sa piilima ona lima ma punou lona ulu. Na ia iloa lelei lava le tala e fai atu. ●

Ao E Maimoa i le Konafesi

Faalogo mo nei upu taitasi po o fuaitau i le taimi o le konafesi aoao ia
Aperila ona valivali lea i totonu o avanoa pe a e faalogo o tau mai.



Lata mai pei o se Tatalo Filemu

Filemu $\text{♩} = 48-58$

Upu ma le fati na tusia e Sally DeFord

1. Tai - mi i lea tai - mi i le po po o le ao, O Lo'u Tama i le La - gi e -
 2. A ou faafe - tai mo manu - ia Na te au - mai, E fia - fia o la i lo'u vi -
 3. Pe ou te ta - ta - lo ma le le - o, Pe le - mu, e faa - fo - fog a -

le ma - ma - o. E lata mai o la pe a ou öle i Lo - na sua - fa.
 ia o I - a. A na - 'o a'u ma mo - o - mi - a se uo.
 ina lo'u lo - to. O Lo - na a - lo - fa e ma - u - ti - noa.

To Coda ♩

El lata mai pei se tata - lo le - mu. Pei se tata - lo le - mu.

Ou te ta - ta - lo i lo' u Ta - mu.

ma soo se taimi, soo se mea. A ou vala - au e la - ta mai o la

D.C. al Coda
Pei se ta - talo le - mu.

♩ CODA
Pei se ta - talo le - mu.

Talofa mai Italia!



O Italia e i le itu i saute o Europa. I luga o se faafanua, e tai foliga e pei lava o se seevae soloatoa[boot]! E silia ma le onosefulu miliona tagata e nonofo ai.



E te iloa fai atu "O au o se atalii o le Atua" faaItalia? *Sono un figlio di Dio.* O loo faitau faaItalia e lenei teine le Tusi a Mamona.



O a'u o Margo. Ma o a'u o Paolo. O loo ma malaga faataamilo i le lalolagi e aoao e uiga i fanau a le Atua. Auai faatasi ma ma'ua a o ma asiasi atu i Italia!



O le tele o tagata Italia e auai i le ekalesia Katoliko. E ui o le tele o a latou talitonuga e ese mai ia i tatou, latou te talitonu i le Tama Faalelagi, Iesu Keriso, ma le Agaga Paia.





Ao lei oo i le aiga o le afiafi, o le tele o aiga Italia e fiafia e o e savalivali i le afiafi, po o le *passeggiata*. E fai o latou ofu mananaia ma savavali faatasi e taamilo i mea o loo i ai faleoloa. Latou te ono malolo foi mo sina gelato—aisakulimi faaItalia. *Mmmm!*

I le masina lenei, o le a tatalaina ai se malumalu i Roma! Sa faasilasila mai i le konafesi aoao o Oketopa 2008. O le a avea lea ma uluai malumalu a Italia.

E te sau mai Italia?

Matou te fiafia e faologo ia te outou! Vaai i le faavaa pito i tua e iloa ai le auala e tusi mai ai ia i matou.

Faafetai mo le faataamilo i Italia faatasi ma i ma'ua. Feiloai i se isi taimi! *Ciao!*

Feiloai i nisi o a ma uo mai Italia!

"Ou te iloa o loo soifua Iesu ma na te taitaina perofeta. E taua tele le o i le lotu aua e mafai ai ona tatou aoao atili e uiga ia Iesu. Ua amata ona ou faitauina le Tusi a Mamona i aso uma ona ou te fia iloa le tele o mea e uiga i le talalelei."

**Lorenzo B., 7 tausaga,
Piedmont, Italia**

"Pe a ou latalata i le malumalu, ou te mafaufau ia Iesu ma e oso lou fiafia. Ua iu lava ina matou le toe tietie mo le 12 itula e o i le malumalu. O lea la ua mafai ona ou oo i le malumalu i le nao le 50 minute! Pe a 12 ou tausaga, o le a mafai ona ou alu ma faia papatisoga i totonu o le malumalu."

**Olivia G., 8 tausaga,
Lazio, Italia**

Saunia e Marissa Widdison

Mekasini a le Ekalesia

E faavae i se tala moni

“Ou te fia vaai i le malumalu. “Ou te ulu i ai i se aso”
(Tusipese a Tamaiti, 99).

Na pulatoa atu Gioele ma Michele i le tulaga o le galuega i le isi itu o le auala. Sa mafai ona la iloa atu le tele o pou uamea ma faaputuga o sima.

“E lei foliga lava o se malumalu,” na faapea mai ai Gioele.

“Ae o le a foliga i ai i se aso,” na tali atu ai Michele.

O le uluai taimi lea na vaai ai le auso i le mea o fausia ai le Malumalu i Roma Italia. I lea taimi sa tau malaga lo latou aiga i Suitiselani e asiasi i le malumalu. Ae o lea malumalu fou ua na o le 30 minute le mamao mai lo latou fale!

Sa matamata Michele ma Gioele o la’u e loli sasama lapopoa faaputuga palapala.

“Ou te manatu o o tonu o le a i ai le isi tumutumu,”

Vaavaai atu i le TUPUTUPU AE o le Malumalu o Roma



na faapea atu ai Michele, ao tusi atu i se nofoaga e latalata i luma o le fale.

Sa lue le ulu o Gioele. "Vaa! O lea ua sau papa," na ia faapea atu ai. Sa ofu lo la tama i ona ofu faigaluega masani—ofu lotu ma se pulou fau fale paepae. Sa ia galue o se enisinia o mea tau eletise i totonu o le malumalu. Sa fafia i laua e faalogologo e uiga i mea na ia galue ai i aso taitasi. Mo se faataitaiga, i se tasi aso na ia tau atu ai ia te i laua ua taunu mai le faatagata o Keriso. O se isi taimi na ia tau atu ia i laua e uiga i le vai papatisoga.

O lena po, na faamautinoa e Michele e fai ana tatalo ma faafetai atu i le Tama Faalelagi mo le malumalu. Sa ia maua se lagona mafanafana i soo se taimi lava na te tatalo ai i ai.

Na mavae atu vaioso. O puipui faaofofu o le malumalu sa uftitia i maa malolosi, ma sa tutu ae ai tumutumu uumi e lua agai i le lagi. Sa fausia se fale mo tagata asiiasi laitiiti e latalata ane i ai. Mai i lea taimi i lea taimi, e o ai Gioele ma Michele e oomi o laua foliga i le faamalama e vaai poo lea se mea ua sui.

Ona oo lea i se tasi aso ae faateia i laua i se tala fou fafia.

"Pe lua te fia matamata la i le faatagata o le agelu o Moronae o tuu i le tumutumu o le malumalu?" Na fesili atu ai tina. O aiga o e na galulue i le galuega sa valaaulia uma e matamata.

Sa faigata ona talitonu i ai Gioele ma Michele. Sa matuai fafia lava i laua!

O le taeao na sosoo ai na ofu ai o la ofutino papae ma fusiua. Sa latou savavali faataamilo i le malumalu faatasi ma isi aiga. Sa mafai foi ona pue se la ata faatasi ma le agelu auro o Moronae. Sa maoae le tele!

Ona amata lea ona siitia e le aufaigaluega le faatagata. Sa matamata Gioele i le siligi lapoa o sii faaeteete atu le agelu o Moronae i luga o se tasi o tumutumu. Sa uu faatamilo se mea pue ata faalele i le ea i le pueina o le ata. Sa matuai seki lava!

Sa mafaufau Gioele e uiga i tagata uma e mafai ona aoao e uiga i le Eklesia e ala i le asiiasi i lauelele o le malumalu. Sa ia mafaufau i le tele o tagata o le a faaipoipo iina ma tagata o le a papatisoina e sui mo e ua maliliu.

"O lea la ua foliga e pei o se malumalu," na ia tau atu ai i lona uso. Sa ataata Michele ma lue lona ulu.

Sa lagona e le auso le fafia. Sa fafia i laua e o i totonu o le malumalu i se taimi o lata mai! Sa tuputupu ae faatasi a la molimau faatasi ma le fale. ●

**O le Malumalu o Roma Italia
e faapaaina i le vaiaso o Mati 10-12!**




Saunia e Tiffany M. Leary

Etele auala e fai atu ai “ou te alofa ia te oe” i o tatu aiga ma uo! Taaalo i lea taaloga i se vaega. Faaaoga mea e faailo ai nofoaga e pei o faamau po o tamai maa. Faataavale se maa taisi, agai i luma, ma fai taga i le avanoa e pau i ai. ●

E Tele Auala e
Fai Atu Ai “Ou te
Alofa ia te Oe”

AMATA





O Elder Uchtdorf Ua Asiasi i Rusia

*E malaga atu Aposetolo i le salafa o le lalolagi e auauna
atu i tagata ma aoao i latou e uiga ia Iesu Keriso.*

Na malaga atu Elder Dieter F. Uchtdorf ma Sister Harriet Uchtdorf i Rusia e fesoasoani i tagata o le Ekalesia iina. Ae lei avea o ia ma se Aposetolo, na masani ona lele Elder Uchtdorf o se kapeteni o le vaalele i Rusia. ●



O Rusia o se atunu tele, ma e lei i ai lava se malu-malu muamua. O le tausaga talu ai na faasilasila mai ai e Peresitene Nelson o le a fausia se malu-malu iina. Ua matuui fiafia tagata uma!



Muamua na malaga atu Elder Uchtdorf i Moscow, le laumua o le aai o Rusia. Na fiafia tagata e feiloi ia te ia ma faalogo ao aoao atu o ia. Na ia tau atu e mafai ona tatou fesoasoani i isi ia iloa e uiga ia Iesu e ala i le auauna atu ia i latou.

Rusia

St. Petersburg

Moscow

Ona sosoo ai lea o lona malaga atu i se aai tele e taua o St. Petersburg. I Rusia, o faifeatalai e valaau o "volenitia," ma latou te saili mo tagata e fesoasoani i ai i aso taitasi. E faatoa mafai ona latou aoao tagata e uiga i le talalelei pe a latou i ai i totonu o se fale o le Ekalesia. Na fai aiga o le afiafi Elder Uchtdorf ma nisi o volenitia o e na faa-uma a latou misiona ma o le o i le fale.



E ui lava tatou te le o iloa po o fea ma po o afea e fausia ai le malumalu fou, na uunaia e Elder Uchtdorf tagata uma i Rusia ia saunia o latou olaga mo le aso o le a i ai le malumalu iina.



“Ua tatau ona tatou saunia faaleagaga mo le malumalu.”

SAUNIA MO LE MALUMALU

O a nisi o auala e mafai ai ona e saunia e alu i le malumalu i se aso?



Tuu se ata o le malumalu i lou potu.



Saili se tasi i lau gafa e lei papatisoina lava.



Talanoa e uiga i le malumalu i se tasi na i ai i totonu.

Feiloai ia Dr. Mattie

Saunia e Jordan Monson Wright

Faavae i se tala moni

O le 1873, ma o le perofeta, o Peresitene Polika Iaga, sa saunoa i le konafesi aoao. "Ua oo mai le taimi," na ia faapea atu ai, "mo tamaitai e o mai o ni fomai i nei vanu o mauga."

Na fafia Martha (Mattie) Hughes e sefulu-ono-tausaga ina ua ia faalogo i le faaaliga a le perofeta. Na ia iloaina o nisi o aoga fomai na iu lava ina latou faatagaina tamaitai ia avea ma fomai. O le avea ma se fomai sa fai ma ana miti.

E moni lava, ae lei alu o ia i le aoga fomai, sa tatau ona teuina e Mattie le tele o tupe. Ma ia maua se tikeri mai le kolisi. O le a tele se taimi e alu ai. Ma o se galuega o le a faigata tele. Sa ia iloaina lena mea.

Ae na mafaufau Mattie i lona uso laitiiti, o Annie, lea na maliu i luga o le taavale solofanua i Iuta. Sa leai se fomai e fesoasoani ina ua mai o ia. Ona maliu lea o le tama o Mattie. O iinei i le Aai o Sate Leki, na iloa e Mattie le tele o tagata o e na mamai pe manunua. Afai e avea Mattie ma fomai, o le a mafai ona ia fesoasoani ia i latou.

Na filifili Mattie ia maua le faatuatua. Na fai mai le perofeta o tamaitai e tatau ona aoao ia avea ma fomai, ma na manao o ia ia avea ma se fomai. O le a fesoasoani le Atua ia te ia ia maua se ala e alu ai i le aoga fomai.



Na galue malosi Mattie e teu se tupe. Sa maua sana galuega o se faatulaga mataitusi mo se nusipepa. Sa tatau ona ia faatulaga lelei mataitusi taitasi o upu uma i le faasologa sao ina ia mafai ona lolomi le nusipepa. A manava le galuega, e alu Mattie i vasega i le iunivesite ia saunia ai mo le aoga fomai.



I le va o le fale, galuega, ma le aoga, na savali Mattie mo le ono maila (10 km) i aso uma! Na ia faia ni seevae uumi tamaloa aua o ona seevae masani e le lava le malosi e tauasa ai i le lopala. Sa ia moomoo ia mafai ona ia tietie i le taavale e toso-e le miula nai lo le savali, ae na ia sefeina pene uma mo le aoga.

Na popole Mattie nei le mafai ona ia sefeina ia lava ni tupe. Na ia iloaina o lona tina ma lona tamāfai o le a taumafai e fesoasoani ia te ia, ae na i ai isi tamaiti e tausia. O le a se isi mea e mafai ona ia faia?

Na filifili Mattie e fai se suegatupe ma fesili atu i uo ma tagata o le uarota e faasoa mai soo se tupe e mafai ona latou faasaoina. Sa latou fiafia e fesoasoani. O Mattie sa na o le tamaitai lona tolu e mulimuli i le valaau a Peresitene Iaga, ma na latou mananao ia te ia ia faamanuina ma avea ma se fomai.

Ina ua uma suegatupe, na lava tupe a Mattie e alu ai i le aoga fomai! Na ia malaga i le isi itu o le atunu i se iunivesite ma suesue malosi.

E lua tausaga mulimuli ane, na uu e Mattie lona ulu i luga ma savali sasao atu i luga o le tulaga o le faauuga ina ia taliaina lona faailoga. Ua iu lava ina avea o ia ma fomai! Na te le'i lagonaina muamua se fiafia tele.

Na tilotilo atu Mattie i le potopotoga o tagata ese o loo feei mai ma le fiafia. Na leai se isi o lona aiga po o uu mai le fale na mafai ona i ai iina, ae na ia iloaina na mitamita i latou ia te ia. O le a vave lava ona ia toe foi atu i le fale e tausia i latou ma aoao i latou i mea na ia aoaoina.

Ina ua toe foi atu i Iuta, na galue Mattie i le falemai a le Aualofa i le Aai o Sate Leki. Na fiafia o ia i le latalata atu i Mauga o le Vavau! Sa fiafia o ia i lana galuega o se fomai. Na ia fiafia e togafiti faamai, faamalolo manua, ma e oo lava i le aoao atu o vasega i le ala e faafanau ai pepe.

O le avea ma se fomai sa o se galuega faigata. Ae na alofa le Tama Faalelagi ia te ia ma na fesoasoani ia te ia. O lenei o le a faaalu e Mattie le vaega o totoe o lona olaga e fesoasoani ai i isi. ●

E alala le tusitala i Michigan, ISA.



O Martha "Mattie" Hughes Cannon (1857-1932) sa o se paionia, fomai, ma se tagata o le malo. O ia o le uluai tamaitai i le lunaite Setete na tofia o se senata i le setete. Na ia galue malosi ia avea le olaga ia sili atu mo isi.



Saunia e Elder
Massimo De Feo

O Le Fitugafulu

O se Lesona mai i Ou Matua



papatisoina mulimuli ane
ma faamauina i ma'ua.
Sa 10 ou tausaga ae 11
Alberto.

Ina ua 18 ou tausaga,
sa ou fai atu i lou tama e fesoasoani mai ia te au
e totogi lau misiona. I le taimi muamua sa ia tali
mai, "E leai lava. E tele naua tupe." Ae i le lua aso
mulimuli ane, na ia fesili mai ia te au, "E te fia alu
moni lava i se misiona?" Ma sa ou fai atu, "Ioe.
Ma lo'u loto atoa." Na fai mai lo'u tama o le a ia
fesoasoani ia te au.

Ou te lei malamalama pe aisea o le a totogi
ai e lou tama se tau tele faapea mo au. Ona
ou iloaina lea aua e alofa o ia ia te a'u. Na ou
manatua ai le taulaga a Iesu Keriso mo i tatou.
Na Ia totogi le tau sili ona maualuga ona e alofa
o Ia ia i tatou.

Ina ua ou foi mai lau misiona, sa mai tigaina
lou tina i le kanesa. I se tasi aso na ia fai mai ia te
au e aoao o ia e tatalo. Na manao o ia e tatalo mo
au. E oo lava i ona tiga, sa ia manatu ai i isi. Na
ou manatua ai foi Iesu Keriso. Ina ua Ia togiola
mo i tatou, sa tiga tele o Ia. Ae sa tatalo o Ia mo i *tatou*.

E ui lava e lei auai lava ou matua i le Eklesia i lenei
olaga, na avea i laua ma ni faataitaiga lelei mo au. Ou te
faafetai mo lesona na ou aoao mai ia te i laua. E mafai
ona tatou aoao le tele o mea mai o tatou matua, faiaoga,
ma taitai pe afai tatou te faalogo i mea latou te aoaoina
ai i tatou. ●

Sa ou ola ae i se taulaga itiiti i Italia i saute. O lou
Saiga e le o ni tagata o le Eklesia. I se tasi aso, ao iva
ou tausaga, na tuitui mai ai ni faifeautalai se toalua i lo
matou faitotoa.

E lei fiafia ou matua i mea na tau atu e faifeautalai, ae
sa ou fiafia. E faapena foi lou uso, o Alberto. Na faataga
e o ma matua i maua e feiloai pea ma faifeautalai. Na

Faaali ma Ta'u Mai



Na matou faamanatuina le tausaga o le Peraimeri e ala i le faia o se faadliga taleni faatasi ai ma le fesoasoani a aiga ma faifeautalai. Na faatinoina e aiga taitasi se tala mai le Tusi a Mamona.

Gaoioiga a le Peraimeri, Siteki o Cali Colombia Colima

O lou papaptisoga sa sili ona faapitoa ia te au. Na ma tatalo ma lou tina ina ia tuuina mai e lou tama ia te au le faatagaga e papatiso ai. Na tali mai le Tama Faalelagi i au tatalo, ma na tuuina mai e lou tama ia te au le faatagaga. Na ou papatiso, ma ou te fiafia tele e auai i le Ekalesia moni e tasi i luga o le fogaelele, O Le Ekalesia a Iesu Keriso o le Au Paia o Aso e Gata Ai. E tuputupu pea lau molimau i aso taitasi ao ou ooao atili e uiga i lou Tama Faalelagi.

Amy V., 9 tausaga, El Oro, Ekuatoa



Na tauaimisa lou uso laitiiti ma lou tuafafine. Na ou faamanatu ia i laua na ooao mai Iesu e aua le misa. Na manaia le lagona o le avea ma se faataitaiga lelei.

**Tequan K., 9 tausaga,
Lusaka, Zambia**




Na matou ooao e uiga i le ofutau a le Atua, Mataupu Faavae o le Faatuatua, taitai o le Ekalesia, o tusi i le Tusi a Mamona, ma le miti a Liae.

Gaoioiga a le Peraimeri, Itu o Santiago Sepania

Na Aoao Atu Iesu Keriso e uiga i le Tatalo

Sa aoao atu
Iesu i se matie
latalata ane i le
sami. Sa Ia aoao
atu e uiga i le
agalelei. Sa Ia
aoao atu e uiga
i le avea ma se
faataitaiga lelei.
Na Ia aoao atu
foi e uiga i le
tatalo.





Na aoao atu Iesu
e tatau ona tatou
talanoa atu i le
Tama Faalelagi e
ala i le tatalo.

E mafai ona
tatou faafetai i
le Atua mo mea
ua tatou maua.
E mafai ona tatou
ole atu ia te Ia
mo mea tatou te
manaomia.

E mafai ona
tatou tatalo e
faamagalo isi.
E mafai ona tatou
ole atu i le Atua
ia faamagaloina
i tatou. E mafai
ona tatou tatalo ia
faia filifiliga lelei.



E mafai ona ou pei o Iesu. E mafai ona ou tatalo i le Tama Faalelagi i aso uma. ●

E mafai ona e fiaitau i ia aoaoga a Iesu i le Mataio 6:5–13.

E Mafai ona Ou Tatalo



Matua Pele e

O le faitau tusi o se tomai taua e mafai ona tatala ai faitotoa e tele. O ni auala ia mo le faaaogaina o le *Uo* e fesoasoani i isi ia iloa faitau.

- Faaaoga ata tusi. Fesili i lou alo e faamatala mea ua ia vaai i ai ona sue lea o lena vaega o le tala ao latou faitau pe faalogo.
- Faitau leotele tala ma faia ia mulimuli i ai tamaiti i lo latou taimai lima.
- Afai latou te maua se upu fou, faamatala le uiga ma faia ia latou tusiina i lalo ma aoao mulimuli ane.
- Fai fesili e faatatau i tala e fesoasoani ia i latou ia malamalama.
“O a lagona ua oo ia Lucy i lea taimi?” “O le a le mea na aoao mai e Iesu e uiga i le tatalo?” “O le a se mea e te manatu o le a tupu?”
- A uma se tala, talanoa e faatatau i ai. Fai atu i lau tama e faamatala atu ia te oe le mea na tupu. O le a se mea na latou aoaoina? O le a se mea na latou fiafia i ai?

Matou te fiafia e faalogo i ou manatu e uiga i le faaaogaina o nei tala ma gaoioiga e aoao ai isi!

Vaega Fou o le *Uo*

50 E. North Temple St, Room 2393

Salt Lake City, UT 84150 USA

liahona@ldschurch.org

Alofaaga,

O Le *Uo*

ANOTUSI

- U2** Mai le Au Peresitene Sili: Avea Faapei o Iesu
- U3** O Le Lauga i luga o le Mauga
- U4** Mana o le Tatalo
- U6** Mea Faafafia: Ao e Maimoa i le Konafesi
- U7** Musika: Lata Mai e pei o se Tatalo Filemu
- U8** Talofa mai Italia!
- U10** Vaavaai Atu i le Tuputupu Ae o le Malumalu o Roma
- U12** E Tele Auala e Fai Atu Ai, “Ou Te Alofa ia te Oe.”
- U14** O Apostolo i le Salafa o le Lalolagi: O Elder Uchtdorf Ua Asiasi Atu i Rusia
- U16** Faataitaiga Lototoa: Feiloai ia Dr. Mattie
- U18** O Se Lesona mai i Ou Matua
- U19** Faaali ma Ta'u Mai
- U20** Mulimuli ia Iesu: Na Aoao Atu Iesu Keriso e uiga i le Tatalo
- U23** Itulau e Valivali: E Mafai ona Ou Tatalo



**Su'e le Liahona
o loo natia i totonu!**

I LUGA O LE FAAVAA O LE *UO*
Ata na tusia e Natalie Hoopes